

01-6104

**ID SAYUTI OMAR**



**“Saya  
adalah  
MAHA  
FIRAUN”**

-Berita Harian 20 Julai 1999

Cetak Ke-2

# **"Saya adalah... MAHAFIRAUN"**

**BERITA HARIAN, 20 JULAI 1999.**

**TINTA MERAH**  
Kuala Lumpur  
1999

# **"Saya adalah... MAHAFIRAU"**

**BERITA HARIAN, 20 JULAI 1999.**

**MOHD SAYUTI OMAR**

KOLEKSI NEGARA

285572

NASKHAH PEMELIHARAAN  
PERPUSTAKAAN NEGARA MALAYSIA  
- 7 FEB 2002

© MOHD SAYUTI OMAR (MSO)

KOD : TM/BP 22/03-99

**HAKCIPTA TERPELIHARA** - Mana-mana bahagian di dalam pen-  
erbitan ini tidak boleh dihasilkan semula, disimpan dalam sistem  
simpanan kekal atau dipindah dengan sebarang bentuk atau sebarang cara  
sama ada dengan cara elektronik, sawatan, salinan foto, rakaman dan  
sebagainya tanpa mendapat keizinan daripada Penulis/Penerbit.

ISBN : 983-9032-23-2

Penerbit:  
**TINTA MERAH,**  
304 BLOCK A1 SEKYEN 4,  
WANGSA MAJU, KUALA LUMPUR.

Pencetak: Victory Press, Seri Kembangan,  
Selangor Darul Ehsan.

## **KANDUNGAN**

---

i. Muqadimah.	11
1. GILA SEORANG PRESIDEN	13
2. MAHATHIR NYANYUK ATAU GILA?	23
3. 32 PERBEZAAN DI ANTARA TOK GURU DENGAN MAHATHIR	39
4. MAHATHIR BUKAN PEMIMPIN BERIMAN DAN BERTAKWA	57
5. MAHATHIR PASTI KALAH	71
6. KU LI JADI PERKAKAS MAHATHIR	85
7. DI ANTARA NIK AZIZ - KU LI SIAPA PUJAAN RAKYAT	101
8. KEBUSUKAN DAN KEBURUKAN PEMIMPIN UMNO	113
9. UMNO SEMAKIN GILA TAHUN 2000	125
10. MENELAAH SEJARAH, MENTASIR KISAH	139
11. SURAT TERBUKA KEPADA MAHATHIR.	152

## **LAMPIRAN:**

1. Laporan polis Anwar terhadap Mahathir, Moktar dan Ghani	163
2. Kenyataan penjelasan laporan polis Anwar	165
3. Laporan polis Anwar terhadap penyelewengan Perwaja.	168
4. Laporan polis Anwar terhadap Daim Zainuddin	174
5. Nostalgia pahit di era Mahathir	178

dan tindakan yang tidak sewajarnya. Saya tidak tergamak untuk menuduhkan beliau seperti Firaun, tetapi saya rasa kita semua faham kenapa saya memilih perkataan itu sebagai judul buku ini.

Sesuatu yang jelas dan memerlukan kita Dr. Mahathir sendiri (terpaksa) menerima hakikat apa yang dianalogikan ke atasnya. Rupa-rupanya dalam diam Dr. Mahathir mengakui tuduhan dan cemuh yang dilemparkan ke atasnya. Dr. Mahathir mengakui bahawa **MAHAFIRAUN** itu adalah dirinya. Katanya "seperti mana anda tahu, Mahafiraun itu adalah saya"! Jadi berpandukan kepada kata-katanya itulah mengobek kamar hati saya untuk memberi judul buku ini sebagai "Saya adalah Mahafiraun." - *Berita Harian 20 Julai 1999.*

Sebagai seorang pemimpin bijak, berpandangan jauh, berani, mempunyai wawasan serta mempunyai ilmu yang banyak dan tinggi di samping gelaran dan anugerah diberikan termasuk wira dunia ketiga, sebagai pemimpin warak, pemimpin teragung di abad ini, mujahid dan sebagainya oleh para pengampu dan pembodeknya, rupa-rupanya Dr. Mahathir sedar akan cemuh yang dilemparkan kepadanya akhir-akhir ini.

**MAHAFIRAUN** adalah nama jolokan yang diberikan kepada Dr. Mahathir. Nama ini begitu popular di dalam internet, sehingga satu laman web menjadikan nama itu sebagai logo ataupun *mas-headnya*. Dunia IT atau dunia tanpa sempadan yang dipelopori dan menjadi kegilaan Dr. Mahathir telah memberi satu penghargaan ke atasnya sebagai **MAHAFIRAUN**. Kemajuan dan teknologi yang dibawa olehnya telah memakan dirinya sendiri. Pengunjung laman itu juga popular di mana sehingga hari ini laman itu dikunjungi oleh *visitor* sebanyak hampir tiga juta.

Sempadan dunia yang dibuka olehnya menyebabkan rakyat Malaysia tergamak merombakkan tali ikatan adat dan menuduh

beliau sebagai Firaun. Kenapa tidak sejak *internet* diperkenalkan rakyat negara ini sudah dapat mengikuti seluruh perkembangan dunia tanpa ada batas dan sempadan. Lebih mengejutkan lagi, rakyat negara ini juga dapat melihat sendiri batang tubuh bangsa Melayu yang berbogel dan berkelakuan lucah di dalam *internet*.

Pun begitu Mahathir tentunya berbangga kerana hasil usahanya akhir diterima pakai juga dengan meluasnya. Sama ada ia menguntungkan dirinya ataupun tidak, itu soal lain. Yang penting *Information Technology* (IT) yang dibawa itu telah dipergunakan sebaik mungkin.

**MAHAFIRAUN** mungkin nama itu terlalu kejam sangat. Tidak wajar ia disangkutkan ke atas batang hidung seorang pemimpin sehebat Mahathir. Tidak elok diletakkan di atas belakang wira dunia ketiga seperti Mahathir. Apa buruk sangatkah Perdana Menteri kelima itu? Sampai ianya digelarkan Firaun, maharaja yang paling zalim, angkuh dan kejam di dalam sejarah peradaban manusia?

Dalam Islam Firaun adalah satu nama yang menjijikkan sekali. Ia melambangkan kezaliman. Ia melambangkan kekufur'an. Ia melambangkan kebejatan. Ia melambangkan ketamakan. Dan ia melambangkan sejuta lambang-lambang antagonis yang lebih buruk dan busuk daripada *shit*. Mengapa tidak, Firaun bukan sahaja mempunyai sifat-sifat terkeji, tetapi turut mengaku dirinya sebagai Tuhan. Seorang manusia yang kufur kepada Allah kerana memiliki kuasa dan kekayaan!

Jika Mahathir peka, beliau kena tahu dan faham juga kenapa gelaran itu diberikan kepadanya? Beliau kena fikir dan mengerti kenapa rakyat Malaysia tergamak menyamakan beliau dengan Firaun. Walhal masih ada banyak lagi tokoh-tokoh yang jahat dan jijik didunia yang boleh disamakan dengan Mahathir, seperti Hitler,

Mosollini, Marcos dan lain-lain, tetapi kenapa harus memilih Firaun? Perkara ini sepatutnya Dr. Mahathir merenung sedalam mungkin.

Malah kalau diikuti pada bahasa dan gelaran itu, beliau lebih hebat daripada Firaun sendiri kerana disebut Mahafiraun. "Maha" ertinya satu sifat, kebesaran yang tidak ada tolak tandingnya. Perkataan Maha hanya dikhaskan dan milik Allah SWT sahaja, bukan manusia. Maha adalah pradiket untuk Tuhan (Allah).

Sesuatu yang perlu disedari dan diketahui, orang tidak akan mencampak sesuatu panggilan begitu sahaja tanpa ada sebarang sebab. Bukan mudah untuk orang memburuk mana-mana tokoh apa lagi pemimpin jika tidak ada sebab-sebab yang jelas dan konkret. Apa lagi dalam konteks orang Melayu yang beragama Islam tidak mudah untuk mengeji seseorang. Sementara di dalam Islam sendiri menggalakkan umatnya agar menamakan anak-anak mereka dengan nama yang baik-baik kerana nama adalah doa. Nama seseorang itu akan mempengaruhi psikologinya.

Kenapa orang tergamak menggelarkan Mahathir sebagai Firaun tentu ada sebab-sebab dan hujah-hujahnya. Ada alasan tertentu maka orang tegal melemparkan gelaran itu. Tentu ada sejarah dan lagenda tersendiri.

Misalnya orang tidak akan menggelarkan Datuk Paduka Ibrahim Ali sebagai sang katak atau sang kodok suka-suka sahaja. Adalah mengaibkan manusia digelarkan dengan nama haiwan berkaki empat. Tetapi kenapa beliau dipanggil katak, tentu ada sejarahnya tersendiri. Ada peristiwa atau kejadian yang boleh menyebabkan orang mengaitkan dirinya dengan sang katak. Tentu ada sifat-sifat yang dimiliki oleh katak yang dipunyai oleh Ibrahim Ali.

Gelaran Ibrahim Katak adalah popular. Setiap kali orang

merujuk kepada Ibrahim, orang tidak akan teringat kepada jawatannya sebagai Timbalan Menteri di JPM, tetapi orang akan teringat kepada rupa paras katak. Katak puru. Lantaran itu apabila Ibrahim bersyarah orang akan melaung-laungkan nama katak. Dan ada juga yang pandai membunyikan suara katak, akan membunyikan suara katak. Begitulah intimnya Ibrahim dengan katak.

Sewaktu berceramah di Shah Alam baru-baru ini, ada orang melaungkan katak.... katak, sambil membunyikan suara katak, *oukkk.....oukkk... wek...wek* dan sebagainya ketika Ibrahim sedang menyampaikan ucapan. Sampai naik radang Ibrahim Ali dan menyumpah balik kepada mereka yang melaungkan dan membunyikan suara katak sebagai anjing dan babi. Rupanya Ibrahim Ali kurang senang juga dengan panggilan katak itu. Tapi dalam satu kenyataan akhbar di Langkawi Ibrahim meminta agar beliau digelar Putera Katak! Nampaknya Ibrahim sendiri ikhtiraf dengan panggilan itu tetapi dengan status lebih mulia sebagai 'putera'.

Kenapa Ibrahim dinamakan katak ialah kerana sifatnya di dalam politik suka melompat parti. Kalau katak melompat parit untuk mengejar makanan; ungas, lipas, lipan, ular, cicak, tikus dan mengkarung, tetapi Ibrahim melompat parti untuk mencari sejempur makanan, mendapat sisa-sisa projek didalam kerajaan Barisan Nasional.

Mula-mula Ibrahim menyertai Berjasa untuk menganyang kerajaan PAS di Kelantan. Selepas kecewa dengan Berjasa beliau melompat ke dalam "parit" bernama Umno. Selepas berada dalam "parit" Umno dan ketika itu tidak banyak makanan yang dapat dingapnya beliau 'merukah' (panjat) tebing dan masuk ke dalam lopak Semangat 46 - kubang baru yang dicipta oleh Tengku Razaleigh Hamzah.

Maka Ibrahim mencarilah makanan beberapa ketika bersama Tengku Razaleigh. Segala belalang, lipas, kelkutu, cicak, mengkarung, mukus yang berada di dalam longkang Semangat 46 itu dibahamnya. Selepas lopak kecil yang berselut dan hanyir itu tidak menjamin makanan, dan mangsa pun kecil dan kurus, dan tidak menjamin masa depan perutnya, Ibrahim melompat ke dalam "longkang" Umno semula, menjilat kembali ludahnya berserta menjilat buntut kerepot Dr. Mahathir.

Di dalam Umno kali ini nampaknya beliau kenyang dan lumayan. Walaupun apa yang Ibrahim Ali dapat adalah sisa dari Daim, dan kronis-kronis Mahathir tetapi orang yang pelahap macam Ibrahim sedia mengambil apa sahaja bekas orang untuk mengisi perut bodohnya. Tidak dapat isi dapat kulit yang berlumuran najis dan kahak pun Ibrahim sanggup menelannya untuk mengisi perutnya.

Ibrahim seorang yang tidak mempunyai pendirian yang tetap dan konsisten di dalam parti. Beliau akan melompat dan melompat mengejar kedudukan dan kebendaan. Sepertilah katak yang melompat dan melompat untuk mendapatkan makanan. Dan bila sudah mendapat makanan, ia akan berhenti sekejap, sementara menunggu untuk melompat lagi.... Kita percaya jika parti alternatif berjaya membentuk kerajaan, Ibrahim akan melompat pula ke dalam parti alternatif.

Demi *survival* perutnya juga beliau sanggup mengampu sesiapa sahaja yang dapat melemparkan seekor dua bangkai kepadanya. Akan disambar dan dikunyah tanpa mengira apakah bangkai itu adalah anggota tubuh badan kawan dan sahabatnya sendiri. Hakikat ini terbukti bila mana beliau sanggup mengkhianati sahabat setahanannya sendiri - Anwar Ibrahim. *That is Ibrahim Ali*. Mungkin kita boleh menghormati idealisme perjuangan Ibrahim yang teguh memperjuangkan nasib orang miskin, tetapi kita amat nihil untuk menerima moral politiknya.

Kembali kepada Dr. Mahathir, kita tahu Dr. Mahathir berkecil hati dengan gelaran itu. Dan kita sebagai rakyat Malaysia juga merasakan tidak patut Mahathir diperhinakan begitu rupa sekali. Kita simpati dengan Dr. Mahathir. Orang sepertinya tidak seharusnya disamakan dengan Firaun. Sekali kita menamakan seseorang dengan sesuatu nama, waima baik atau buruk ia akan lekat dan disebut sampai ke mati.

Bila-bila pun Mahathir akan dikenang sebagai Firaun dalam sejarah pemerintahan dan pola politik Malaysia. Generasi akan datang akan terus membuka sejarah dan bercerita tentang perilaku Dr. Mahathir. Di samping generasi akan datang mengingatkan Mahathir sebagai tokoh hebat, Bapa Pemodenan Malaysia, tetapi generasi juga akan ingat Mahathir sebagai Perdana Menteri yang khianat! Sudah tentu anak-anak dan saudara mara Anwar Ibrahim yang menjadi mangsa kerakusan (konspirasi) politik Mahathir tidak akan memaafinya. Setiap kali mereka terdengar nama Mahathir dan terpandang gambarnya, setiap kali itu jiwa mereka akan luluh dan hancur. Mereka akan hiba, marah dan berdendam.

Yang malangnya dendam cucu cicit Anwar itu tidak akan berhenti di situ sahaja ia akan terus diingat dan dikenang oleh cucu cicit seterusnya. Selagi nama Mahathir disebut, nama anak-anak dan sejarah politiknya disebut, maka selama itulah juga dendam itu akan membara di dalam jiwanya. Prejudis cucu cicit Anwar terhadap cucu cicit Mahathir seperti tanggapan cucu cicit orang-orang Melayu yang menjadi mangsa kekejaman tentera Jepun di Perang Dunia kedua dulu. Persengketaan itu tidak dapat dielakkan, bukan saja di sebelah Anwar tetapi disebelah Mahathir juga. Justeru Mahathir kena memandang jauh ke hadapan melihat perasaan generasinya untuk 100 tahun akan datang. Beliau harus bayangkan apakah generasi Anwar akan kata ke atas generasinya.

Sesungguhnya kita juga kurang senang dengan gelaran Mahafiraun

itu. Tetapi kita kena terima hakikat kenapa ia sampai dinamakan begitu. Dr. Mahathir harus tahu kenapa orang tergamac menama-kan beliau begitu. Sebelum ini tidak pernah timbul nama-nama busuk begitu. Misalnya orang tidak pernah menyamakan Dr. Mahathir sebagai kepala tahik. Tetapi kenapa tiba-tiba sahaja di akhir abad ini nama-nama dan analogi buruk, hanyir dan hampak itu timbul?

Tentu ada sebab dan musababnya. Dan kita percaya Dr. Mahathir tahu dan faham kenapa nama-nama itu dilemparkan kepadanya. Kalau tidak masakan beliau sanggup untuk mengakui Mahafiraun itu adalah beliau? Tentu ada sebab yang mendesak sehingga terlahirnya novel *Shit*. Sekiranya Mahathir bertindak benar terhadap tindakan politiknya akhir-akhir ini, tetapi rakyat tidak dapat menerimanya, itu merupakan kesalahan Dr. Mahathir sendiri. Beliau gagal untuk menyakinkan rakyat dengan kebenaran diatas tindakannya itu. Kesimpulannya Dr. Mahathir tidak merupakan seorang ahli politik yang bijak kerana gagal mempengaruhi rakyat dengan tindak tanduk serta strateginya.

Begitu pun masih ada jalan dan peluang untuk Dr. Mahathir membersihkan dirinya, menghakiskan konotasi jelek itu kepadanya. Walaupun masanya sudah semput tetapi Mahathir masih mempunyai sisa-sisa waktu lagi. Meskipun matahari sudah berada di sebelah Selatan, tetapi matahari belum naik di belah Timur lagi. Masih ada kesempatan untuk Dr. Mahathir membersihkan nama dan imejnya. Mahathir masih mempunyai sisa kekuasaan dan kedudukan dia boleh guna kelebihan itu.

Kita tahu orang membenci beliau ialah kerana pemikiran dan tindakan politiknya. Kemuncak kepada kebencian orang ialah apabila beliau menganiaya Anwar Ibrahim. Itulah puncanya. Jadi cara paling baik ialah, Mahathir harus minta maaf dengan orang yang beliau perlakukan secara tidak patut atau ala Firaun. Beliau kena berpatah balik ke belakang. Beliau kena pohon maaf kepada

semua orang yang beliau khianati. Beliau kena minta maaf di atas keterlanjurannya menghina bangsa Melayu. Beliau kena minta maaf di atas kebiadabannya menghina Rasulullah. Beliau kena minta maaf di atas ketidakadilannya membahagikan kekayaan negara kepada rakyat.

Dan beliau kena minta maaf kepada Anwar dan seluruh keluarganya. Selepas beliau berbuat begitu, Mahathir hendaklah bertaubat dan memohon kepada Allah. Kerana Allahlah yang berhak memberi keampunan dan penghukuman kerana Dia adalah Hakim Rabul Jalil.

Kita percaya jika beliau berbuat demikian segala marah itu tidak akan berterusan. Api yang panas jika disiram air ia akan reda dan mati juga. Begitu dengan perasaan marah dan dendam seseorang. Sedangkan nabi ampunkan ummat inikah pula kita selaku manusia biasa. Saya percaya keluarga Anwar bersedia memaafi Dr. Mahathir. Kalau Tan Sri Rahim Noor yang telah melebamkan matanya dimaafkan, inikah pula Dr. Mahathir orang yang pernah menjulangnya ke menara persada politik.

Sekiranya Mahathir sanggup merendahkan dirinya, kita yakin orang akan dapat menerima Dr. Mahathir. Orang akan puji Dr. Mahathir. Untuk lebih nostalgik lagi selepas beliau memohon maaf dan bertaubat nasuha, maka dengan segala hormatnya beliau hendaklah berundur dari menjadi Perdana Menteri.

Sebenarnya bukan semua orang mengakui keperibadian dan kebaikan Anwar, tidak. Saya sendiri tidak terpesona dengan keperibadian Anwar. Tetapi kenapa orang marah kepada Mahathir dan simpati kepada Anwar ialah kerana kesadisan tindakan Mahathir ke atas Anwar. Saya tetap mengatakan Anwar adalah sama dengan manusia lain. Sama dengan Mahathir, sama dengan Nik Aziz. Beliau juga lemah dan mempunyai banyak kesilapan.

Kesilapan dan kecacatan moral seseorang adalah sesuatu yang amat peribadi.

Isitmewanya Anwar ialah kerana beliau sanggup berhadapan dengan orang berani dan bijak seperti Mahathir. Beliau tidak sanggup terus menjadi kuda kayu Dr. Mahathir. Beliau tidak rela dan sanggup bersekongkol dengan Dr. Mahathir kerana semata-mata gilakan jawatan Perdana Menteri. Sekiranya Anwar sanggup mengkhianati bangsanya, menurut kehendak dan kemahuan Dr. Mahathir tentulah jawatan PM menjadi miliknya. Tetapi Anwar tidak sesekali menggadaikan maruah dan prinsipnya semata-mata kerana pangkat dan kedudukan.

Saya percaya sekiranya Dr. Mahathir sanggup berbuat demikian, segala kesalahan beliau akan dimaafi. Segala rasa dendam yang menyenlinap ke dalam setiap urat nadi rakyat Malaysia akan hilang. Segala rasa cemuh, muak akan berlalu begitu sahaja. Dan tidak mustahil juga selepas ini orang akan menghormati Dr. Mahathir seagung-agungnya, seagung kecanggihan idea dan iltizamnya untuk membangun Malaysia. Bagaimana pun kejam, dendam dan marah seseorang itu, tetapi apabila orang datang memo-hon maaf kepadanya, ia akan lembut dan akhirnya mengalah juga.

Hati manusia dibentuk oleh dua unsur. Satu logam, satu lagi air. Justeru ia bisa keras sekerasnya dan ia bisa cair secair-cairnya. Bagaimana pun jika tidak kena cara hati boleh menjadi lebih keras daripada batu. Tetapi kalau kena cara ia boleh menjadi lebih lembut daripada bayu.

Soalnya sanggupkah Dr. Mahathir untuk berbuat demikian? Bukan mudah untuk kita menerima pengakuan ikhlas dari seorang yang telah melepaskan najis di tengah jalan. Ego, kesombongan, rasa malu menutup segala-galanya. Tidak mungkin! Tidak mungkin Dr. Mahathir akan berbuat demikian. Beliau nampaknya

lebih rela akan meninggalkan jawatan dengan tragedi hitam dan pandangan buruk rakyat. Sayangnya Dr. Mahathir beliau telah berjaya mencipta sekuntum bunga yang wangi, kemudian beliau juga yang menyiramkan air najis di kelopak bunga berkenaan.

Jika Dr. Mahathir tidak bersedia untuk berbuat begitu, jangan beliau mengharapkan pusaranya akan disirami kemboja oleh generasi akan datang. Bukan itu saja, bahkan tidak mustahil akan ada mereka yang sanggup kencing dan menabur najis di atas batu nisaninya.

Perlu ditegaskan buku ini adalah mungkin buku terakhir saya untuk abad ke 20 dan mungkin juga yang akhir memperkatakan mengenai Dr. Mahathir Mohamad. Selepas ini saya tidak bercadang untuk menulis mengenai Dr. Mahathir lagi kecuali beliau telah bersara dari politik dan tidak lagi menjadi Perdana Menteri Malaysia.

Akhirnya seperti biasa saya mengucapkan terima kasih tidak terhingga kepada pembaca, khususnya kepada yang sudi menghubungi saya menerusi telefon dan *e-mail* - memberi pandangan dan teguran dalam usaha saya meninggikan mutu penulisan.

Di kesempatan ini juga saya memohon maaf kepada Dr. Siddiq Fadzil kerana memetik kertas kerjanya tanpa terlebih dahulu maklumkan kepadanya. Terima kasih juga kepada HIO!

Salam hormat dan selamat membaca!

**MÖHD SAYUTI OMAR**  
**[sayuti@pd.jaring.my](mailto:sayuti@pd.jaring.my)**  
*Wangsa Melati, Kuala Lumpur.*  
*3 Ogos 1999.*

# 46 TAK MAHU SERI PERDANA

KUALA LUMPUR: Parti Semangat 46 tidak akan menggunakan Seri Perdana sebagai kadiaman Perdana Menterinya sekiranya parti itu berjaya memerintah kerajaan yang akan menggunakan kediaman Tengku Razaleigh di Jalan Langkap Goff sebagai kadiaman rasmii.

Kesus Penunde Semangat 46, Hajji Ibrahim Ali membuat pengakuan ini sekaligus memberi beberapa sebab mengapa Tengku Razaleigh tidak bermindat tinggal di Seri Perdana.

"Permananya, kita tidak mahu berkongsi dengan apa yang telah dilakuakan oleh Dr. Mahathir terhadap rakyat Malaysia. Apa yang nyata Seri Perdana masih dibina dengan dilasan air mata rakyat.

Tengku Razaleigh akan menggunakan rumahnya sendiri di Langkap Goff dan tidak akan mengusik harta benda rakyat sekeras mana yang telah dilakuakan oleh UMNO pimpinan Dr. Mahathir Mohamad tertulis.

Hajji Ibrahim Ali mengakui bertimbuhan sukar mendapatkan keberharuan bagi mengangkat tembus-tembus keretamu untuk keringgudan majlis arwah parti Semangat 46 kerana halangan dari UMNO.



HAJI IBRAHIM ALI

"Tapi setiap pilihanraya umum kita akan dapat menggunakan bangunan PNTC dan tempat-tempat lain dengan bebas," katanya.

Hajji Ibrahim yang juga ahli Parlimen Pagoh Mas mengakui Penasihat Agung Parti Ibu, Tun Dr Abdul Rahman Putra sebagai pendorong kuat kepada Angkatan Per-

duan Ummah (APU) dan jasa beliau menjadikan katangan pemimpin pentadbiran 46 bersambutan yakin dan setar dengan semangat ingin berjeja.

Tunku juga adalah tokoh negara yang dicemuh kerana berusaha mengembangkan demokrasi yang telah terhukis akibat tindakan pemimpin yang gila piagam dan seruduk kan."

Kerane itu kita berdoa semoga Tunku dipanjangkan umur untuk melihat apa yang akan berlaku selepas pilihanraya umum akan datang," katanya.

Hajji Ibrahim juga membela sikap kalangan Penunde UMNO yang hanya mahu menganggu kira apa yang dikatakan oleh pemimpin mereka.

"Inilah sikap Penunde UMNO. Menganggu kira apa sahaja dalam perkhidmatan diketahui itu adalah satu kemalangan yang jelas," katanya.

Sebaliknya dengan itu Hajji Ibrahim mengaku BN akan turut juga dalam pilihanraya umum akan datang. "BN akan lama menghadapi APU dan rakyat akan memperaih manfaat di atas apa yang mereka sku kau," ujarnya.

**Keratan akbar tahun 1990, Putera Katak (Ibrahim Ali) telah mengkritik Datuk Seri Dr Mahathir Mohamad kerana membina Seri Perdana dengan airmata rakyat. Tetapi hari ini kenapa Putera Katak diam membisu apabila Dr. Mahathir membina mahligai jauh lebih mahal dari Sri Perdana? Siapakah yang munafik sebenarnya?**

# **GILA SEORANG PRESIDEN**

**1**

**B**ELUM pernah berlaku dalam sejarah Umno selama 54 tahun, ketua atau Presidenya menggunakan perhimpunan agung tahunan untuk membebel, menyanyah dan menyebarkan fitnah ke atas orang lain secara berleluasa. Baik di zaman Dato' Onn Jaafar, Tunku Abdul Rahman, maupun Tun Razak Hussein dan Tun Hussein Onn belum pernah berlaku keadaan demikian. Mereka tidak pernah menggunakan perhimpunan agung untuk membebel dan mencarut orang-orang tertentu. Mereka tidak menjadikan perhimpunan sebagai forum peribadi mereka.

Tidak terjumpa dalam buku-buku sejarah Umno, Tunku Abdul Rahman semasa berucap membentangkan ucapan dasarnya menggodam habis-habisan musuhnya. Menggunakan peluang istimewa itu untuk mendedahkan keaiban orang lain. Tunku tidak pernah menggunakan forum tahunan Umno itu untuk mengkritik mana-mana musuhnya. Tunku tidak pernah menghentam atau menyindir sesiapa termasuk Dr. Mahathir Mohamad yang ketika itu menjalankan kempen anti Tunku.

Biarpun Tunku sakit hati dengan surat layang yang disebarluaskan

oleh Mahathir, mendesaknya meletakkan jawatan, menuduh Tunku tidak prihatin kepada nasib bangsa Melayu, tetapi Tunku hanya setakat bertindak menyingkirkan Mahathir. Tunku tidak sesekali cuba mendedahkan perangai Mahathir dalam perhimpunan Umno. Tunku tidak menyalahgunakan kuasanya demi mempertahankan kekuasaanya. Tunku tidak sesekali cuba memalukan Dr. Mahathir di hadapan khalayak ramai. Walaupun Tunku dicemuh dan dimalukan oleh Dr. Mahathir, tapi Tunku memelihara maruah Mahathir.

Juga tidak ada dalam coretan sejarah Umno, Tun Razak ketika membentangkan ucapan dasarnya semasa menjadi Presiden Umno menceritakan soal-soal rendah moral dan skandal orang lain. Walaupun ketika itu ada tokoh yang tidak sehaluan dan sebulu dengannya, tetapi Tun Razak tidak menggunakan *platform* Umno untuk mengaibkan sesejapa. Tun Razak tidak bacul menggunakan kesempatan semasa bermesyuarat untuk melemahkan musuhnya. Tun Razak sesekali tidak memukul musuhnya ketika kedua belah tangan dan kaki musuh terikat kemas di belakang. Tidak!

Pun begitu juga semasa Hussein Onn menjadi Presiden Umno. Selemah-lemah dan selembek-lembek Hussein, beliau tidak sesekali menceritakan soal-soal menyentuh maruah dan peribadi seseorang dalam perhimpunan agung Umno. Beliau tidak sesekali menyalah gunakan kuasa dan kedudukannya untuk menembak musuh politiknya dalam Umno.

Bukan Hussein tidak ada musuh, ada... Tan Sri Ghazali Shafei, Sulaiman Palastin dan Dato' Harun Idris adalah musuhnya, tetapi Hussein Onn tidak memburukkan Ghazali, Harun dan Sulaiman di dalam perhimpunan Umno. Hussein sesekali tidak cuba menafikan hak dan kewajiban mereka bertiga di dalam parti. Hussein sama sekali tidak menjadikan forum Umno untuk menindas musuhnya. Hussein tidak memecatkan mereka dari

Umno kerana hendak menyelamatkan diri. Hussein Onn tidak menelanjangkan kemaluan musuhnya di hadapan umum. Tidak!

Sebaliknya mereka menggunakan forum itu untuk membentang dasar-dasar parti, mengemukakan perubahan-perubahan yang bakal dilaksanakan dan lain-lain demi agama bangsa dan negara. Membentangkan idealisme mereka untuk dibahaskan oleh para perwakilan. Dan jika mereka mahu melawan musuh, mereka tidak gunakan Umno dan ahli-ahlinya untuk menentang musuh peribadi mereka. Mereka hadapi serangan musuh politiknya secara "jantan" dan *gentleman*.

Begitulah wibawa Presiden-Presiden Umno sebelum ini. Mereka menghormati perhimpunan agung Umno dan menggunakan benar-benar untuk kemajuan dan pembangunan parti. Mereka sama sekali tidak menyalahgunakan forum itu untuk kepentingan peribadi dan untuk mengebalkan kekuasaan mereka. Tidak! Mereka tidak sesekali menggunakan perhimpunan untuk mengugat dan mengasuk ahli agar terus bersengkokol dengan kemungkaran dan kedurjanaan mereka. Tidak!

Tetapi kesucian perhimpunan agung Umno itu nampak tercalar dan ternoda di akhir abad ke 20 ini, bila mana Dr. Mahathir telah mencoretkan sesuatu peristiwa yang sungguh memalukan Umno. Beliau telah melakukan apa yang Presiden lain tidak lakukan. Dr. Mahathir telah memulakan sesuatu yang jijik dalam perhimpunan agung Umno. Dr. Mahathir telah meliwat kesucian perhimpunan agung untuk mensejahterakan kuasa politiknya. Dr. Mahathir telah merogol kemurnian perhimpunan agung Umno itu.

Dr. Mahathir telah merendahkan martabat perhimpunan agung tahunan itu, tak ubah seperti bangsal-bangsal kop (tea) yang berselerakan di jalan, di mana di situ bebas untuk membicarakan apa sahaja termasuk mencarut, melemparkan fitnah dan sebagainya. Perhimpunan tahun ini menjadi kelab sundal di mana

perbicaraannya penuh dengan bahan-bahan lucah dan bahasa yang *porno*.

Perhimpunan agung yang terakhir diabad ke 21 baru-baru ini benar rosak dan buruk sekali sifatnya. Dr. Mahathir telah merosakan imej perhimpunan agung Umno. Kekaguman orang kepada beliau sebelum ini punah ranah dengan apa yang dilakukan di dalam perhimpunan agung lepas. Perhimpunan agung itu adalah yang terburuk, terbusuk, terjijik dan termeloyakan sekali.

Mengapa tidak, Dr. Mahathir telah mengambil masa lebih 3/4 dalam ucapan dasar dan semasa menggulung perbahasan untuk menghentam Anwar. Mendedahkan keburukan Anwar. Memfitnahkan Anwar Ibrahim tanpa segan silu. Ramai pemerhati terkejut dengan telatah Dr. Mahathir pada hari itu. Beliau yang terkenal sebagai seorang pemimpin yang tinggi psikologi dan diplomasi telah mengambil masa begitu panjang untuk melanyak Anwar. Mahathir telah menggunakan kedudukan dan kuasanya bagi menghentam Anwar Ibrahim. Beliau telah mengambil kesempatan di perhimpunan itu untuk melepaskan segala kahak dan muntah dendamnya kepada Anwar Ibrahim.

Di dalam perhimpunan itu beliau telah menceritakan sesuatu yang tidak ada kena mengena dengan dasar dan prinsip perjuangan Umno. Sebaliknya beliau berbicara soal bagaimana hendak memastikan dia terus menjadi Perdana Menteri sampai ke mati. Beliau mendedahkan sejelas-jelas mengenai dakwaan perbuatan buruk Anwar. Dari soal menjadi boneka kuasa asing sampailah kepada soal berzina dengan isteri orang. Cara Dr. Mahathir memburukkan Anwar sungguh keji dan "celaka" sekali jika diukur dengan kedudukannya sebagai Presiden. Tidak sangka kata-kata kesat, maki hamun dan sumpah seranah itu terkelaur dari pemimpin agung Malaysia!

Saya tidak tergamak untuk memetik kata-kata Dr. Mahathir di

sini kerana memikirkannya tidak wajar kerana ianya terlalu jijik dan kotor. Biarlah kata-kata itu tersumbat di dalam telinga sesetengah para perwakilan Umno sahaja. Saya tidak mahu turut berdosa dengan menulis balik apa yang telah Mahathir lempar dan tuduhkan kepada Anwar. Menulis carutan Dr. Mahathir samalah memalitkan dosa kering ke tubuh.

Sungguh memalukan. Seorang pemimpin yang mengakui mempunyai daya intelektual yang tinggi, moral yang tinggi (moralis), tiba-tiba sanggup membuka mulut menceritakan perkara-perkara yang masih belum dibuktikan samada si dituduh buat ataupun tidak. Sungguh menghairankan bagaimana Dr. Mahathir boleh hilang kewarasan di perhimpunan agung berkenaan. Sungguh menghairankan....

Sesiapa yang mengikut ucapan dasar dan penggulung Dr. Mahathir tempoh hari akan bertanya, dimanakah kebijaksanaan Mahathir selama ini. Orang akan jadi bingung dengan telatah Mahathir. Beliau tidak sepatutnya menyebut sesuatu yang masih dalam keadaan tanda tanya (sedang dibicarakan). Apakah beliau buta undang-undang? Bukankah sesuatu yang masih di dalam perbicaraan di mahkamah tidak boleh mempertikai dan mengulaskannya. Tidakkah perbuatan demikian menyebabkan seseorang boleh ditututan telah melakukan sesuatu yang *contempt of court and sub-judis*.

Sebab itulah peguam Anwar, Karpal Singh telah meminta mahkamah memanjarakan Mahathir kerana menghina mahkamah. Tetapi sayang permohonan Karpal itu tidak dihiraukan oleh sesiapa. Dr. Mahathir pula dengan kuasa yang ada kepadanya sekali lagi berdolak dalih mengatakan beliau tidak menghina mahkamah kerana kerana apa-apa yang beliau ceritakan tidak ada kena mengena dengan apa yang sedang dibicarakan di mahkamah!

Kita tahu maksud Dr. Mahathir, beliau bertindak begitu kerana

hendak menjelaskan kepada ahli Umno. Beliau muah mengembalikan semangat ahli Umno yang sudah rosak akibat tindakan memecat dan mengaibkan Anwar. Beliau muah memberi keyakinan kepada ahli setelah mereka *confuse* terhadap tindakan Mahathir ke atas bekas TPM itu.

Mahathiur sangat sedar perkara ini. Jika beliau yakin ahli Umno semuanya berpihak kepadanya, tentu beliau tidak akan mengungkit lagi kisah Anwar. Beliau sendiri sebelum ini yakin isu Anwar hanya akan dibangkit dan disebut oleh umum dalam masa 40 hari sahaja. Lepas itu ia akan hilang dengan sendiri. Tetapi ternyata kes Anwar luar biasa dari lain-lain kes, Mahathir tidak dapat menghapusnya dalam tempoh sekelip mata, malahan ia akan berlanjutan sehingga Mahathir tidak berundur.

Justeru beliau mengambil peluang keemasan itu untuk menegakkan benang basah dan cuba menyakinkan ahli yang sudah longgar ikatan sokongan kepadanya. Menyucuk jarum agar ahli Umno membenci Anwar dan mencintainya. Itulah tujuan Mahathir.

Tetapi cara beliau menghentam itu adalah tidak relevan sama sekali. Tidak bijaksana. Telatah Dr. Mahathir tempoh hari seolah beliau telah mencemarkan dirinya sendiri dan merendahkan martabat (kedudukannya) sebagai wira dunia ketiga yang diterima dari kebanyakan negara sedang membangun. Apa yang beliau lakukan itu telah merosakkan wibawanya sendiri. Orang telah hilang *respect* kepadanya. Barang kali begitulah hukum karma Tuhan ke atas manusia yang lalai dan tamak (takabul) apa yang diperlakukan semuanya tidak kenal.

Tindakan Dr. Mahathir tempoh hari menyebabkan ramai orang yang tersimak. Orang mula membuat penilaian semula kepada Mahathir. Orang terpaksa membuka fail baru tentang Mahathir. Kerana telatah itu sangat ganjil dan pelek sekali. Belum pernah berlaku di dalam sejarah. Lantaran itu jugalah menyebabkan kita

terpaksa mengkaji semula akan kedudukan dan kewarasan fikiran Mahathir. Kita terpaksa menguji semula minda Mahathir apakah betul ataupun sudah senget?

Pada saya pemikiran Dr. Mahathir sudah banyak yang rosak. Sudah banyak saraf-saraf otaknya yang tercedera ataupun terputus. Maka itulah menyebabkan beliau jadi melatah demikian rupa. Jika beliau sihat dan waras, tentu beliau tidak akan berlaku demikian. Selama ini Dr. Mahathir tidak pernah merapu seperti di perhimpunan agung berkenaan.

Ucapan dan bebelan yang Dr. Mahathir lapazkan hari itu hanya layak dilapazkan oleh orang-orang seperti Ibrahim Ali, Hishamuddin Hussein dan Sanusi Junid. Bukan taraf orang seperti Dr. Mahathir untuk bercakap dan merapu sedemikian rupa. Bukankah Dr. Mahathir telah menjadi Presiden selama 17 tahun. Tidak sepatutnya lagi beliau merepek merabah seperti itu. Dr. Mahathir sepatutnya makin lama menjadi makin matang dan berkualiti.

Dari situ juga orang sudah dapat mengagak bagaimana kedudukan Mahathir sebenarnya. Kenapa beliau sampai melalut demikian rupa. Padahal beliau tidak wajar lagi membicarakan soal Anwar, selepas bekas TPM itu dipenjarakan? Bukankah semua menteri telah berpuas hati dengan penjelasannya. Bukankah semua rakyat sudah mempercayai apa yang di ceritakan oleh Khalid Jafri. Bukankah budak-budak sekolah sudah berpuas hati dengan apa yang diceritakan oleh Ummi Hafilda? Bukankah rakyat sudah menyaksi sendiri tilam dan bantal yang diusung ke mahkamah.

Sebaliknya apabila terus-terusan membela Anwar itu menunjukkan bahawa Mahathir tidak yakin dengan penjara enam tahun itu boleh menguburkan karier politik Anwar. Beliau boleh dianggap mula dikejari oleh bayang-bayang beliau sendiri. Beliau begitu takut kepada hantu atau "kwong" Anwar.

Telatah Mahathir itu menunjukkan sikapnya yang buruk. Begitulah kalau orang sudah tidak yakin kepada dirinya sendiri. Orang ramai pula boleh membuat telahan bahawa Mahathir telah tersilap strategi di dalam menghadapi kes Anwar.

Apakah sebenarnya yang menghantui Mahathir? Jawabnya tidak lain dan tidak bukan, gerakan reformasi yang dicetus itu telah mula menular. Perkembangan inilah yang sangat menakutkan Dr. Mahathir, menyebabkan dia merasai beliau dikeliling oleh para bobot, jembalang, hantu, pucung, hantu raya dan toyol. Hasil daripada tindakan yang tidak benar dan tepat menjadikan beliau gelisah.

Bayangan kekalahan sedang mengejar beliau dari belakang. Dr. Mahathir dapat mengagakkan nyawanya akan tercabut dalam pilihanraya akan datang nanti. Mungkin justeru itulah maka beliau menjadi kacau seperti orang yang sedang dirasuk hantu memburukkan Anwar dan parti-parti alternatif.

Kekejamannya kepada Anwar, kesalahannya kepada bangsa Melayu, penghinaan kepada golongan ulamak menyebabkan beliau gelisah. Beliau resah. Padangannya senantiasa gelap. Jiwanya senantiasa berdebar.


Keadaan Dr. Mahathir hari ini tak ubah seperti orang sakit. Beliau sudah kehilangan arah dan tujuan. Beliau tidak dapat membuat pertimbangan dengan baik lagi. Masalah, penyelewengan yang beliau lakukan telah menghantui beliau. Kerana terlalu banyak itulah menyebabkan beliau kelihatan begitu jauh tersasar dan menjadi sasau. Pun begitu ada baiknya juga, setidak-tidaknya rakyat Malaysia dapat mengetahui akan kegilaan seorang Presiden yang kononnya telah diiktiraf oleh dunia!

Bertolak dari keadaan itulah Dr. Mahathir perlu dinilai semula. Dan segala gelaran yang pernah dinobatkan ke atasnya patut ditarik

balik. Sesungguhnya kita tidak mahu berketuakan kepada seseorang yang tidak normal dan waras akalnya terutamanya dalam hal-hal bersangkutan dengan agama.



*Dr. Mahathir berpelukan dengan Putera Katak selepas berjaya menjatuhkan Anwar Ibrahim. Perlantikan Ibrahim sebagai timbalan menteri mungkin sebagai upah kerana kesanggupan beliau menjilat buntut Dr. Mahathir. Bagaimana pun keseronokan itu sementara saja, insyAllah ia akan berakhir selepas September ini.*



*Inilah gambar Mahathir yang digambarkan sebagai Firaun oleh mereka yang membencinya. Gambar ini menjadi mashead kepada sebuah laman web di dalam internet. Secara tidak sengaja Dr. Mahathir telah mengakui dirinya "adalah Maha Firaun". (BH 20 Julai 1999).*

# **MAHATHIR NYANYUK ATAU GILA?**

**2**

**B**ARANG kali kata-kata saya ini terlalu berat dan menyakitkan. Lebih berat dan pedih daripada perkataan shit. Ataupun kata-kata saya ini lebih biadap daripada itu. Kalau shit sudah dianggap sebagai mencarut dan meloyakan, kata-kata yang bakal saya luahkan ini lebih lagi kemencarutannya. Lebih lagi meloyakan dan mengejutkan.

Apa yang saya katakan ini satu perkataan yang *libel* (mengikut undang-undang) dan boleh menyebabkan saya akan disaman. Mungkin saya akan dituduh sebagai penulis yang tidak pandai menggunakan bahasa dan tidak menghormati pemimpin. Tentu saya akan dimaki hamun. Pemuda-pemuda Umno akan membela saya. Dan Ibrahim Ali, ketua pengampu Mahathir merangkap Pengerusi Menangani Fitnah (dan membuat Fitnah) terpaksa bekerja keras untuk melakukan ugutan dan tekanan ke atas saya.

Tetapi saya mempunyai hujah untuk mengatakan demikian. Pada saya tidak salah kita mengatakan sesuatu yang betul. Kenapa Dr. Mahathir saja tersasar dengan gelaran dan tuduhan pada masa ini dan tidak orang lain? Kerana pemimpin lain masih belum termasuk dalam ketogori yang saya klasifikasikan ini. Ataupun pemimpin

lain masih belum layak menerima gelaran ini.

Berpandukan kepada bukti-bukti yang ada saya merasakan ia amatlah sesuai dan tepat sekali beliau digelarkan demikian. Saya bukan berkata mengikut sedap mulut, tetapi ada hujah-hujahnya. Kalau Mahathir berani menuduh Anwar berzina, liwat dan sebagainya hanya bersaksikan perempuan sundal, kata Anwar, saya juga ada saksi dan bukti dengan apa yang saya nyatakan ini.

Bukti dan saksi saya lagi bertanggungjawab kerana ia tidak terdiri daripada perempuan sundal yang diupah menjadi saksi. Saksi saya ialah mata kepala sendiri, akal fikiran sendiri! Pentafsiran saya sendiri. Apa yang saya dakwa boleh ditenguk dan difikirkan sendiri sejauh mana benar dan tidaknya. Bukan saya seorang sahaja, tetapi ramai rakyat Malaysia bersetuju dengan saya. Kalau tidak percaya silalah Dr. Mahathir adakan *reforandum* secara jujur.

Mahathir sudah sasau! Itulah yang hendak saya katakan. Mungkin agak terkejut juga kerana jarang orang mengatakan pemimpin sausau atau gila. Benarkah Mahathir gila? Kenapa saya berani berkata demikian? Atau ianya dilahirkan kerana benci dan dendam kepada Mahathir. Tidak ada untung dan ruginya bagi saya samada memuji atau mengeji Mahathir. Malahan mungkin menyebabkan saya dicemuh.

Saya mempunyai sebab-sebab untuk berkata demikian. Bukan senang untuk menuduh seseorang gila. Dalam Islam jika kita menuduh seseorang kafir, dan sekiranya dia tidak kafir, maka kekafiran itu akan kembali kepada kita. Adapun menuduh orang lain gila, kalau dia tidak gila, maka kegilaan itu tidak berbalik kepada kita, melainkan ia adalah silap tuduh sahaja!

Untuk mengatakan Dr. Mahathir sudah gila, ianya terbatas dalam tiga sudut atau pun bidang. Pertama dalam konteks pemikiran (kritik sosial), kedua dalam tindakan politik dan ketiga dalam pemahaman

agama. Adapun mental Dr. Mahathir tidak dapat disahkan oleh saya melainkan beliau secara suka rela pergi memeriksanya di hospital sakit jiwa kemudian *resultnya* di dedahkan kepada umum secara terperinci.

Sebenarnya yang beranggapan demikian bukan saja saya, tetapi masih ramai lagi. Ramai orang yang merasakan Dr. Mahathir sudah tidak betul. Tetapi sayang mereka tidak mempunyai kesempatan untuk mengucapnya dihadapan umum. Atau mereka tidak mempunyai keberanian untuk berbuat demikian. Atau lebih tepat mereka pengecut untuk menzahirkan apa yang bersarang di dalam hati mereka. Atau setengahnya pula membiarkan saja Dr. Mahathir gila secara bersendirian berhad kerana tidak mahu masuk campur.

Jika dibuka internet akan didapati berbagai cemuh dan cacian yang dilemparkan kepada Mahathir. Dalam banyak-banyak laman web reformasi satu pun tidak ada yang memuji dan menyanjungi Mahathir. Satu ketika dulu kerajaan Malaysia membuka laman web bernama; "Cintai Malaysia". Sekejap sahaja laman itu terpaksa ditutup kerana dipenuhi dengan maki hamun kepada Mahathir. Macam-macam sumpah serah dimasukkan ke dalam laman web berkenaan. Dari respond itu jelas menunjukkan 100 peratus mereka yang membuka *internet* ialah mereka yang bencikan Mahathir. Jadi janganlah melenting dengan persepsi yang saya buat itu.

Sama-sama kita menganalisis dan mengkaji sejauh manakah apa yang saya katakan ini benar. Saya bukan berkata sembarangan dan mengikut sedap mulut dan mengikut putaran lidah. Saya ada bukti dan hujah kenapa saya tergamak berkata demikian.

Saya tahu dan sedar bila saya telah menggilakan Dr. Mahathir atau menyanyukannya ramai orang marahkan saya. Para penyokongnya tentu melenting dan panas telinga mendengar perkataan ini. Mereka yang termakan budi Mahathir atau sama-sama gila tidak akan menerima. Mereka akan perakui juga

kehebatan dan keagungan Mahathir dengan apa cara sekali pun.

Bagaimana pun saya harap sabarlah dan tenanglah. Terimalah tuduhan saya ini dengan penuh keinsafan. Kalau orang orang boleh menerima penganiayaan, kezaliman dan kesadisan yang dilakukan ke atas Anwar, kenapa tidak dengan tuduhan ke atas Mahathir.

Betapa remuknya hati orang Anwar dan keluarganya apabila beliau dituduh sebagai peliwat, penzina dan pengkhianat. Tetapi mereka dapat melawani kemarahan itu dalam keadaan aman. Penyokong dan keluarga Anwar boleh bersabar. Mereka akur saja apa yang dilakukan ke atasnya. Jadi, saya harap orang Mahathir bertenang menerima tuduhan saya ini seperti mana orang Anwar menerima fitnah ke atas Anwar. Releks. Negara ini negara demokrasi kita bebas menyuarakan apa sahaja pandangan. Hak dan suara itu dijamin oleh perlumbangaan negara.

Jangan bila terkena atas batang hidung orang lain kita gelak dan melompat gembira, tetapi bila kena ke atas hidung sendiri kita melenting dan meradang. Cubalah belajar merasai perasaan orang lain. Kalau hati kita pedih dan senak apabila ada kata-kata lucu dan fitnah kepada pemimpin kita maka begitu jugalah panas dan pedihnya hati orang yang difitnah oleh orang yang kita sayangi itu.

Hanya mereka yang bertindak tanpa usul periksa sahaja akan melenting dan marahkan saya. Seperti pembaca novel satira *Shit* yang dangkal dan sentimennya kuat kepada Mahathir, marahkan Prof Datuk Emeritus Shahnon Ahmad. Tetapi jika diamati, dicari makna dan diukur kepada realiti, *Shit* adalah sebuah karya yang jujur yang lahir dari nurani seorang seniman yang tulih. Kita patut *salute* kepada idea dan kreativiti Shahnon dalam mengsasterakan pergolakan dan kekotoran politik tajaan Barisan Nasional. Pada saya Shahnon adalah seorang sasterawan rakyat, bukan sasterawan korporat ataupun sasterawan istana yang mengarang dan bercerita memuja istana dan memuji kaum kerabat istana untuk keseronokkan

anak-anak raja.

Adalah sangat wajar bagi Shahnon untuk menggambarkan sesuatu yang busuk dan buruk dengan analogi yang busuk dan buruk. Hilang ketinggian mutu estita sastera jika Shahnon menggambarkan yang busuk itu dengan wangian bunga-bunga dan sebagainya. Kita memang diajar mengatakan yang buruk itu sebagai buruk. Cuba bayangkan bagaimana kalau kita menganalogikan tahi itu dengan bunga melor, dan sebaliknya. Apa kata orang kalau kita katakan; "tahi yang kering itu sungguh wangi sewangi bunga melor kembang pagi." Tentu orang yang mengatakan demikian dianggap gila. Orang akan tuduh sastera Shahnon sudah tidak relevan lagi.

Maka pada saya apa yang Shahnon katakan itu adalah satu keadilan. Samalah juga dengan apa yang sedang saya hadapi kini, adalah tidak relevan kalau saya mengatakan Mahathir waras dengan apa yang telah dan sedang beliau lakukan sedangkan berpandukan kepada hujah dan bandingan yang akan saya sebutkan ini jelas beliau sudah pun begitu. Jika saya tidak mengatakan demikian maka saya pula akan dianggap sebagai penulis gila.

Saya harap pembaca sekalian dapat bersabar dulu jangan lekas mengatakan saya, dan bacalah apa yang hendak saya tuliskan ini sampai habis. Mudah-mudahan barulah anda semua akan dapat menemui di manakah letaknya kebenarannya. Barulah kita tidak tuduh bertahlid buta kepada sesuatu pegangan ataupun perjuangan. Guna akal bukannya akar!

Sebelum saya mengulas benarkah Mahathir gila, dan sejauh manakah kegilaannya, elok kalau kita sama-sama memahami apakah erti gila, maksud gila dan jenis-jenis gila yang selalu kita temui. Jika kita memahami perkara ini maka tidak timbulah kekeliruan dan juga tuduhan serong ke atas saya, misalnya sebagai hendak menjatuhkan imej Dr. Mahathir atau pun hendak mengatakan saya penulis biadab.

Menurut kamus Dewan, *gila bererti; tidak sihat atau tidak waras fikirannya (otaknya, ingatannya)*. Manakala nyanyuk; bererti, *berkelakuan seperti kanak-kanak (bukan orang tua) tidak berapa betul lagi (bukan fikiran orang tua)*.

Itulah pengertian gila dan nyanyuk yang diberikan oleh Kamus Dewan terbitan Dewan Bahasa dan Pustaka, Cetakan Kedua 1984 yang disusun oleh Dr. Teuku Iskandar terbitan Dewan Bahasa dan Pustaka (DBP) yang dibawah bidang kuasa Kementerian Pendidikan, dimana menterinya Najib bin Razak ketika ini.

Sebelum itu diingatkan gila dalam penulisan ini bukan bermakna sakit otak ataupun gila seperti mana fahaman umum. Bukan bermakna gila - berkelakuan seperti mana kebanyakan orang gila di jalanan yang berpakaian compang camping, merayau-rayau ataupun yang menyumpah-nyumpah tidak tentu pasal di tepi jalan. Tetapi maksud gila yang saya bahaskan ini ialah gila dalam tindakan politik, gila dalam memberi pandangan dan ulasan di dalam bidang agama dan gila kepada kuasa dan kedudukan. Gila di sini melampaui, keterlaluan dalam tindakan yang tidak difikir oleh umum. Itulah gila yang saya maksudkan. Konotasi gila dalam politik.

Manakala nyanyuk pula, bukan bermaksud Dr. Mahathir sudah tidak tahu dirinya lagi, lupa kepada dirinya sampai berak merata tempat, tidak pakai baju dan seluar. Tetapi nyanyuk dalam konteks telah lupa kepada apa yang diucapkan sebelum ini. Nyanyuk dengan kata-kata politiknya. Nyanyuk dalam tanggungjawabnya sebagai pemimpin berbangsa Melayu, sebagai pemimpin beragama Islam.

Jadi tuduhan gila ini terbatas kepada soal-soal tadi. Dan saya membuat penilaian ini pun terbatas kepada sempadan perkara-perkara tadi sahaja.

Untuk itu sama-sama kita tenguk dan memerhati kepada tindak

tanduknya dalam politik dan ulasan-ulasannya mengenai agama untuk memastikan apakah tuduhan saya ini benar. Pepatah ada mengatakan kalau kita hendak mengenali diri seseorang cuba kita tenguk kepada pakaian, tutur bicara dan perbuatannya. Kalau pakaianya berakhhlak dan tutur bicaranya sopan santun, tertib dan beradat maka jelas orang itu orang baik-baik. Jika mahu melihat apakah seseorang itu seorang mukmin, maka lihatlah kepada syariatnya. Adakah dia sembahyang, berpuasa dan sebagainya. Jika beliau tidak melakukan itu maka ternyata dia bukan seorang muslim yang baik.

Dalam Dr. Mahathir dianggap sebagai seorang pemimpin agung yang hebat, yang disanjung dan dipuja oleh kronisnya, sebenarnya realiti Mahathir kontras dengan keadaan sebenarnya. Ia bertentangan dengan normal-normal kehidupan, adat dan agama. Jika diamati, perbuatan, percakapan dan pemikiran Mahathir sudah jauh terpesong dari adat budaya Melayu dan syariat Islam.

Bukti pertama kenyataannya mengenai sunnah Rasulullah. Dr Mahathir pernah mengeluarkan pendapat mempertikaikan amalan menyimpan misai dan janggut. Beliau mempersendakan kenapa Nabi Muhammad menyimpan janggut ialah kerana di waktu itu tidak ada pisau cukur. Beliau menolak bahawa ada sebab dan hikmah tertentu kenapa Rasulullah menyimpan janggut. Walaupun kata-kata Mahathir tidak sampai tergelecahnya akidah tetapi ia cukup menghinakan umat Islam. Seolah-olah di zaman Nabi begitu kolot dan dhaif sangat sampai hendak cukup janggut pun tidak mampu.

Kata-kata Mahathir itu jelas memperlekehkan apa yang Rasulullah amalkan. Ia juga sebagai mempersendakan kemuliaan Rasulullah. Di manakah hak Dr. Mahathir hendak mempertikaikan amalan Rasulullah sedang baginda digezetkan sebagai manusia yang maksum dan soleh.

Pendapat beliau ini terang-terang menghina perbuatan Rasulullah. Secara tidak langsung beliau mempersendakan Rasulullah dan menafikan kemuliaan Rasulullah. Hanya orang yang tidak waras sahaja yang sanggup menghina dan meremehkah Rasulullah. Bagi mereka yang waras tetap mengagung dan memuliakan Rasulullah. Mereka yang beriman bukan sahaja Rasulullah tetapi kaum kerabat, sanak saudara, para sahabat, Rasulullah juga dimuliakan. Begitulah bagi mereka yang sayangkan Rasulullah. Jauh sekali mereka mempertikaikan pakaian, amalan Rasulullah. Sayangkah Dr. Mahathir pada Rasulullah?

Kita tidak menafikan ada hal-hal tertentu berkaitan Rasul sengaja direka-rekakan. Tetapi walaupun begitu Dr. Mahathir tidak boleh memperkatakan itu secara umum kerana ia boleh mencemarkan imej Islam. Sebagai seorang Islam Mahathir patut menjatuh maruah agamanya, bukannya menempelak secara terang-terangan. Tindakan Dr. Mahathir itu bukan sahaja tidak bijak, tetapi satu tindakan biadab.

Bukti kedua, di awal-awal periode pemerintahannya, Mahathir pernah menyamakan *assalamualaikum* dengan selamat pagi. Hanya orang yang jahil tukil di dalam bidang agama sahaja yang sanggup dan tergamak menyamakan *assalamualaikum* dengan selamat pagi. Memang pada pengertian umum kedua perkataan itu adalah sebagai doa. Selamat pagi adalah satu pengucapan kepada seseorang yang diberikan di waktu pagi. Ia adalah doa agar orang yang disapa itu berada dalam selamat sejahtera.

*Assalamualaikum* adalah juga satu doa. Namun pengertian dan maksudnya lebih dalam dan syahdu daripada selamat pagi. Selamat pagi boleh diucapkan kepada orang bukan Islam, tetapi *assalamualaikum* tidak dibenarkan diucapkan ke atas orang bukan Islam. Adapun selamat pagi boleh diucapkan kepada semua orang, kafir atau muslim.

Jadi jelas perbezaan diantara kedua pengucapan itu. *Assamualaikum* dibacakan dalam sembahyang dan selamat pagi tidak boleh dibaca dalam sembahyang. Jadi dimanakah logiknya kedua perkataan itu sama (darjat) menurut akal agama Mahathir itu?

Ketiga, Dr. Mahathir pernah mencadangkan agar Qur'an ditafsirkan semula. Menurutnya sudah sampai masanya Qur'an itu ditafsir semula kerana banyak tafsiran atau terjemahan di dalam Qur'an yang ada hari ini sudah tidak sesuai dengan peredaran zaman. Beliau membuat cadangan itu semasa berucap merasmikan perhimpunan agung Umno tiga tahun lepas. Sekali lagi bagi orang yang sihat otaknya tidak akan cuba mengemukakan cadangan itu. Kerana mereka tahu setiap apa yang termaktub didalam Qur'an itu tidak boleh diubah dan dipindah walaupun sebaris ayat. Terutamanya mengenai ayat-ayat bersabit dengan hukum hakam pemerintaha negeri, jual beli, nikah kahwin dan sebagainya.

Hanya orang yang tidak waras akal agamanya sahaja yang merasakan ayat Qur'an tidak sesuai dan perlu ditafsirkan semula mengikut kehendak dan seleranya. Kerana orang itu susah untuk mengikut hukum dan mereka lebih suka mengikut kehendak nafsunya sendiri. Cadangan itu seolah-olah Dr. Mahathir cuba meminda pengertian Qur'an menurut nafsunya. Cadangan yang hendak dibuatkan oleh Mahathir ini telah di laksanakan di Turki oleh Kamal Attartuk. Kamal Attartuk yang digelar bapa pemodenan Turki telah mengubah tafsiran Quran. Salah satu yang diubah ialah azan daripada bahasa Arab kepada bahasa Turki. *Allhuakbar* berbunyi Allah *buyut*.

Keempat, Dr. Mahathir menghina para ulama dan ustaz. Beliau menghina Datuk Dr. Harun Din, Datuk Ishak Baharum, Tok Guru Nik Aziz dan sebagainya. Memang sebagai manusia Harun Din, atau Ishak Baharum dan Nik Aziz tidak maksum. Dia tidak terbatas

daripada melakukan dosa-dosa kecil. Tetapi jika diukur daripada amalan, keperibadian dan akhlak, ternyata mereka lebih baik daripada Dr. Mahathir dan sesetengah pemimpin Umno lain.

Nik Aziz dan Harun melaksanakan apa yang Tuhan suruh. Jika Mahathir tidak berkenaan, janganlah sampai menghina kerana apa yang mereka buat adalah kerja para ulamak yang menjadi pewaris kepada Nabi. Menghina mereka samalah menghina pewaris nabi. Menghina waris Nabi samalah menghina Rasulullah. Menghina Rasulullah samalah seperti menghina Allah, sebab Muhammad itu ialah pesuruhNya.

Dr. Mahathir terasa apabila Shahnon menghina ibunya. Maka begitulah juga umat Islam akan terasa terhina bila beliau menghina Harun Din dan Nik Aziz. Apakah Mahathir sahaja ada perasaan dan orang lain tidak. Perasaan orang lain juga perlu dijaga sama dan jangan mengharapkan orang lain menjaga perasaan kita sahaja. Jangan ingat bila kita Perdana Menteri maka semua yang kita buat baik belaka dan yang orang lain buat buruk semua.

Bagi mereka yang sihat akal fikiran, mereka tidak akan menghina ulama, dan ambiak. Kalau mereka tidak setuju, mereka akan mendiamkan diri sahaja. Penghinaan ulama oleh tokoh sehebat Mahathir menyebabkan orang ramai terkeliru terutamanya mereka yang cetek dengan ilmu agama dan juga bagi orang bukan Islam. Orang boleh beranggapan ianya betul kerana ia disuarakan oleh Perdana Menteri. Padahal hakikat sebenarnya PM itu buta Qur'an dan tidak faham mengenai agama.

Selain dari kegilaan Mahathir terhadap agama, beliau juga gila dalam beberapa tindakan politiknya. Walaupun tindakan dan kata mengata di dalam politik perkara biasa, tetapi ada sesetengah tindakan dan kenyataan beliau membayangkan ianya lahir dari umbi akal yang tidak sihat. Dalam ceramahnya akhir-akhir ini beliau terus-terusan mencincang Nik Aziz. Apakah motifnya? Tujuannya untuk

menyerang ulamak. Mahathir sangat menyedari ulamak telah menjadi musuh kepada pemerintahannya.

Pertama, tindakan ke atas Anwar Ibrahim adalah sesuatu yang sungguh mengaibkan. Tidak berlaku sebelum ini seorang ketua kepada sebuah parti politik dan ketua kerajaan mengaibkan orang yang hendak disingkirkannya. Tetapi ini berlaku kepada Mahathir. Semua orang tahu bagaimana beliau membiarkan aktiviti mengaibkan Anwar dengan pendedahan yang memalukan, kata-kata kesat dan tindakan yang sadis. Malahan dalam satu-satu masa beliau sendiri turut mengaibkan dan memfitnah Anwar.

Dalam perhimpunan agung Umno Mahathir secara terang-terangan menuduh Anwar telah berzina dengan isteri orang dan melakukan liwat. Orang yang mempunyai akal yang sihat, suci dan murni, berpegang kepada ajaran Islam tidak sanggup dan tergamak untuk mengeluarkan perkataan itu di khalayak ramai. Kalau pun benar Anwar melakukan, Mahathir sebagai Presiden tidak patut mengeluarkan tuduhan itu cukuplah setakat para "pakka" Shai dan Kassim, atau Ibrahim Ali atau Sanusi Junid. Dr. Mahatathir harus bersikap bijaksana dan fatanah.

Jika Mahathir bijak beliau tidak mengulasnya kerana ia memberi aib kepada orang yang dituduh. Tuduhan itu juga memalukan bangsa Melayu dan agama. Seluruh dunia tahu tentang buruk baik bangsa Melayu. Tamadun yang dicipta sebelum ini musnah sekelip mata. Mahathir harus tilik ke dalam dirinya. Beliau patut menghayati apakah perasaannya jika orang mendedahkan keaiban keluarganya dan isterinya. Apa kata Mahathir kalau orang mendedahkan "mahkota" di kepala isterinya?

Selain pemikiran mengenai agama dan tindakan politik, dasar pembangunan Dr. Mahathir juga tidak menggambarkan dasar pembangunan Qur'an. Manakala telatahnya pula dalam soal ini tidak ubah seperti cita-cita orang nyanyuk, bersikap seperti budak-budak.

Sesetengah pembangunan yang dibawa langsung tidak mencerminkan pembangunan yang menyeluruh untuk kepentingan dan manfaat rakyat jelata. Pembangunan itu lebih tertumpu kepada kepentingan sesetengah pihak dan lebih tepat lagi untuk kepuasan dirinya sendiri.

Sikap ini menggambarkan perangai Mahathir seperti budak-budak. Segala macam projek pembangunan yang dilihat di luar negeri ingin dilaksanakan di Malaysia tanpa mengambil kira apakah ianya memberi manfaat ataupun tidak. Sikap itu sepertilah kanak-kanak yang memasuki sebuah *shopping* kompleks, mereka akan mahu memiliki apa sahaja *toys* yang mereka tenguk dan mahu memilikinya apakah *toys* itu penting dan orang tuanya mampu membelinya ataupun tidak.

Begitulah Dr Mahathir.

Dalam konteks pemikiran pula Dr. Mahathir banyak mengeluarkan pendapat yang tidak relevan dan cocok dengan bangsa Melayu. Beliau secara terang-terangan telah menghina dan merendahkan orang Melayu. Ini sungguh menghairankan kita, dan orang yang tidak waras sahaja tergamak berkata demikian.

Misalnya baru-baru ini beliau mengatakan pelajar Melayu lemah berbanding dengan bangsa lain. Bukan itu saja, para akademik Melayu juga mungkin tidak dapat memegang jawatan di universiti kalau bukan kerana bumiputera. Menurutnya kalau ikut *standard* kelulusan orang Melayu tidak layak.

Dalam hal ini mungkin ada benarnya juga, sebab ramai Prof Madya yang dilantik jelas kekurangan ilmu dan kerana mereka Melayu semata-mata. Mereka amat cetek dalam bidang ilmu yang hendak mereka cemburi. Sekurang-kurang dua orang akademis yang mungkin dilantik atas semangat yang Mahathir kata itu. Mereka ialah Mahadzir Mohamad Khir dan Ramlah Adam.

Ada pendapat yang mereka lontarkan tidak relevan dan kurang fakta. Misalnya Ramalan begitu memuji Onn Jaaffar sehingga melupai apakah yang Onn Jaaffar lakukan kepada bangsa Melayu dan Islam. Mahadzir, kerana terlalu memuji Mahathir sehingga fakta penting pun dilupakan.

Jadi berdasarkan kepada keadaan dan telatah itulah maka membuatkan saya berani mengatakan bahawa Mahathir sudah nyanyuk ataupun gila. Kesintangan dan kenyanyukannya sudah sampai ke peringkat yang paling parah. Dan sudah sampai untuk Dr. Mahathir direhatkan sebelum keadaanya lebih teruk lagi. Membiarkan orang gila mentadbirkan negara ini mendatangkan masalah kepada rakyat.

Selain itu Dr. Mahathir juga sudah banyak melupai kepada kata-katanya. Dia sudah tidak konsisten lagi dengan kata-katanya. Hari ini bercakap begini besok cakap lain. Ini semua menggambarkan yang beliau sudah hilang ingatan atau ingatannya tidak berapa *sharp* lagi. Kalau seseorang itu bercakap berubah-rubah alias berbelit-belit, ada dua kemungkinan berlaku ke atas dirinya. Kalau tidak dia seorang pembohong, dia ialah seorang yang nyanyuk.

Satu masa dulu beliau pernah menegaskan pintu Umno Baru telah ditutup rapat kepada Tengku Razaleigh. Beliau tidak akan menerima Ku Li sebagai ahli Umno. Tetapi 10 tahun kemudian pintu yang dikunci itu dibuka kembali oleh Mahathir.

Semasa pilihanraya Sabah baru-baru ini beliau menegaskan tidak akan menerima mana-mana wakil rakyat dari PBS yang hendak menyertai Umno (BN). Dengan nada angkuh beliau berkata, Umno tidak memerlukan mereka. Tetapi pada perhimpunan agung Umno yang lalu, dua orang wakil rakyat PBS telah diterima menyertai BN.

Suatu waktu dulu beliau mengatakan sebab-sebab beliau pecat

Anwar ialah kerana moral dan peribadi Anwar yang buruk. Tetapi di dalam perhimpunan agung Umno yang lalu beliau menyebut tindakan itu ialah kerana Anwar membuat pakatan untuk menjatuhkannya. Akhirnya terdedah juga tembelang busuk Mahathir terhadap Anwar dan benarlah dakwaan Anwar - Mahathir pecat beliau bukan kerana tuduhan yang dilemparkan itu tetapi kerana takut kepada pengaruhnya.

Mengenai ekonomi beliau pernah berkata tanda-tanda ekonomi pulih apabila indeks di BSKL naik mencecah sampai ke angka 800 dan apabila indeks di BSKL turun beliau mengatakan pula indeks BSKL tidak merupakan petanda mutlak mengenai masa depan ekonomi negara.

Beliau juga pernah mengatakan akan mengambil Ku Li sebagai Timbalannya, sebaliknya beliau memberi sokongan kepada Musa Hitam dalam pertandingan tahun 1981. Beliau juga berkata Anwar adalah penggantinya, tetapi pada 2 September 1998 dipecatnya Anwar.

Beliau mengatakan akan berhenti tahun 1998. Kononnya beliau bercadang untuk berhenti tahun 1990 lagi tetapi dihalang oleh Anwar. Tetapi dalam perhimpunan Umno memberi gambaran beliau tindakan berundur.

Itulah diantara ketidakrelevan dan konsisten kata-kata Dr. Mahathir. Hanya orang yang gila, nyanyuk sahaja yang melupai akan kata-katanya. Dalam dunia politik ia disifatkan sebagai orang yang tidak mempunyai prinsip. Jika seseorang itu masih sihat pemikirannya ia tidak mudah lupa kepada kata-katanya. Ia akan berfikir sepuloh kali untuk memungkir janji dan sumpahnya sendiri. Ia akan ingat apa akan dibalas oleh Tuhan jika khianat dan mungkir janji.

Itulah tanda-tanda dan dalil menunjukkan Dr. Mahathir sudah nyanyuk dan gila!.



*Datin Tuan Sabariah Tuan Ishak isteri Tok Guru Nik Aziz. Apabila isteri MB pakai tudung dan tutup aurat, maka isteri wakil rakyat lain juga turut menutupi aurat. Itulah rahmatnya jika isteri pemimpin mengambil berat tentang agama dan suruhan Tuhan.*



*Datin Seri Siti Hasmah Mohd Ali isteri Dr. Mahathir Mohamad. Bila Siti Hasmah tidak tutup kepala, maka isteri menteri lain juga kena dedah kepala. Isteri menteri yang tutup kepala kadang kala terasa malu bila berdepan dengan Siti Hasmah. Khabarnya isteri seorang menteri sanggup buka tudung atas kepala apabila hendak berjumpa dengan Siti Hasmah. Kononnya kerana nak hormatkan Wanita Pertama itu.*

32 Perbezaan Di Antara

# **NIK AZIZ DENGAN MAHATHIR**

**3**

## **1. WADAH PERJUANGAN.**

**Y**AB Datuk Nik Abdul Aziz bin Nik Mat memilih parti PAS sebagai wadah perjuangan, manakala Dr. Mahathir memilih Umno. Nik Aziz sertai PAS tahun 1967 dan menjadi Mursyidul Am. Dr. Mahathir menyertai Parti Umno tahun 1962 dan pernah dipecat dari Umno tahun 1969 dan kini menjadi Presidennya.

Perlantikan Nik Aziz dibuat secara syura, perlantikan Mahathir dibuat menerusi pemilihan dan pernah ditentang oleh Tengku Razaleigh Hamzah. Berbeza dengan Nik Aziz kedudukannya tidak pernah ditentang.

Parti Nik Aziz (PAS) memperjuangkan Islam, parti Dr. Mahathir (Umno) memperjuangkan kebangsaan. PAS bercita-cita menegakkan Islam menurut Quran dan Hadith. Umno menegakkan Islam menurut acuan pemikiran manusia dan tidak bersedia melaksanakan semua suruhan dan perintah Allah.

Umno hanya mengambil mana-mana perintah atau larangan yang sesuai sahaja dengan naluri dan pemikiran pemimpinnya. Misalnya Hukum Hudud dianggap sebagai hukum yang usang dan

lapok serta tidak sesuai di praktikan di negara ini.

Pemimpin PAS lebih ikhlas dan jujur di dalam perjuangan manakala pemimpin Umno tamak haloba. Ahli PAS meletakkan Quran dan Hadith di hadapan, sementara ahli Umno meletakkan material dan kekayaan di hadapan dan hanya menggunakan logik akal dalam menggubal dasar dan prinsip perjuangannya.

## **2. PAKAIAN.**

Nik Aziz pakai kupiah dan serban kadang-kadang pakai jubah. Mahathir pakai songkok, dan ada kalanya pakai kupiah di tempat tempat tertentu dan ada kalanya tidak pakai apa-apa di atas kepala. Nik Aziz menutup auratnya sepanjang hari. Dr. Mahathir kadang-kadang berpakaian seluar pendek, bertopi dan merayau-rayau di tepi-tepi pantai - berjoging.

## **3. LANDASAN BERHUJAH.**

Nik Aziz bercakap berlandaskan Qur'an dan Hadith, qias dan ijtimak ulamak, Dr. Mahathir bercakap bersandarkan logik akal dan ideologi Barat dan rumusan dari forum dan *conference*. Dalam mengulas sesuatu isu, Nik Aziz akan berpandukan kepada Qur'an dan Hadith serta qias ulama. Manakala Dr. Mahathir akan berpandukan kepada sejarah dan ketamadunan pemikiran manusia.

## **4. AMALAN SUNNAH.**

Nik Aziz ada janggut dan misai. Mahathir tidak ada janggut dan misai. Mahathir kata janggut bukan sunah Nabi. Nik Aziz kata janggut sunah Nabi. Manakala Mahathir mencarut kenapa Rasulullah simpan janggut kerana waktu itu tak ada pisau cukur. Mahathir pertikai siapa yang tahu yang nabi ada janggut, sebab semua orang tak tenguk. Nik Aziz percayakan sunnah dan tidak mempertikaikan apa yang Rasulullah buat. Mahathir meraguinya, adakalanya beliau memperlikan sunnat sebagai mengarut.

## 5. ELAUN DAN RUMAH.

Nik Aziz tak pernah ambil elaun rumah sejak menjadi MB tahun 1990. Sebanyak RM 320 ribu telah dipulangkan kepada perpendaharaan negeri. Manakala Dr. Mahathir pula sejak jadi PM tahun 1982 telah memiliki sembilan buah rumah dan sebuah mahligai bernilai RM200 juta. Tetapi jumlah itu dinafikan di dalam Dewan Rakyat hanya RM17 juta sahaja. Penafian itu sama sekali tidak logik, sebab landskap sahaja berharga RM10 juta. Seorang kontrektor wanita dari Kelantan yang dapat projek itu menyatakan landskap untuk rumah Mahathir sebanyak RM10 juta. Kalau landskap sudah 10 juta, munasabahlah kalau harga mahligai itu RM 200 juta.

## 6. ANAK-ANAK.

Nik Aziz ada 9 orang anak Dr. Mahathir ada 5 orang anak. Anak-anak Nik Aziz hanya orang biasa, yang perempuan menjadi suri rumah tangga, tetapi anak-anak Mahathir kaya raya dan jutawan. Mirzan punyai 200 buah syarikat, Mukhriz ada hospital dan *cable optic*, Mukzani ada litar lumba kereta Formula One. Anak perempuannya Marina menjanda beberapa kali dan kini kahwin dengan jurufoto berbangsa Indonesia. Marina jadi Pengurus Aids Malaysia berciuman di khayal ramai, anak Nik Aziz “pengerusi rumah tangga”. Sukar sekali untuk lihat berfoya-foya di tempat ramai.

## 7. ISTERI.

Nik Aziz ada seorang isteri, Mahathir khabarnya ada dua orang isteri. Menurut Marina Yusuf dia tahu yang Mahathir juga ada skandal, dia tahu siapa yang Mahathir bawa masuk perempuan di pejabatnya di parlimen. Sementara menurut Ku Li isteri Mahathir seorang Cina Singapura. Isteri Nik Aziz pakai tudung, isteri Mahathir pakai selendang. Di tempat tertentu tak pakai apa benda. Siti

Hasmah semat bunga di kepala, Tuan Sabariah pakai tudung di atas kepala. Kalau bawa selendang pun disangkut atas lengan. Bukan untuk tutup aurat tetapi sebagai fesyen. Isteri Mahathir berambut palsu, isteri Nik Aziz rambut asli.

### **8. TANGGUNGJAWAB PEMIMPIN.**

Hari minggu Nik Aziz sampai kuliah agama di pejabat PAS, memberikan ilmu kepada orang ramai. Mahathir berkerja di pejabat menerima tetamu di dalam dan luar negeri. Waktu sembahyang Nik Aziz menjadi imam, Mahathir waktu sembahyang menjadi makmu. Nik Aziz ajak orang takutkan Allah dan dekatkan syurga, Mahathir ajak orang melabur dan cari harta kekayaan dunia seberapa banyak.

### **9. MAKSIAT DAN PERJUDIAN.**

Mahathir menggalakkan maksiat dan perjudian, Nik Aziz berusaha mengurang dan menghapuskannya. Di negeri-negeri di bawah pemerintahan Mahathir maksiat dan perjudian berleluasa dan berjalan secara terbuka. Pub, pusat perjudian, karaoke, pusat penjualan nombor ekor dan toto terdapat di merata tempat di Kuala Lumpur dan bandar-bandar besar. Di Kelantan segala kegiatan itu diharamkan sama sekali. Mana-mana kegiatan kebudayaan dan keseniaan yang berunsur bidaah dan syirik dihapuskan. Hanya kebudayaan dan keseniaan yang selari dengan syariat Islam saja dibenarkan.

### **10. KEPANDAIAN.**

Nik Aziz pandai baca khutbah, Mahathir tidak pandai baca khutbah. Mahathir pandai berucap menggunakan teks ucapan yang ditulis oleh setiausaha. Apabila berucap pakai cermin, (skrin paparan) jadi orang nampak macam *terror*, padahal baca teks. Alat itu hanya boleh digunakan oleh beliau seorang sahaja, orang lain tidak layak. Selain itu ia juga bertindak kalis peluru. Hanya orang

yang takut dan banyak musuh saja menggunakan alat itu sebab takut di tembak. Nik Aziz boleh bercakap di mana-mana saja, tanpa ada sebarang pelindung dan anggota polis yang *escort* 24 jam.

### **11. KEYAKINAN KEPADA QURAN.**

Nik Aziz percaya kepada Qur'an dan Hadith, Mahathir mera-gunya. Dasar politik Nik Aziz, Qur'an dan Hadith, dasar Dr. Mahathir akal dan ideologi Barat. Sebab itu Mahathir banyak ber-pandukan kepada idelogi dan akal fikiran. Mahathir tidak percaya kepada sesetengah ibadat sunat dan dianggapnya boleh mele-mahkan umat Islam. Menurut Mahathir kenapa pelajar Melayu lemah ialah kerana mereka kuat beragama. Ibadat Qiamulail disi-fatkan sebagai membuang masa. Air tawar dan air jampi dilebelkan sebagai mengarut.

### **12. KEYAKINAN KEPADA ALLAH.**

Nik Aziz bila menghadapi masalah atau hendak menyelesaikan masalah akan bersembayang hajat memohon kepada Allah. Ma-hathir tidak... dia akan membangkit sesuatu isu guna untuk meng-alih perhatian rakyat. Mahathir akan buat majlis dan kerah orang ramai. Kadang-kadang angkut dengan lori, bas dan motosikal dan siap berikan makan dan wang saku. Orang yang datang mendengar ceramah Nik Aziz ikhlas dan di atas kehendak sendiri, dan sanggup pula mereka menderma seringgit dua untuk tabung perjuangan.

### **13. PERSAHABATAN.**

Mahathir buang Ku Li dari Umno. Nik Aziz selamatkan Ku Li dengan ajak bergabung dalam Angkatan Perpaduan Ummah. Mahathir tutup pintu Umno kepada Ku Li, Nik Aziz buka pintu untuk berkerjasama dengan Ku Li. Apabila Ku Li bubar Semangat 46 dan Angkatan Perpaduan Ummah, Mahathir ambil Ku Li semula. Mahathir lupa apa yang pernah beliau ucapkan kepada Ku Li. Ku Li dengan Mahathir dua kali lima sahaja.

#### **14. TINDAKAN POLITIK.**

Mahathir pecat Anwar, Nik Aziz menyatakan simpati kepada Anwar. Mahathir benci dan dendam Anwar, Nik Aziz simpati dan sayangkan Anwar. Anwar yang diakui sebagai anak didikannya di dalam politik disingkir dari Umno dengan kejam dan tidak beradab. Untuk menghalalkan penyingkiran itu diaibkan Anwar dengan tuduhan-tuduhan yang sungguh keji dan jijik. Dituduh Anwar melakukan liwat, berzina dengan isteri orang dan menjadi boneka kuasa asing. Nik Aziz pertahankan Anwar dengan meminta Mahathir agar mengemukakan bukti ayat Qur'an di atas tindakannya memecat dan menghina Anwar.

#### **15. MEMFITNAH.**

Mahathir kata Nik Aziz ulamak pembohong. Nik Aziz kata Mahathir sekular. Mahathir juga menghina ulamak Datuk Dr. Harun Din dan pecat Mufti Selangor Datuk Ishak Baharum. Nik Aziz bela Datuk Ishak Baharum dan Harun Din. Mahathir tuduh Harun Din cari makan dengan menjual air sejuk. Beliau kata Harun Din pembohong. Nik Aziz dan Harun Din tidak menjawab apa-apa sebaliknya memulangkan kata-kata Mahathir itu untuk penghakiman Allah SWT.

#### **16. MEREBUT KELANTAN.**

Mahathir cuba hendak rampas Kelantan, Nik Aziz berhajat nak rampas Malaysia di samping mempertahankan Kelantan. Jika Kelantan jatuh ke tangan BN, maka Kelantan akan jadi seperti negeri-negeri lain. Nama keemasan Kelantan sebagai Serambi Makkah akan terhakis sedikit demi sedikit. BN tidak akan mempertahankan nama jolokan dan keistimewaan Kelantan itu. Ini telah terbukti di Terengganu. Walaupun kerajaan Terengganu menggemarkan negeri itu sebagai Serambi Madinah, tetapi ia tidak menjadi sebutan orang. Orang tetap sebut Terengganu negeri Penyu juga.

Macam mana hendak suruh orang kenali sebagai Serambi Madinah kegiatan di negeri itu tidak melambangkan masyarakat Madani. Perjudian ekor, minum arak di tempat terbuka masih berleluasa. Disebabkan Terengganu masih lagi membenarkan perjudian empat nombor itulah menyebabkan kaki judi di Kelantan meneruskan kegiatan perjudian mereka di Terengganu.

### **17. MENJAGA KUASA.**

Mahathir selalu cantas orang yang tidak sebulu dengannya di dalam Umno. Nik Aziz tidak mempunyai musuh di dalam PAS. Semua orang menghormatinya. Walaupun beliau berhajat untuk berundur, tetapi PAS menahannya. Kepimpinan, tunjuk ajar, buah fikiranya masih diperlukan lagi. Nik Aziz diminta pertahanan jawatan, Dr. Mahathir didesak agar letak jawatan.

### **18. KE MAKKAH.**

Nik Aziz setiap tahun ke Makkah, Mahathir 10 tahun sekali ke Makkah. Walaupun sibuk dengan tugas-tugas sebagai Menteri Besar dan parti, namun Nik Aziz sempat mencuri masa untuk beribadat kepada Allah. Mahathir sepanjang masa sibuk dengan kerjanya dan tidak ada masa untuk menunaikan umrah.

### **19. PERBEZAAN MISI.**

Mahathir dua tiga kali setahun ke luar negeri berjumpa pelabur asing ajak bawa melabur ke Malaysia, Nik Aziz sekali setahun menemui pelajar-pelajar dan berdakwah kepada mereka. Misi Mahathir untuk capai dunia, misi Nik Aziz untuk dua-dua sekali - dunia dan akhirat.

### **20. MENCARI KEBENARAN.**

Mahathir cabar Nik Aziz supaya letak jawatan sekiranya Nik Aziz gagal membuktikan ayat Qur'an yang membenarkan mencarut. Sebenarnya Nik Aziz telah pun menjelaskan perkara ini. Dalam

ceramahnya di Stadium Sultan Mohamed Ke IV yang dihadiri oleh lebih 100 ribu orang, Nik Aziz mengemukakan bukti bahawa mencarut dibolehkan. Antara ayat yang disebut ialah suruh al-Baqarah. Beliau juga menceritakan bagaimana Syaidina Abu Bakar pada satu ketika pernah mencarut (menyumpah) Budin bin Waraqoh di hadapan Nabi yang menyuruh balik menjilat (hisap) jubur Tuhannya. Nabi tidak berkata apa-apa terhadap telatah Syaidina Abu Bakar itu, itu menunjukkan mencarut dibenarkan. Sebab Nabi akan terus menegur sahabatnya jika kata-kata atau perangai sahabat itu tidak elok.

Tetapi sayang ayat itu tidak dijumpai oleh Mahathir. Seperti bekas Ketua Polis Negara Tan Sri Haniff Omar tidak berjumpa ayat Qur'an yang melarang perjudian. Ini tidak hairan kerana Mahathir baca Qur'an bahasa Melayu dan Qur'an bahasa Inggeris. Jadi macam mana hendak jumpa ayat itu. Mahathir patut baca Qur'an bahasa Arab. Qur'an diturunkan di dalam bahasa Arab dan bukannya bahasa Inggeris. Jadi bila dibaca Qur'an di dalam bahasa lain maka banyak kekeliruan berlaku.

Nampaknya Mahathir dan Haniff Omar kenalah belajar membaca Qur'an semula. Hamid Othman, Yusuf Nor dan para Mufti boleh tolong ajarkan Mahathir. Lebih elok lagi baca tafsir Qur'an dan jangan baca buku pasal ekonomi dan politik Barat sahaja. Dalam buku-buku D Bono, Bill Gates, tidak ada mengenai ayat-ayat yang disebutkan oleh Nik Aziz itu. Bill Gates dan Bono hanya mengajar bagaimana mahu berjaya dalam hidup menerusi jalan sama ada halal atau haram.

Mahathir kata dia rela tidak akan bertanding sekiranya Nik Aziz dapat buktikan bahawa Tuhan mencarut. La... dia sudah putar ayat. Nik Aziz tidak kata Tuhan mencarut, tetapi apa yang beliau katakan, mencarut dibenarkan di dalam Islam. Itulah Mahathir selalu putar ayat, berbelit-belit macam tahi sembelit.

Sebenarnya kalau berpandu kepada apa yang Nik Aziz terangkan itu, Mahathir sudah pun layak berhenti sejak lama dulu. Mahathir tidak faham dengan kenyataan Nik Aziz tempoh hari, ataupun buat-buat tidak faham. Beliau sengaja tidak faham kerana mahu menjadikan perkara itu sebagai isu politik murahan.

## 21. PENGAMPU DAN PENYOKONG.

Mahathir mempunyai ramai pengampu, Nik Aziz mempunyai ramai penyokong. Para pengampu dan ketua pengampu Mahathir terdiri daripada menteri kabinet. Ketua pengampu ialah Ibrahim Ali. Ketua ini baru dilantik ke jawatan rasmi baru-baru ini. Pemimpin ini akan buat apa saja yang disukai dan disenangi oleh Mahathir. Beliau akan berfikir bagaimana untuk menampakkan Mahathir baik, bersih dan hebat. Beliau tidak kisah apakah tindakannya itu orang menyampah, atau sebaliknya dia akan lakukan asalkan ia boleh mengembalikan kegemilangan Mahathir di kalangan rakyat.

Penasihat pengampu pula Hamid Othman. Hamid akan mencari mana-mana Hadith atau ayat Qur'an yang membenarkan tindakan Dr. Mahathir. Beliau akan baca dan huraikan kepada orang ramai sebagai menguatkan tindakan Dr. Mahathir. Sebenarnya orang macam Hamid Othman inilah yang merosakan agama di atas nama agama. Ulamak yang merosakan maruah dan wibawa ulama.

Manakala ahli-ahli jawatan kuasa pengampu pula terdiri daripada Abdullah Badawi, Khalil Yaacob, Tengku Razaleigh Hamzah, Mustapa Mohamad, Annuar Musa, Rafidah Aziz dan lain-lain.

Manakala Nik Aziz tidak mempunyai ramai pengampu dan jawatankuasa pengampu, tetapi beliau mempunyai ramai penyokong. Ke mana sahaja beliau pergi orang ramai akan berduyung-duyung hadir untuk mendengar ceramahnya.

## **22. KONSISTEN DALAM BERCAKAP.**

Mahathir suka berdolak dalih, membelit kata-kata dan tidak suka berterus terang. Nik Aziz jujur dan sedia mengaku kesalahan dan kelemahannya. Apabila ekonomi negara jatuh merundum Mahathir salahkan orang asing, menuduh orang-orang tertentu seperti Goerge Soros sebagai penyangat dan pengkhianat.

Mahathir berdolak dalih di dalam kes Anwar dan lain-lain kes yang melibatkan kronisnya. Satu masa beliau menyatakan pemecatan Anwar kerana moral Anwar dan pada masa lain beliau mengatakan kerana Anwar berkomplot hendak menjatuhkannya. Mahathir sering mengubah pendiriannya dan tidak mahu mengaku kelemahan dirinya. Nik Aziz jika beliau silap beliau mengaku. Dalam kes penswastaan air Kelantan Nik Aziz dengan jujur mengakui dia tidak tahu menahu tentang perkara itu. Apabila orang suruh sain beliau sain. "Lepas makan nasi sepinggan di istana orang suruh sain, amba pun sain," Nik Aziz mengaku walaupun pengakuan itu boleh menjatuhkan martabatnya sebagai Menteri Besar.

## **23. NEPOTISME DAN KRONISME.**

Mahathir meluluskan projek untuk kroni dan anak-anaknya, Nik Aziz tidak pernah berbuat demikian. Kebanyakan yang mendapat projek-projek mega terdiri daripada konis Mahathir dan sukusakatnya. Projek Linear City, Bakun, Putrajaya dan sebagainya. Mahathir meluluskan RM1.7 juta wang Petronas untuk menyelamatkan syarikat perkapalan anaknya. Nik Aziz tidak pernah meluluskan apa-apa peruntukan untuk anak-anaknya. Satu sen pun wang kerajaan tidak diberikan kepada anak-anaknya untuk menyelamatkan apa-apa perniagaan anak-anaknya.

## **24. KETAHANAN DIRI.**

Sifat Mahathir pantang dikritik. Jika dikritik dia akan melenting

dan meradang. Orang yang membuat teguran kepadanya akan di belasah seteruk mungkin. Jika ada mana-mana menteri cuba memberi pandangan, menteri itu akan disindir secukup-cukupnya. Begitu juga di dalam Umno, sekiranya ada anggota parti mengkritik beliau, orang itu akan dibelasah seteruk-teruknya. Contohnya Mat Rahmat dan Sabaruddin Chik dipecat kerana cuba menasihatinya. Nik Aziz tidak begitu. Beliau terbuka dan menerima pandangan orang. Beliau selalu berjumpa dengan pegawai kerajaan negeri untuk membincang masalah negeri. Di dalam parti beliau tidak bertindak tanpa terlebih dahulu membuat penyiasatan rapi. Segala masalah yang timbul diselesaikan secara musyawarah. Walaupun pegawai kerajaan cuba sebotajnya beliau reeks dan bersabar saja.

## 25. PERASAAN.

Mahathir sejak ke belakangan ini selalu saja menangis di hadapan orang ramai. Sewaktu berucap di perhimpunan agung Umno tahun 1993 beliau menangis terisak-isak macam budak. Katanya dia sedih dengan fenomena politik wang dalam Umno yang berlaku berleluasa. Beliau kononnya terlalu sayang kepada Umno. Jika politik wang bermaharajalela Umno akan hancur.

Orang tahu tangisan itu sebagai lakonan saja. Ia bertujuan hendak melindung perbuatannya sendiri kononnya bersih di dalam Umno.

Sewaktu baca sajak di MATIC sekali lagi beliau menangis. Begitu hiba dan pilu sekali sampai ada orang yang lemah semangat ikut mengesatkan air mata. Yang paling menyebakkan lagi apabila Siti Hasmah menghulurkan tisu untuk mengelapkan airmata tua Mahathir. Beliau sedih kerana perjuangan bangsa Melayu masih belum selesai. Bangsa Melayu masih belum maju dan berjaya. Tetapi orang tahu tangisan itu bukan kerana perjuangan belum selesai, tetapi Mahathir belum puas berkuasa. Seperti tangisan

buaya yang mahu memerangkap musuh.

Beliau sedih jika tiba-tiba kena berhenti sedangkan nasib anak-anaknya masih belum terbela. Beliau tidak dapat jaminan Anwar yang ketika itu menjadi timbalannya akan membela nasib anak-anaknya. Beliau juga bukan menangis kerana perjuangan belum selesai, tetapi kerana mahligainya yang masih belum siap. Dr. Mahathir sedih takut tidak dapat duduk di mahligai itu sebelum matanya tertutup rapat. Itulah sebenarnya yang disedihkan.

Baru-baru ini ketika berucap di hadapan para pelajar di Kedah sekali lagi beliau menangis dan mempamirkan muka sebak. Beliau kononnya sedih kerana pelajar Melayu lemah berbanding dengan pelajar bangsa lain, terutamanya China. Pelajar Melayu tidak ramai yang menguasai bidang-bidang khusus, seperti jurutera, perubatan, sains dan sebagainya.

Benarkah beliau menangis kerana itu? Kalau beliau benar kasihkan kepada pelajar Melayu kenapa pendidikan diswastakan? Universiti dikorporatkan. Dengan dasar penswastaan pendidikanlah maka ramai anak-anak Melayu yang otaknya geliga tidak dapat meneruskan pengajian kerana tidak cukup wang.

Ada sesetengah yang datang hendak mendaftarkan diri di IPTA dan IPTS, terpaksa balik kerana yuran pengajian terlalu tinggi. Yang menyedih dan memalukan lagi ada sesetengah yang tekad untuk belajar terpaksa dedah nasib mereka di surat khabar dan minta sedekah orang ramai. Kerana tidak ada wang, pelajar yang bijak dan lulus untuk ke IPT pun terpaksa berkerja kilang.

Berdasarkan hakikat itu betulkah Dr. Mahathir menangis kerana bangsanya? Atau menangis kerana mengenangkan nasib pelajar Melayu. Atau tangisan itu adalah satu tipu muslihat saja untuk meraih undi. Kita tahu kedudukannya hari ini dalam keadaan kritikal dan terjempit. Mahathir sudah tahu pengaruhnya sudah

menurun. Makanya untuk memastikan kemenangan BN dia terpaksa pujuk orang Melayu. Terpaksa menunjukkan simpati kepada orang Melayu dengan memainkan filem Hindustan.

Mahathir terpaksa guna air mata untuk meraih simpati. Mahathir sedar orang Melayu sangat lemah kepada airmata dan pujukan. Dia tahu orang Melayu akan tewas dengan airmata. Sebab itu orang Melayu kalau tenguk cerita Hindustan akan menangis terisak-isak. Jiwa orang Melayu sangat lembut dan halus. Dan ini sangat diketahui oleh Mahathir. Macam mana marah sekalipun orang Melayu apabila orang menghulurkan tangan dan melelehkan air mata di pipi, orang Melayu akan lembut. Tak payah air mata, ambil air liur bubuh di kelopok mata pun orang Melayu akan tunduk. Itulah bangsaku, orang Melayu. Mudah ditipu dan tunduk pada bujukan.

Jadi Mahathir kini sudah peringkat menggunakan airmata, setelah rakyat tidak lagi termakan dengan projek dan segala macam bentuk pemberian lain.

Sebaliknya Nik Aziz tidak pernah menangis di hadapan orang ramai. Beliau tidak pernah menggunakan air mata untuk meraih simpati dan sokongan. Nik Aziz tidak pernah melahirkan kekesalan kepada mana-mana pihak. Beliau tidak pernah menangis mengenangkan jihadnya, kerana jihad berterusan dan akan disambung oleh orang terkemudian. Semasa bertemu dengan pelajar Nik Aziz tidak sebak dan menangis dan melahirkan rasa kesal kepada percapaian akademik mereka. Malah beliau puji kerana pelajar Melayu lulus cemerlang dan teguh dengan pegangan agama. Nik Aziz sebaliknya ‘menangis’ dan sebak apabila orang menghina agama, ulamak dan Nabi Muhammad. Nik Aziz menangis di hadapannya Tuhanya mengenangkan kezaliman manusia.

## 26. GELARAN DAN SINDIRAN.

Mahathir digelar Maha Firaun dan kerajaannya diumpamakan sebagai kerajaan Namrud. Dr Sidik Fadzil di dalam sebuah kertas kerjanya membayangkan pemimpin dan kerajaan hari ini sebagai Firaun. Selain digelar Firaun, Mahathir juga dianalogikan dengan berbagai-bagai nama dan bentuk yang buruk. Gambarnya diadun dan *disuper imposeskan* dengan berbagai objek. Di dalam internet gambarnya di super imposkan dengan patung Spinx di Mesir. Beliau juga digambarkan sebagai Firaun dan menterinya sebagai patong-patong yang tunduk dan menyembahnya.

Sebaliknya Nik Aziz digelar sebagai ulamak. Kerajaanya dinamakan kerajaan Islam. Tidak ada gambar Nik Aziz yang disuper imposeskan dengan patung-patung yang menjolok mata dan mengaibkan. Potret Nik Aziz berbagai bentuk dan saiz tergantung di dinding-dinding rumah orang ramai.

## 27. KEBIMBANGAN.

Mahathir takut kehilangan kuasa, Nik Aziz rela berundur bila-bila masa sahaja apabila tugasnya selesai. Jelas sekali Mahathir keresahan dan bimbang takut kuasa yang dimiliki hari ini hilang. Beliau takut menjadi rakyat biasa dan hamba yang tidak ada kuasa. Maklumlah dengan kuasa beliau boleh lakukan apa saja. Barang minta barang boleh, barang kehendak barang jadi. Justeru itu beliau rela membunuh musuh politiknya. Kerana takut hilang kuasalah maka beliau sanggup membenarkan konspirasi untuk menjatuhkan Anwar. Beliau rela membenarkan tindakan yang sadis dan jahat berlaku di dalam negara ini. Kerana takut hilang kuasalah maka beliau mengizinkan itu semua.

Sebaliknya Nik Aziz tidak demikian. Nik Aziz rela lepaskan jawatan jika dengan cara itu yang terbaik. Beliau bersedia membubarkan PAS jika Umno rela menerima Qur'an dan Hadith se-

bagai dasar. Nik Aziz tidak menjadi jawatan untuk menjaga dirinya, sebaliknya demi menegakkan kedaulatan agama, bangsa dan negara. Jelas dengan kenyataan itu Nik Aziz menjadikan parti sebagai wadah perjuangan bukan sebagai wadah mencari makan.

### **28. SUMBER TINDAKAN.**

Mahathir bercakap tanpa dalil Qur'an, Nik Aziz bercakap berdalikan Qur'an. Mahathir bertindak memecat timbalannya kononnya kerana Anwar terlibat dengan perbuatan rendah moral liwat dan berzina. Tetapi tindakan itu tidak menurut kesaksian yang dikehendaki oleh Qur'an. Beliau tidak mendapatkan empat orang saksi yang baik untuk membuktikan Anwar terlibat, sebaliknya hanya mendengar keterangan daripada perempuan sundal.

Mahathir tidak menyebut dalil-dalil ayat Qur'an yang membenarkan tindakannya memalukan Anwar Ibrahim. Sepatah ayat Qur'an pun tidak ditunjuk sebagai membuktikan beliau telah merujuk kepada Qur'an. Sebaliknya Nik Aziz bercakap menggunakan dalil Qur'an. Apabila Nik Aziz menyatakan bahawa Islam membenarkan mencarut jika perlu beliau mengemukakan ayat-ayat Qur'an dan sejarah di zaman Nabi sebagai bukti dan dalil.

### **29. PERGAULAN DAN BUDI BAHASA.**

Dr. Mahathir tidak menghormati orang dan suka memperlekehkan orang. Manakala Nik Aziz pula sangat menghormati dan menyanjung seseorang tanpa mengira usia, warna kulit dan darjah keturunan. Dr. Mahathir memanggil Tok Guru Nik Aziz sebagai Nik Aziz sahaja, manakala Tok Guru senantiasa memanggil dan menghormati Dr. Mahathir sebagai Datuk Seri.

Dalam perhimpunan agung Umno sewaktu menggulung perbahasan Dr. Mahathir memanggil Tok Guru sebagai Nik Aziz sahaja tanpa menyebut 'penghormatan' Tok Guru. Dr. Mahathir dalam kata lain tidak ikhtiraf Nik Aziz sebagai ulamak dan Tok Guru.

"Nik Aziz, tenguk tu saya panggil Nik Aziz, bukan tok guru",: kata Dr. Mahathir memberi tahu para perwakilan.

Ketika Abdullah Badawi mengumumkan nama-nama ahli yang dipecat, Abdullah masih memanggil "saudara" kepada nama-nama itu, tetapi Dr. Mahathir meminta Abdullah menyebut nama sahaja bukan "saudara". Kerana sikap itulah maka bekas Ketua Umno Bahagian Tumpat Datuk Kamaruddin Jaaffar ketika berceramah di Tumpat tidak menyebut Datuk Seri, sebaliknya hanya memanggil Mahathir sahaja.

Sikap itu amat berbeza dengan Tok Guru Nik Aziz. Dalam keadaan apa sekali pun Nik Aziz menghormati seseorang. Sama ada didalam *mood* tidak baik atau baik beliau menghormati pangkat dan juga nama yang diberikan seseorang. Misalnya beliau masih tetap menghormati Tengku Razaleigh dengan memanggil Yang Berhormat Mulia Tengku Razaleigh di mana-mana sahaja.

Penghormatan bukan sahaja kepada tokoh terkenal tetapi kepada orang awam juga. Kalau orang itu berpangkat dipanggil nama pangkat itu dan sebagainya. Kepada *reporter* yang menghubunginya dengan telefon dibahasakan *reporter* itu sebagai Puan ataupun Tuan. Beliau sesekali tidak menyebut nama, dan jika seseorang itu baik dan rapat dengannya, beliau tetap membahasakan ante dan dirinya sebagai amba.

### **30. MINAT BERKAWAN.**

Dr. Mahathir suka kepada Israil manakala Nik Aziz membenci dan memusuhinya. Mahathir membenarkan pasukan kriket Israil datang ke negara ini. Beliau tidak peduli kepada bantahan rakyat di atas kedatangan itu. Lebih 50 orang ditangkap atas tuduhan mengadakan tunjuk perasaan dan perhimpunan haram membantah kedatangan pasukan keriket Israil itu.

Nik Aziz tidak menyokong Israil dan tetap mengecamnya kerana Israil biadab dan zalim. Hingga hari ini perbicaraan ke atas penunjuk perasaan masih belum selesai lagi.

### 31. PERANGAI.


Mahathir bergaduh dengan semua orang; dengan Raja-raja Melayu, Ketua Hakim Negara dan menyifatkan Sultan Kelantan sebagai budak ingusan. Nik Aziz baik dengan semua orang dan mempertahankan Sultan Kelantan.

### 32. PRESTASI.

Dr. Mahathir makin dibenci dan dicemuh oleh rakyat, Nik Aziz makin disanjungi dan dihormati. Di mana-mana orang memperkatakan tentang keburukan dan kebusukan Dr. Mahathir. Tentang kezaliman, ketidakadilan, ketelusan di dalam pentadbirannya.

Berbeza dengan Nik Aziz di mana-mana saja orang memperkatakan tentang corak kepimpinannya yang Islamik, sederhana dan menjadi idola rakyat. Keperibadian dan sikap tawadhuksya menjadi sebutan dan ikutan.

Mahathir diminta dan disesak oleh rakyat agar segera mengundurkan diri, manakala Nik Aziz disokong agar meneruskan pemerintahannya.



*Puluhan ribu rakyat dan penyokong PAS sama-sama mendirikan solat hajat bersama Tok Guru Nik Aziz di Stadium Sultan Muhammad ke IV Kota Bharu. Sesekali kita mahu tengok seramai manakah orang yang akan mengikuti Mahathir jika beliau menjadi imam.*

Mahathir Bukan Pemimpin

## **BERIMAN DAN BERTAKWA**

4

**K**ITA sendirilah yang menentukan nasib dan masa depan kita. Orang lain tidak ada kuasa dan berhak ke atas nasib diri dan bangsa kita. Orang lain dan bangsa lain tidak akan menangis untuk kita. Mereka tidak akan bersusah dan berpenat lelah untuk kesejahteraan kita. Orang lain dan bangsa lain hanya akan membantu kita apabila mereka terjempit ataupun merasakan ada untung disebalik bantuan itu. Bangsa lain adalah teman semasa bergembira dan bukan teman seiringan sewaktu kita menangis.

*"Sesungguhnya Allah tidak merubah keadaan sesuatu kaum sehingga mereka merubah keadaan yang ada pada diri mereka sendiri. Dan apabila Allah menghendaki keburukan terhadap sesuatu kaum, maka tak ada yang dapat menolaknya". - Ar-ra'd : 11.*

Justeru selaku manusia kita dianugerahkan akal fikiran oleh Pencipta. Guna akal fikiran ialah untuk kita berfikir dan membuat perhitungan. Akal fikiranlah yang akan memandukan kita ke landasan sebenarnya. Akal fikiran merupakan lampu yang menerangi perjalanan hidup kita selaku manusia. Akal fikiran penaka lampu menyuluh jalan kehidupan (duniawi), manakala hati

laksana lampu marifat menyuluh jalan hakiki.

Jika lampu duniawi kita suram, maka akan gelap gulitalah dunia ini. Manakala jika lampu marifat kita gelap, maka akan kelam dunia akhirat buat kita selama-lamanya. *Nauzubilahiminazalik!*

Akal juga sangat berguna untuk kita membuat perhitungan dalam sesuatu perkara. Akallah yang menjadi neraca kepada kita untuk membuat pertimbangan yang adil dan benar. Yang akan menimbangkan di antara kebenaran dan kebatilan. Kebaikan dan kejahatan. Sekiranya kita tidak menggunakan akal dengan sewajarnya tentulah hidup kita akan merana sepanjang hayat. Sudah banyak kaum yang merana kerana mereka mensia-siakan anugerah Allah yang amat penting itu. Mereka tidak menggunakan akal untuk memandukan ke titian *Siratalmustaqim*, sebaliknya menggunakan nafsu amarah untuk memandu hidup mereka. Para penagih yang berselerakan di lorong-lorong gelap sekitar Jalan Tuanku Abdul Rahman itu ialah contoh makhluk yang tidak menggunakan akal.

Tuhan telah menegaskan jika kamu menggunakan nafsu untuk mengendalikan kehidupan kamu, maka tunggulah masanya untuk musnah kerana nafsu itu mengajak ke arah keburukan. "*Nafsu itu senantiasa mengajak manusia ke arah keburukan,*" - (Maksud Qur'an). "*Kelebihan manusia itu terletak kepada akalnya*", - (Maksud Hadith).

Akal juga digunakan bagi menentukan apakah jalan kehidupan dan perjuangan kita benar dan tepat. Dengan akallah kita dapat menimbangkan apakah perjuangan yang kita serta benar-benar memenuhi naluri kita selaku manusia yang disebutkan sebagai insan yang mulia. Akal jugalah yang dapat membuat pertimbangan apakah yang kita perjuangkan hari ini di atas keredhaan Allah ataupun kerana mengikut selera nafsu ataupun runtunan syaitan durjana semata-mata. Dengan akallah kita dapat mempertimbang-

kan segala itu. Baik dan buruk, betul dan benar, hatta ke Syurga kah kita atau pun ke dalam nyalaan api Neraka.

Dalam konteks hari ini - dalam kita bernegara, apakah parti politik dan kerajaan yang kita sokong betul dan benar. Apakah kerajaan yang kita sama-sama sokong hari ini memenuhi kehendak seperti mana yang dimaktubkan oleh agama yang kita anuti. Apakah kerajaan hari ini memberi kesejahteraan kepada rakyat jelata? Apakah kerajaan yang ada hari ini dapat memenuhi tuntutan hak asasi rakyat, baik dalam aspek agama, budaya, ekonomi, pelajaran dan sebagainya? Apakah kerajaan di bawah pimpinan Dr. Mahathir hari ini merupakan kerajaan halal atau haram di sisi Allah? Apakah kerajaan hari ini adil dan saksama dalam segala bidang terhadap rakyat?

Atau secara lebih detail lagi apakah orang yang kita sokong dan angkat sebagai pemimpin pada waktu ini merupakan seorang yang baik. Selaku pemerintah dan penguasa yang adil dan jujur? Yang soleh. Pemimpin yang benar-benar memimpin mengikut kehendak Qur'an dan Hadith. Seorang pemimpin yang beriman dan bertakwa?

Dengan akal yang dianugerahkan Allah bolehlah kita membuat kajian dan penilaian apakah ianya menepati seperti mana yang dianjurkan oleh agama kita. Kenapa kita mengambil kayu ukur agama ialah kerana kita ada agama. Semua kita beragama. Agamalah yang menjadi perlumbagaan hidup yang sejati kepada setiap manusia yang mengaku tamadun dan merdeka. Perlumbagaan ialah untuk kemerdekaan dunia dan akhirat. Manusia yang maju tanpa berlandaskan agama adalah manusia yang jahil dan sesat. Mereka yang tidak ada agama dan menyakini agama adalah mereka yang masih belum lagi bertamadun dan mengenal diri sebenar-benarnya.

Betapa maju sesebuah negara jika pemimpinnya telah

membelakangkan agama, ia tidak boleh dianggap sebagai tamadun dan maju. Negara berkenaan tidak boleh diiktirafkan sebagai maju dan sejahtera dalam erti kata sebenarnya. Negara itu tidak boleh dikelasifikasikan sebagai negara *tahyibah waburufu* -- negara yang aman makmur. Semua agama mengajar kebaikan dan menentang kemungkarhan. Orang yang meninggalkan agama adalah orang sesat dan sasau di dunia dan di akhirat. Orang yang mendokong kemungkarhan! Orang yang dijajah oleh syaitan.

Dalam konteks orang Melayu di negara ini, Islam adalah agama dan perlembagaannya. Maka dengan ukuran agama dan perlembagaan hidup itulah kita gunakan untuk menentukan apakah pemimpin kerajaan hari ini benar atau tidak. Menepati kehendak Qur'an atau tidak? Jika ada orang mengatakan Qur'an tidak dapat dijadikan ukuran, maka jelas orang itu sudah membuang Qur'an. Awal-awal lagi orang-orang seperti itu harus dinafikan haknya. Dihumbangkan sahaja ke dalam telaga buruk kerana ianya sudah tidak yakin kepada kebesaran dan keagungan Allah SWT. "*Inilah kitab (Quran) yang tidak ada keraguan ke atasnya.*"

*"Aku turunkan risalah Islam ini untuk memberi kesejahteraan ke atas seluruh umat manusia."* Maknanya Islam diturunkan ke atas muka bumi ini demi menyempurnakan syariat-syariat sebelum ini. Islam adalah menjamin kesejahteraan semua manusia bukan sahaja semasa di atas dunia, tetapi di akhirat juga. Islam adalah relevan bila-bila masa dan ke atas semua ummat manusia. Islam relevan sejak lebih 1400 tahun dulu hingga ke hari khiamat.

Siapakah pemimpin kita hari ini? Baik kita terlibat ataupun tidak, kita tidak dapat menolak bahawa pemimpin nombor satu Malaysia pada masa ini ialah Dr. Mahathir Mohamad. Beliau diangkat menerusi proses demokrasi. Apakah kita terlibat atau tidak dengan perlantikannya, sebagai sebuah negara yang mengamalkan demokrasi kita kena menerima sebagai pemimpin kita. Secara

tidak langsung kita juga sama-sama turut bersubahat mengangkatnya di atas kerusi takhta pemerintahan kerana kita secara tidak langsung menerima sistem demokrasi.

Dalam amalan demokrasi golongan minoriti akur kepada keputusan majoriti walaupun segala tindakan dan keputusan itu belum tentu benar dan betul. Disebabkan parti yang didokong oleh Mahathir, iaitu Umno yang berkerjasama dengan parti-parti lain mewujudkan Barisan Nasional, menang, maka beliaulah berhak dilantik menjadi pemimpin. Kita tidak perlu persoal apakah kriteria yang diambil oleh BN mengikut kehendak agama atau pun tidak. Itu soal mereka. Apa yang perlu kita hadapi ialah dari kacamata kita sebagai bangsa Melayu dan Islam. Apakah kriteria ataupun ukuran yang dikenakan itu memenuhi kehendak agama dan perintah Allah.

Iya, Mahathirlah pemimpin Malaysia hari ini. Beliau menjadi Perdana Menteri sejak tahun 1982 lagi. Hari ini sudah 17 tahun beliau menjadi PM. Mahathir adalah di antara ketua negara Asia yang paling lama selepas tertumusnya rakan diktator beliau Suharto di Indonesia pada tahun 1997.

Apakah kita masing-masing sudah membuat penilaian dan pemeriksaan yang jitu dan mendalam ke atas Mahathir? Sudahkah kita memeriksa fizikal dan minda beliau selaku pemimpin? Sudahkah kita menyuluh perilaku dan gerak gerinya? Kebanyakan orang Melayu suka mengikut dan menuruti sahaja. Mereka akan mudah akur dan tersihir pada sesuatu jika ramai orang kagum dan menyokong sesuatu itu. Falsafah demokrasi, minoriti mesti ikut majoriti terikut-ikut ke dalam semua aspek kehidupan orang Melayu. Perkara ini menjadi satu fenomena yang boleh melemahkan orang Melayu.

Sebenarnya sikap seperti itu salah. Agama Islam dan naluri suci kita tidak menyuruh kita bersetuju atau bersekongkol dengan

apa-apa juga kemungkaran. Kita diberikan hak dan kebebasan di dalam menyangkal sesuatu yang tidak benar. Kita diminta menyuarakan sesuatu itu dengan jujur dan berani, apabila kita menyakini ianya benar ataupun sebaliknya. Katakan yang benar itu benar dan yang salah itu salah. Perlembagaan negara juga memberi ruang dan jaminan tentang hak-hak dan kewajiban itu. Sayang kadang-kadang kita buta mengenai hak dan kewajiban kita. Mungkin ada setengah daripada kita belum pun membaca dan memahami perlembagaan negara ini.

Selama 17 tahun kita menerima dan menuruti Dr. Mahathir sebagai pemimpin tanpa membuat sebarang koreksi ke atas dirinya. Kita menerimanya sebagai pemimpin yang benar dan tidak ada kesalahan. Orang-orang Umno khususnya tersihir dalam perkara ini. Mereka yang ada kepentingan dan mendapat tips daripadanya terus menyanjungnya sebagai dewa suci. Mereka terperosok dan kagum dengan Dr. Mahathir walaupun ada bab-bab tertentu Dr. Mahathir jelas menyeleweng, zalim dan kejam.

Selama ini orang beranggapan peribadi Mahathir paling bersih. Benarkah? Sebenarnya Mahathir juga punya dosa seperti mana pemimpin lain. Beliau juga tidak sebersih yang disangkakan. Pendedahan yang dibuat oleh Marina Yusuff benar-benar mengejutkan. Marina Yusuf telah mendedahkan beliau tahu siapa yang Mahathir bawa masuk ke pejabatnya di Parlimen. Tentunya pendedahan Marina itu bukan sekadar hendak suka-suka. Tentu ianya ada *proof* dan bukti yang jelas.

Kita menanti penuh sabar pendedahan Marina seterusnya, siapakah gerangan perempuan itu? Sayang hingga ke hari ini Marina belum mendedahkan identiti wanita itu. Ini menyebabkan isu skandal Mahathir itu sudah dilupakan. Dan yang buruknya menyebabkan ada orang menuduh wanita itu Marina sendiri maka beliau enggan mendedahkannya. Jika wanita itu Marina, apa

sanggupkah Marina mendedahkan? Kenapa Marina mengambil masa terlalu panjang untuk mendedahkan identiti perempuan berkenaan?

Baiklah mari kita sama-sama mengkaji dengan tulus ikhlas, apakah Dr. Mahathir seorang pemimpin yang baik dan benar-benar ideal. Apakah beliau seorang pemimpin yang beriman dan bertakwa? Untuk membuat kajian ini kita mengambil pendekatan dari sudut agama sebab kita beragama Islam. Islam atau agama adalah perlombagaan ataupun peraturan yang paling mutlak dan suci bersih. Agama adalah mizan yang adil dan paling tepat timbangannya. Jika kamu mahu mengukur seseorang ukurlah dengan tiga perkara, keturunannya, keperibadiannya dan agamanya.

Islam sudah menggariskan dengan begitu mendalam dan teratur sekali dalam perihal memilih pemimpin. Sejarah terdahulu patutlah dijadikan iktibar didalam pemilihan pemimpin atau pun didalam kita hendak meneropong mereka apakah layak atau tidak menjadi pemimpin.

Konsep yang jelas di dalam Islam ialah beriman dan bertakwa. Iman dan takwah yang menjadi teras konsep kepimpinan di dalam Islam. Iman dan takwa yang menjadi syarat utama untuk seseorang itu layak ataupun tidak diangkat sebagai pemerintah (pemimpin).

Kenapa tidak, seorang yang beriman kepada Allah dia akan senantiasa taat dan berada di atas landasan yang betul. Seorang yang takwa mereka senantisa akan takut dan hormati kepada Allah daripada menyeleweng, dan sangat menjaga dirinya dari mengkhianati tanggungjawab dan amanah Allah. Mereka juga senantiasa mengawal diri daripada bertindak melampau batas-batas yang dibenarkan. Seorang yang beriman tidak akan membantah perintah Allah. Seorang yang beriman tidak akan mengaibkan orang lain tanpa usul periksa. Seorang yang beriman tidak akan berkata-kata

yang boleh menyebabkan iman dan tauhidnya rosak.

Apakah Dr. Mahathir seorang pemimpin yang beriman dan bertakwa? Sebenarnya bukan mudah untuk kita menyuluh ke dalam gua jiwa seseorang. Allah sendiri melarang kita mengatakan kepada orang lain apa lagi dalam perkara yang seni dan bersifat ghaib. Namun Allah memberi hidayah kepada kita untuk membuat penilaian daripada segi fizikal menerusi percakapan, perbuatan dan pemikirannya. Kita dibenarkan membuat penilaian dari aspek itu. Akhlak adalah cermin yang menggambarkan hati seseorang. Akhlak adalah pakaian orang yang beriman. Sebab itulah Allah zahirkan kita di atas dunia ini. Menerusi percakapan kita tahu apakah seseorang itu baik atau tidak. Begitu juga bentuk pemikiran dan perbuatannya. Orang mukmin itu menjaga tutur bicaranya agar tidak menyinggung sesama saudaranya dan kufur kepada Allah.

Allah berikan akal adalah untuk dijadikan alat bagi kita mengukur sesuatu. Jika kita tidak menggunakan akal atau peralatan yang diberi, kita adalah orang yang zalim. Zalim kepada diri sendiri, bangsa sendiri, agama sendiri dan seterusnya zalim kepada Allah. Kita ada makanan tetapi kita tidak makan sehingga menyebabkan kita mati kebuluran, itulah dinamakan zalim. Kita ada makanan dan kaya raya tetapi kita membiarkan saudara kita mati kebuluran, itu juga zalim.

Begitu juga kita dianugerahkan akal, tetapi tidak mahu menggunakannya dalam membuat pertimbangan, maka itulah zalim namanya. Kita mempunyai hak (undi) untuk memilih pemimpin yang baik, tetapi kita menggadaikan hak kita dengan wang ringgit atau harta benda, itu namanya zalim.

Sebelum kita menilai apakah Mahathir seorang pemimpin beriman dan bertakwa, elok kalau kita mengetahui apakah yang dimaktubkan di dalam ciri-ciri dan sifat-sifat orang beriman dan bertakwa itu? Apakah yang digariskan sebagai orang-orang yang

dikatakan beriman dan bertakwa. Apabila kita mengetahui dan mengenali ciri-ciri itu, mudahlah untuk kita membuat pengukuran dan penilaian ke atasnya. Secara kasar seseorang yang beriman itu ialah mereka yang menguasai ilmu tauhid, fekah dan tasauf. Kebiasaan seseorang yang beriman itu memiliki ketiga ilmu ini.

Mereka yang beriman ialah orang yang mengakui akan kebesaran Allah SWT dan keagungan RasulNya, Muhammad SAW. Tunjang iman itulah seperti mana yang terkandung di dalam kalimah syahadat. *Bahawa aku mengaku tidak ada Tuhan melainkan Allah dan Muhammad itu persuruhNya*. Itulah tunjang iman. Sebab itu syahadat dinamakan roh tauhid.

Apabila kita menerima tunjang itu, maka kita harus menerima segala macam cabang dan ranting-rantingnya termasuk juga daun-daunya. Cabang kepada keimanan itu ialah perintah-perintah Allah yang diberikan kepada manusia baik secara nyata ataupun ghaib. Manakala dahan-dahannya ialah peraturan-peraturan hidup yang ditetapkan dengan segala hukum hakamnya. Ibadat sunah bolehlah disifatkan sebagai ranting-ranting dan daun-daun yang menyubur dan mendinginkan batang. Daun-daun dan ranting kering adalah amalan-amalan sunat untuk menampung amalan wajib. Ia boleh juga disebut sebagai kiwi untuk polis agar ia kelihatan cantik dan bersinar.

Tetapi ada juga manusia yang menafikan kepentingan ranting dan daun-daun serta kulit ini. Kata mereka itu tidak penting, dan lebih malang lagi kata mereka kerja ibadat sunat itu boleh menyekat kemajuan dunia. Sesungguhnya orang yang beranggapan begitu mereka yang malas.

Iman yang mutlak bukan sahaja setakat mengakui adanya Tuhan dan Rasulnya, tetapi bersedia patuh, taat, hormat dan yakin kepada segala perintah-perintahNya. Ini termasuklah dalam soal

ibadat, munaqahat dan muamalat. Iaitu soal amal ibadat, pemerintahan, peniagaan dan sebagainya. Semua itu diatur demikian rupa dengan begitu tersusun dan bersistematik sekali.

Jika kita menolak mana-mana peraturan atau perintah itu dengan mengatakan, atau menganggap ianya tidak sesuai, kerana ianya bertentangan dengan naluri atau zaman (era), itu bukanlah beriman namanya. Sebaliknya itu adalah orang yang engkar ataupun kufur atau pun munafik. Seseorang yang beriman bukan berbuat apa yang nafsunya kehendaki, tetapi berbuat apa yang Tuhan kehendaki dan orang ramai kehendaki serta berusaha untuk menguatkuasakan perintah dan larangan itu ke atas rakyat atau orang ramai.

Kita tidak boleh mengambil sebahagian sahaja dan membuang sebahagian yang lain. Kita tidak boleh bersikap memilih, mana-mana hukum yang sesuai dengan selera kita, kita ambil dan tidak kita buang dengan alasan ianya menyusahkan ataupun tidak sesuai, dengan zaman ini. Kita tidak boleh menjadikan masyarakat majmuk sebagai alasan untuk tidak melaksanakan segala perintah dan larangan itu.

Manakala pengertian bertakwa pula ialah takut. Takut dalam istilah ini termasuk menghormati, dan melaksanakan perintah bukan sahaja dengan fizikal tetapi juga dengan hati. Bukan setakat tidak melakukan perbuatan yang dilarang, tetapi turut juga tidak terlintas untuk melakukannya dan bersedia pula mencegah jika ianya berlaku di hadapan mata. Mencegah kejahatan dan kemungkarannya adalah tanggungjawab bagi mereka yang beriman dan bertakwa. Tidak dinamakan beriman dan bertakwa kalau seseorang itu hanya melihat sahaja kemungkarannya seperti maksiat, kezaliman, ketidakadilan bermaharaja lela di hadapan mata mereka. Apa lagi lebih-lebih tidak beriman dan bertakwa seseorang itu kalau dia sendiri terlibat atau bersubahat melindungi

kemungkaran; penyelewengan, kezaliman, ketidakdilan dan sebagainya.

Bertakwa juga mereka yang bersedia mematuhi setiap suruhan dan tuntutan Allah itu tanpa berbelah bagi dengan penuh ikhlas, reda dan yakin. Tidak sesekali mempersenda, memperlekeh ataupun meremehkannya dengan anggapan dan tuduhan yang buruk terhadap sesuatu yang menyentuh soal ibadat dan perintah Allah dan juga sunnah Rasulullah.

Berdasarkan kepada keadaan itu bolehlah kita membuat ukuran terhadap pemimpin negara ini seperti Dr. Mahathir dan lain-lain. Kewajaran menggunakan kayu pengukur ini kerana kita beragama Islam. Bagaimana pun ukuran ini barang kali tidak berapa tepat kalau digunakan ke atas lain-lain pemimpin (menteri) yang tidak beragama Islam kerana mereka siang-siang lagi tidak mengakui akan keesaan Allah dan keagungan Muhammad SAW.

Apakah Mahathir seorang beriman dan bertakwa? Persoalan ini tentunya kurang enak kepada beliau dan kronisnya kerana soal iman itu tersemi di dalam hatinya. Tetapi berdasarkan asas-asas tadi; perbuatan, percakapan dan pemikiran dapat kita buat ketentuan dan penilaian. Namun sebagai rakyat yang mendambakan kesejahteraan didunia dan akhirat yang terlibat di dalam mengangkatnya kita perlu menyiasat dan mengkaji perkara ini. Satu perkara yang perlu diingat kita jangan mudah menerima seseorang itu beriman dan bertakwa kerana ianya mengaku Islam. Tidak. Belum tentu orang yang mengakui Islam itu dia sudah beriman dan bertakwa. Ada orang Islam yang menghinati agamanya dengan menggunakan nama agama atau berselindung di sebalik topeng jubah dan serban.

Menjadi tanggungjawab kita selaku rakyat untuk menilai apakah pemimpin yang kita sokong dan hendak pilih itu seorang soleh ataupun tidak. Apakah ianya seorang manusia beriman kepada

Allah atau tidak. Kita wajib mengetahui latar belakangnya. Sebab ini di tuntut oleh Islam; apabila kamu hendak mengangkat di kalangan kamu menjadi pemimpin hendaklah kamu memilih yang baik, mereka yang beriman dan bertakwa kepada Allah.

Dan dengan tegas Allah melarangkan daripada melantik orang-orang kafir menjadi pemimpin. "*Jangan lantik orang-orang kafir menjadi pemimpin atau wali kerana mereka mengkhianati kamu.*"

Sekiranya kita mengangkat mereka yang tidak beriman sudah tentu kita semua akan hancur. Negara kita akan jadi porak peranda. Nasib bangsa tidak akan terbela. Jika kita angkat penyamun jadi pemimpin sudah tentu harta dan khazanah negara akan disamun dan dibahagi-bahagikan kepada sanak saudaranya. Jika samseng yang kita angkat menjadi pemimpin maka rakyat akan ditindas, dan dipergunakan untuk kepentingannya. Jika seorang pembohong menjadi pemimpin maka rakyat akan ditipunya.

Kalau pemimpin yang kita pilih itu baik, maka akan jadi baiklah negara dan rakyat seluruhnya. Perkara ini dijamin oleh Allah SWT. Kalau pemimpin itu beriman, ia akan membawa ummat (rakyat) ke arah kebaikan.

Berbalik kepada pemimpin Malaysia Dr. Mahathir Mohamad, apakah beliau boleh disifatkan sebagai seorang pemimpin yang beriman dan bertakwa? Jika asas-asas atau ciri-ciri pemimpin yang beriman dan bertakwa seperti disebut di atas dijadikan pengukuran, jelas bahawa Dr. Mahathir tidak termasuk didalam pemimpin yang beriman dan bertakwa. Malahan beliau boleh diketogorikan sebagai pemimpin yang sudah kufur dan munafik.

Kenapa kita berkata begitu, kerana kita saksi dan tahu sendiri apa yang beliau lakukan sejak 17 tahun menjadi Perdana Menteri. Apa yang beliau tidak lakukan, semua beliau lakukan termasuk mempersendakan urusan agama, terlibat dengan penyalahgunaan

kuasa dan kedudukan dan sebagainya. Paling malang dan mendukacita apabila beliau memperlecehkan Islam dan mempermainingkan sunnah Rasulullah dan tidak yakin kepada janji dan ketetapan Allah.

Bukan itu saja paling menyedihkan juga ialah apabila membuktikan kemungkaran bermaharaja lela dan sesetengahnya beliau terlibat secara langsung. Tanggung jawab dan amanah sebagai pemimpin sudah dinodai, di mana seorang pemimpin sepatutnya melindungi rakyat dan bukannya menyeksakan rakyat.

Mahathir juga turut melindungi penjenayah. Pendedahan yang dibuat oleh bekas Timbalan Perdana Menteri menjelaskan perkara itu. Selain itu beliau juga turut menyusahkan rakyat. Akibat daripada dasar pensyarikatan Malaysia menyebabkan rakyat terpaksa memikul beban. Rakyat kena membayar cukai yang tinggi, tol, yuran pengajian dan sebagainya.

Tidak cukup dengan itu beliau dan kronisnya menggunakan wang rakyat untuk kesenangan beliau dan kronisnya. Dan kesan paling terbaru hasil daripada dasar penswastaan Dr. Mahathir ialah, bank Bumiputera yang diwujudkan hasil dari kongres ekonomi bumiputera kemungkinan akan lenyap tidak lama lagi. Proses "pemusnahan" bank itu sedang berlaku sekarang ini oleh kronis Dr. Mahathir. Tindakan inilah yang menyebabkan beliau dan kuncu-kuncunya di gelar Firaun moden.

Pemimpin yang benar-benar beriman dan bertakwa tidak akan melakukan demikian. Mereka bukan saja takut kepada rakyat tetapi takut akan disoal oleh Allah SWT.



*Dr Mahathir dan Siti Hasmah sedang berihat dan bergurau senda. Siti Hasmah memiciti Dr Mahathir. Latar belakang tempat mereka bergurau senda adalah sebuah rumah kampung berdindingkan buluh. Realiti kehidupan mereka sebenarnya tidak seperti yang digambarkan ini. Senangnya hati mereka sempat bergurau senda lagi walaupun ekonomi meleset....*

# **MAHATHIR PASTI KALAH**

**5**

**B**ARANG kali terlalu awal dan melampau untuk kita memberi lambaian selamat tinggal dan salam perpisahan kepada Dr. Mahathir bin Mohamad selepas pilihanraya umum akan datang. Sebagai orang Islam kita dilarang mendahului takdir. Sebaliknya kita hendaklah tawakuf dan bersabar menghadapi apa-apa takdir daripada Allah. Adalah bertentangan dengan ajaran agama jika kita membuat sesuatu *prediction*, sebab apa yang akan berlaku di hari esok adalah milik Allah. Kita hanya bisa menghitung peristiwa semalam untuk dijadikan iktibar dan bukan merumus dan membuat keputusan sesuatu yang bakal ditakdirkan hari esok.

Meskipun kita sudah mengetahui detik-detik kematian tidak berapa lama lagi, namun kita diminta agar terus berdoa dan memohon kepada Allah agar kita sihat sejahtera. Kita dipinta agar berikhтир hingga ke akhirnya. Kita dilarang sama sekali memohon agar Tuhan mencabutkan nyawa kita.

Demikian amalan dan pegangan kita. Islam adalah agama yang progresif. Jadi apabila saya mengatakan dan mengajak semua orang mengucapkan selamat tinggal kepada Dr. Mahathir, pelawaan

itu adalah dikira cuba mengatasi takdir. Seolah-olah saya mendahului kehendak dan keputusan yang bakal ditentukan Allah menerusi rakyat di dalam pilihanraya akan datang.

Tetapi salahkah kalau kita membuat *prediction* begitu? Salahkah kalau kita mengatakan sesuatu itu hasil daripada apa yang kita lihat dan kita alami sendiri? Rasanya tidak salah, malah kita akan dikatakan bijak. Pepatah Melayu ada mengatakan sediakan payung sebelum hujan. Bertindak sebelum terlewati. Maknanya kita disuruh membuat persiapan bagi menghadapi apa-apa yang bakal berlaku di masa akan datang.

Jika kita seorang ahli hakikat yang khasyafah kita akan dapat melihat sesuatu yang bakal berlaku di hari esok. Kita tahu apa yang tersembunyi di sebalik tabir. Sebab itulah para wali Allah dan ahliLah mereka dapat membuat *prediction* dengan tepat tentang sesuatu yang bakal terjadi. Bukan itu saja sesetengah mereka tahu saat-saat dan detik kematian mereka.

Berdasarkan kepada hakikat itulah maka saya membuat pene-gasan untuk memberi lambaian dan mengucapkan salam perpisahan kepada Dr. Mahathir. Tetapi sebelum itu jangan anda silap membuat pentafsiran terhadap kata-kata ini. Cuba selami apakah maksud sebenarnya. Pengertian ini bukan selapis, tetapi mempunyai makna beberapa lapis. Kita diajar agar berlapik di dalam berkata-kata. Berhikmah di dalam bertindak. Dan jauh sekali untuk saya mengakui saya seorang ahli hakikat?

Selamat tinggal, bermakna sama-sama kita tinggal Dr. Mahathir di dalam pilihanraya nanti. Walaupun beliau enggan meninggalkan kita dan masih lagi cuba memujuk kita, tetapi sama-sama kita meninggalkannya. Sama-sama kita mengucapkan *sanyonara* kepadanya. *Sayonara* Dr. Mahathirku (sebenarnya Mahathir mu). Insya-Allah kita akan berjumpa di akhirat kelak.

Hakikat dan realiti hari ini rata-rata orang sedang membuat persiapan bagi menghumbangkan Dr. Mahathir ke dalam telaga buruk. Selepas pilihanraya akan datang Dr. Mahathir tidak akan menjadi Perdana Menteri lagi. Itulah harapan dan cita-cita orang ramai. Orang ramai tidak mahu menjelang abad ke 21 nanti, alaf baru Malaysia masih berada di takak lama dengan Perdana Menterinya Dr. Mahathir bin Mohamad. Tidak!

Ekonomi Malaysia akan terus lembab selagi Dr. Mahathir menjadi Perdana Menteri. Disebabkan ruputasi dan imej Mahathir buruk di luar negara maka pelabur asing kurang minat untuk datang melabur di sini. Para pelabur sedang menanti perubahan tampuk pemerintahan sebelum mereka melabur. Mereka yang ada hari ini pun bila-bila masa bersiap sedia untuk menarik pelaburan. Adalah dijangkakan selepas September ini keadaan ekonomi makin tenat.

Saya bukan berkata seiseng-isengnya. Tetapi ia berdasarkan kepada realiti dan perkembangan semasa. Orang sudah membenci dan cemuh kepada Dr. Mahathir. Biasalah, kalau sesuatu itu sudah terlalu lama, maka ia akan dicemuh dan dipuasi (jenuh) oleh orang. Sudah menjadi fitrah dunia, kalau terlalu lama sangat orang akan benci. Bagaimana bijak, pandai, berwawasan sekali pun orang benci juga. Apa lagi kalau tindak tanduk kita sudah melampau batas.

Sebenarnya Dr. Mahathir dan anak beranaknya sendiri juga mengetahui yang rakyat sudah mula muak dengannya. Mahathir insaf dan sedar hakikat ini. Tetapi kerana nafsu besarnya, egonya sahaja yang menyebabkan beliau enggan menerima. Barang kali sudah menjadi prinsip ataupun sifat orang seperti Mahathir tidak boleh dicabar dan diasak dia akan melawan dan menyerang.

Dr. Mahathir seorang yang tidak boleh ditegur dan dinasihati. Sesiapa yang menegurnya orang itu akan jadi mangsa. Nasib yang menimpa Datuk Mohamed Rahmat dan Datuk Sabbaruddin Chik

ialah kerana mereka cuba menasihati Mahathir. Mat Rahmat dan Sabbaruddin Chik dikatakan menasihat Dr. Mahathir agar berhenti jika sayangkan Umno dan BN. Menurut maklumat yang mereka berdua dapat di dalam Umno dan BN, parti itu akan kalah dalam pilihanraya akan datang jika Dr. Mahathir terus berdegil dan enggan berhenti.

Mahathir sedar akan hari-harinya seorang Perdana Mentari sudah berada di hujung. Baik usia, populariti dan kemampuannya sudah menunjukkan tanda-tanda bahawa dia sudah *monopous* perlu berhenti. Tanda-tanda ini wujud sejak beberapa tahun lagi, tetapi kerana ego tadi, Mahathir jadi tidak nampak. Untuk menghalalkan cita-citanya maka beliau mencipta puisi "Perjuangan Belum Selesai". Perjuangan apa lagi? Puisi itu untuk menarik simpati agar beliau terus kekal di takhta kekuasaan.

Justeru kerana menyedari bahawa rakyat kata pergi, dan kubur kata mari itulah maka Dr. Mahathir terlihat tergesa-gesa akhir-akhir ini. Banyak perancangan dan program dilaksanakan didalam masa yang begitu sempit dan terkejar-kejar. Mahathir semacam orang sedang mengejar keretapi yang telah melewati perhentian. Beliau kegelisahan seperti orang sakit perut hendak melepas hajat tetapi jamban tak ada.

Beliau juga resah dan gelisah. Beliau cemas dan takut. Beliau bimbang dan walang. Beliau ragu-ragu dan was-was. Beliau menjadi seperti kucing kejatuhan anak. Cacing kepanasan. Keadaan ini amat ketara sekali. Dan kerana situasi itulah maka kesilapan demi kesilapan beliau lakukan tanpa sedar beliau. Menjadikan beliau merepek dan merapu untuk melegakan rasa gelisah dan cemas itu. Begitulah nasib dan keadaan orang yang sedang di kunjungi malaikat (rakyat) di dalam politik. Semua kerja tidak menjadi.

Banyak tindakan beliau yang dibuat secara tergesa-gesa.

Perpindahan pejabatnya dari Kuala Lumpur ke Putrajaya adalah salah satu contoh. Dr. Mahathir bukan tidak bisa bersabar sehingga pejabat itu siap sepenuhnya, tetapi kerana beliau telah dikejar oleh bayangan ketakutan. Lantaran itu beliau tidak boleh sabar. Beliau bimbang. Beliau resah dan rungsing. Apa yang menghantui ialah mengenai nasibnya. Dr. Mahathir bimbang takut rumah pejabat baru serba mewah itu tidak sempat diduduki. Maka beliau terpaksa juga berpindah walaupun belum siap sepenuhnya.

Khabarnya beliau juga bercadang untuk berpindah ke istana baru pada 1 Julai lalu. Tarikh itu telah diberikan oleh para nujum dan bomohnya, tetapi tidak jadi. Khabarnya disebabkan nujum dan bomohnya belum memberi tarikh baru maka perpindahan ke istana RM 200 juta terpaksa ditangguhkan.

Adalah satu kerugian besar kepada Mahathir jika beliau tidak sempat tidur, bermanja dan mengelus-elus kepala Siti Hasmah di atas kasur permaidani di dalam istana itu. Betapa kecewanya Dr. Mahathir. Alangkah terkilannya beliau jika tidak dapat tinggal semalam di situ. Betapa angan-angannya untuk menjadi Perdana Menteri pertama di abad akan datang yang mempunyai mahligai baru dan moden berharga ratusan juta terlepas begitu saja.

Kecanggihan mahligai PM tidak dapat dinafikan. Ia lengkap dengan segala kemudahan yang tercanggih. Mahligai yang terletak di atas bukit yang di hadapannya terbentang tasik buatan sungguh mengagumkan. Ia seperti sebuah istana khayalan yang dijelaskan menjadi realiti.

Mahligai itu bukan saja lengkap dengan bilik penginap para tetamu, bilik mesyuarat, tempat berjudi dan sebagainya, tetapi lengkap dengan terowong sepanjang 16 km menuju ke Lapangan Terbang Antarabangsa Sepang. Pembinaan terowong itu menjadi tanda tanya untuk apakah sebenarnya. Apakah ia saja-saja dibina untuk suka-suka atau ada tujuan lain. Ada orang mengatakan

terowong itu bagi menyenangkan Dr. Mahathir dan kuncukannya melarikan diri jika berlaku sesuatu yang tidak dingini. *Walahu alam*. Tapi saya tidak fikir demikian.

Kita mempertikaikan untuk apa istana itu sebenarnya. Kenapa hanya untuk keselesaan dan keseronokan Dr. Mahathir, isteri dan anak-anak serta cucu, kerajaan dan rakyat terpaksa membelanjakan sebanyak RM 200 juta. Alangkah baiknya kalau wang sebanyak itu dibelanjakan untuk membangun rumah kos rendah untuk rakyat yang masih belum mempunyai rumah.

Melihat kepada kehebatan mahligai itu teringat kita kepada diktator Presiden Rumania Cacaseau yang membina istana kemudian diruntuhkan oleh rakyat. Begitu juga dengan Hitler yang membina terowong di istananya kemudian beliau mati terperangkap di dalam terowong itu. Dan jika diamati kepada seni bina dan bentuk mahligai Perdana Menteri itu ia saling tidak tumpah seperti istana The Great Czars yang mengakui dirinya Maha Agung. Czars kemudian ditentang oleh rakyat Russia menerusi revolusi Bolshevik.

Perpindahan tergesa-gesa Dr. Mahathir ini juga sekali lagi menjelaskan tentang perangai budak-budak yang ada kepada Dr. Mahathir. Begitulah sifat budak, mereka tidak sabar bila hendakkan sesuatu. Fikiran mereka sebenarnya penuh imiginasi dan khayalan. Bagi mereka apa yang mereka khayalkan itu, itulah yang mereka hendak jelmakan di alam nyata ini. Kadang-kadang mereka mahu jadi seperti *superman*, *ultraman*, *batman* dan "Mahaman".

Selain itu ada dua tiga perkara lagi yang Mahathir kelihatan tergesa-gesa dan seperti mengejar sesuatu. Pembukaan Lapangan Terbang Antarabangsa Sepang, (KLIA) juga dibuat dalam keadaan tergesa-gesa. Lapangan Terbang itu khabarnya belum bersiap sedia sepenuhnya untuk beroperasi, tetapi kerana keinginan Dr. Mahathir membuka-buka, terpaksa lapangan terbang itu dibuka. Mahathir mahu mendahului Korea Selatan yang juga pada masa itu sedang

menyiapkan airport barunya. Walhasil kerana keinginan Mahathir itu, selepas dua hari KLIA beroperasi, maka seluruh airport itu jam. Puluhan penumpang terkandas berjam-jam dan keadaan KLIA menjadi kelam kabut.

Perasmian dan pembukaan MSC juga dibuat dalam keadaan tergesa-gesa. Meskipun MSC belum bersedia tetapi Dr. Mahathir mahu ia dilancar segera. Tujuannya tidak lain tidak bukan kerana hendak menunjuk-nunjuk kepada dunia, bahawa keadaan politik dan ekonomi di Malaysia stabil. Malaysia tidak menghadapi apa-apa masalah walaupun beliau memecat Timbalan Perdana Menteri. Projek itu satu lagi projek yang lebih merupakan hendak tunjukkan imej Malaysia dan bukannya untuk rakyat. Tidak banyak rakyat yang dapat nikmat daripada projek itu melainkan hanya dapat dengar saja.

Mahathir tidak fikir kerana semata-mata hendak memenuhi kehendak nafsunya ia telah menyusahkan ratusan ribu orang. Kerana semua projek itu ingin disegerakan menyebabkan ramai orang terpaksa kerja lebih masa. Ramai boroh yang tidak dapat lelapkan tidur. Banyak kontrektor terpaksa berhutang dan membuat pinjaman. Nasib sub-kontrektor di projek Putrajaya juga akan mengalami nasib yang sama dengan kontrektor dan penaja Sukom. Sukom 98 mengalami kerugian kira-kira RM 18 juta. Banyak kontrektor kecil bumiputera yang ingin menumpang nikmat terpaksa gulung tikar kerana kontrektor besar tidak bayar. Kontrektor besar pula tidak boleh bayar kerana Syarikat Sukom *Ninety Eight* tidak mempunyai wang. Sukom tersungkur dan rugi.

Mengenangkan kerena Mahathir ini tak ubah seperti maharaja di zaman purba yang memperhambakan rakyat untuk kesenangan mereka. Mereka akan kerah dan paksa rakyat untuk menyiapkan sesuatu projek untuk mereka. Mereka menjadikan rakyat sebagai robot. Sebagai hamba demi memenuhi kehendak nafsu serakah

mereka. Cuma bezanya hamba di zaman Mahathir ini dibayar upah dalam gaji. Sementara hamba di zaman maharaja purba tidak pernah memberi upah kepada rakyat yang melakukan kerja untuk mereka. Malahan mereka bertindak lebih kejam lagi dengan membunuh pekerja itu kerana bimbang sesuatu rahsia tentang projek itu akan terbongkar.

Kenapa Mahathir jadi kelam kabut dan hilang kesabaran? Kenapa beliau jadi resah dan gelisah? Kenapa beliau takut dan bimbang? Jawabanya ialah kerana beliau tahu nasibnya sudah berada di hujung senja. Mahathir tahu usia kekuasaannya sudah pendek. Mahathir pandai membaca situasi hari ini. Pilihanraya yang bakal menjelang nanti merupakan sebilah belati yang tajam. Merupakan seutas tali gantung yang siap terbuka untuk menjerut lehernya. Mahathir tahu itu. Dia akan maut di hujung jari rakyat seperti para diktator dunia.

Mahathir tahu tentang sambutan hangat kepada ceramah anjuran parti alternatif. Puluhan ribu orang yang hadir terdiri dari semua peringkat dan kedudukan. Di mana-mana sahaja ceramah parti alternatif orang ramai akan membanjiri. Inilah menakutkan Dr. Mahathir, menyebabkan beliau ketar lutut dan tidak bisa tidur malam. Bila dibandingkan dengan ceramah yang dihadirinya sungguh merisaukan. Paling ramai orang yang hadir diceramahnya, 10,000 orang itu pun dibayar dan diangkut dengan bas dan lori.

Ada juga orang mengatakan jumlah kehadiran di tempat ceramah tidak boleh diambil kira. Pengalaman lalu menjadikan orang takut dan kurang percaya. Tahun 1990 ramai yang membanjiri ceramah Gagasan Rakyat. Tetapi apabila dibuka peti undi, BN juga yang menang. Ada betul juga kata-kata itu. Tetapi sesuatu hal yang ketara dan berbeza hari ini ialah *mood* orang ramai.

Hari ini *mood* rakyat sungguh berbeza. Tahun 1990 dan 1995 dulu rakyat sudah marahkan Dr. Mahathir. Rakyat sudah mu-

menolak Dr. Mahathir. Tetapi kerana sebab-sebab tertentu, menyebabkan rakyat tidak marah sepenuhnya. Sebab ketika itu tokoh yang bakal mengganti Mahathir ada bersamanya. Jikan BN ditolak, maka tokoh itu tertolak sama. BN tidak ditolak kerana orang takut tokoh itu turut hilang.

Tetapi hari ini tokoh itu sudah tidak bersama Dr. Mahathir. Lebih ironis lagi tokoh itu juga berusaha untuk menolak Dr. Mahathir. Pengaruh, kekuatan dan semangat yang dibawa oleh tokoh itu apabila dicampur dengan semangat, kekuatan pembangkang menjadi lebih besar. Inilah yang berlaku.

Apa yang dapat disimpulkan, kekuataan BN semakin hari semakin mengecil, persis ketulan ais di tengah panas, sementara semangat dan kekuatan Barisan Alternatif, semakin hari semakin membesar, kuat dan padu seperti busu yang sedang dibina oleh anai-anai.

Ada orang berfikir bahawa BN akan main kotor di dalam pilihanraya nanti. Isyarat ini telah diberi sendiri oleh Mahathir. Kata-nya pilihanraya akan datang yang paling terkotor. Kenapa Mahathir berkata begitu? Mungkin beliau ada cita-cita untuk mengotor-kan pilihanraya. Tidak mustahil kerana beliau sudah terdesak dan demi untuk mempertahankan kuasa beliau akan lakukan sesuatu yang diluar dugaan.

BN akan melakukan penipuan, penyelewengan dan segala macam tektik dan strategi untuk menjamin kemenangan.

Tetapi bagi saya, saya ketepikan soal segala penyelewengan dan kejahatan itu. Jika BN melakukan penipuan, mereka tahu. Kalau mereka menang, itu bermakna menang yang tidak sah. Hati kecil mereka akan tahu bahawa rakyat tidak sukakan mereka. Mereka tahu atas perbuatan itu mereka akan dikutuk oleh diri mereka sendiri. Jika mereka menang dengan cara tidak sah itu bermakna kerajaan lima tahun akan datang adalah kerajaan haram!

Berbalik kepada soal Mahathir tadi. Sebagai orang yang melakukan kesalahan, Dr. Mahathir tahu akan kesalahan itu. Beliau tahu beliau tidak dapat melindungi dosa-dosanya lagi. Beliau tahu rakyat sedang menuntut keadilan daripadanya. Rakyat kini sedang berusaha membuka pintu penjara bagi membebaskan Anwar untuk memasukkan Mahathir. Itulah menyebabkan beliau takut. Keadaan itulah menjadi beliau resah gelisah dan bimbang. Cemas dan kadang-kadang tidak dapat tidur malam. Bantal dirasakan kaca, tilam empuk dirasakan kerikil yang berbisa. Lantaran itu Dr. Mahathir tidak betah dan sering kali pindah randah.

Telatah dan kerena Dr. Mahathir hari ini yang tergesa-gesa juga secara tidak langsung menjelaskan Dr. Mahathir sendiri sudah tidak mempercayai kepada dirinya. Beliau sudah tidak percaya kepada pengaruh dan sokongan rakyat kepadanya. Kata-katanya sendiri menunjukkan ketidakyakinan itu. Ketika berucap dalam *road show*nya di Perak beliau membayangkan mungkin ada ahli BN yang tidak akan mengundi BN. Itu menunjukkan beliau sudah tidak yakin dengan dirinya sendiri. Mahathir dapat menyelami apa yang sedang bergelora di dalam dada ahli-ahli parti BN sendiri.

Gesaan Dr. Mahathir agar pemimpin mendekati pengundi dan berikan laporan tepat, membuktikan Dr. Mahathir hilang keyakinan kepada pengaruhnya sendiri. Beliau sudah tidak dapat percaya kepada ahli BN dan dia tahu apakah yang sedang bergelodak di dalam jiwa ahli-ahli BN sendiri. Hanya ahli yang mendapat kepentingan dan bayaran secara langsung sahaja yang akan tetap menyokong beliau. Itupun dalam terpaksa.

Keadaan itulah menyebabkan beliau menjadi hilang sabar. Menjadi fikirannya pendek. Menjadikan semua kerja dan programnya tidak betul. Strategi yang diaturnya perlahan-lahan memakan dirinya sendiri. Keris yang beliau hulurkan berpusing menikam dirinya sendiri. Menyebabkan beliau makin merepek dan me-

nyanyah tidak tentu pasal.

Demikian kalau Tuhan sudah menurunkan bala ke atas seseorang. Ada-ada sahaja sebab dan musababnya. Cuma Dr. Mahathir seorang yang kuat egonya, yang enggan tunduk kepada sesiapa dan cuba menegakkan benang basah. Sikap dan stail Mahathir samalah dengan diktator dunia. Kalau keadaan Dr. Mahathir hari ini duduk kepada orang lain, sudah lama mereka akan berundur. Tenguk Hussein Onn kerana seorang saja yang menentangnya (Sulaiman Palestin) beliau terus berundur. Jenis Hussein Onn jenis orang ada maruah dan air muka.

Begitulah keadaan Mahathir di hujung abad ke 21 ini; resah dan gelisah. Cemas dan takut. Beliau tiba-tiba menjadi hilang perdoman dan kekuatan diri. Semua itu sebenarnya isyarat yang ditunjukkan Tuhan tentang usia politik Mahathir semakin pendek dan bila-bila masa sahaja akan padam. Jika beliau terus bertanding dalam pilihanraya nanti, beliau pasti akan tertimbus. Kalau tidak beliau sendiri, tetapi parti yang dipimpinnya (Umno) akan menjadi mangsa kemarahan rakyat. Sesuatu yang mungkin pasti terjadi di dalam pilihanraya akan datang; Umno kalah tetapi BN yang menang. Dan kekalahan Umno hendaklah dipertanggungjawabkan kepada Mahathir.


**Apapun Mahathir pasti kalah!**



**Istana Perdana Menteri di Putrajaya berharga RM 200 juta. Lengkap dengan peralatan merawat jantung setaraf dengan peralatan di IJN. Ada terowong sepanjang 16 km tempat Dr. Mahathir, Siti Hasmah dan anak-anak main sembunyi-sembunyi.**



*Istana The Great Czars di Russia ini struktur dan senibinanya sama dengan istana Perdana Menteri di Putrajaya. Mungkin ilham untuk membina istana di Putrajaya itu diambil dari sini. Cuba bayangkan mana yang hebat? The Great Czars menggelarkan dirinya yang Maha Agong sementara Dr. Mahathir pula mengakui dirinya Maha.....*



*Inilah "mahligai" Nik Aziz di Pulau Melaka. Terbuka kepada semua rakyat. Tidak ada pengawal dan tidak ada terowong. Tidak ada mini bar dan tidak ada tempat berjudi. Semua lapisan rakyat boleh mengunjunginya bila-bila masa saja.*

# **KU LI DIJADIKAN PERKAKAS**

**6**

**D**ALAM satu percakapan dengan Tengku Razaleigh Hamzah diawal tahun 1990an beliau pernah mengkredit mengenai sikap Dr. Mahathir Mohamad. Menurut Ku Li Dr. Mahathir seorang jenis yang tidak akan mempedulikan siapa pemimpin selepas dia. Dr. Mahathir tidak akan menyiapkan siapa bakal menggantinya. Dr. Mahathir tidak seperti Tunku Abdul Rahman yang menyediakan Tun Razak sebagai pelapis. Sebaliknya menurut Ku Li, Dr. Mahathir hanya mementingkan dirinya semata-mata. Menurut Tengku Razaleigh, Mahathir jenis manusia yang hanya menjaga kepentingan dirinya saja tetapi tidak kepentingan orang lain.

Dalam pada itu beliau hanya bertanggungjawab terhadap negara ini semasa di dalam kekuasaannya, sebaliknya tidak akan mempedulikan apa yang berlaku selepas itu. Dr. Mahathir tidak memikir apa akan jadi pada Malaysia selepas ketiadaanya. Kesimpulan kepada interpretasi Ku Li itu bahawa Dr. Mahathir seorang pemimpin yang tidak bertanggungjawab terhadap masa depan negara dan nasib bangsa Melayu.

Sebab itu Dr. Mahathir tidak pernah memikirkan siapakah yang

akan mengambil alih teraju pemerintahan Malaysia selepas beliau. Dr. Mahathir tidak pernah mengemukakan sesiapa (secara pasti) akan menggantinya. Sekiranya *prediction* Ku Li itu benar, maka kata-kata Dr. Mahathir ingin melepaskan jawatan itu kepada timbalannya; baik sewaktu Anwar Ibrahim atau Abdullah Badawi hari ini adalah bohong semata-mata. Kata-kata itu tidak lebih daripada menanam tebu di bibir mulut saja. Pada hakikatnya Dr. Mahathir tidak pernah mengambil hirau apakah yang akan berlaku selepas ketiadaan beliau nanti.

Sekurang-kurangnya dua kali beliau membuat kenyataan umum, kononnya selepas beliau ialah Anwar Ibrahim. Bagi seorang yang bersifat amanah dan jujur, dia tidak akan mudah melupai kenyataan itu. Melainkan orang yang telah nyanyuk dan sakit akal fikirannya. Hendak tak hendak dia akan menunaikannya demi mengotakan apa yang diucapkannya. Tetapi dengan apa yang berlaku hari ini jelas membuktikan bahawa Dr. Mahathir tidak jujur dan ikhlas di dalam perkara itu.

Dan apabila ditanya Tengku Razaleigh bilakah agaknya Mahathir akan meletakkan jawatan, Ku Li ketawa menyinis, katanya, ‘Percayalah Sayuti, Mahathir tidak akan letakkan jawatan. Dia akan pegang sampai ke akhir hayat dan dia akan mati di atas kerusi Perdana Menteri.’ (Sama-sama kita tunggu dan tengok sejauh mana benarnya?)

Samada ketika itu Ku Li bermusuh dengan Mahathir ataupun tidak, tetapi itulah kata-kata Ku Li. Itulah pandangan beliau terhadap Dr. Mahathir yang juga turut menjadi kawan rapatnya dalam kabinet beberapa tahun sebelum Ku Li ‘disingkirkan’ dari Umno oleh Dr. Mahathir. Bukan mudah untuk kita manafikan kata-kata Ku Li kerana sebagai sahabat beliau kenal benar akan kerennah serta muslihat Dr. Mahathir.

Bekas Menteri Kewangan itu tidak yakin Dr. Mahathir akan

berhenti dalam waktu terdekat (awal 1990an). Telahan Tengku Razaleigh itu sudah menjadi kenyataan, sehingga kini Dr. Mahathir masih berakar di atas kerusi kekuasaanya. Beliau pasti tidak akan mengundurkan diri sebelum terselaknya suria tahun 2000. Apa lagi beliau baru saja memasuki mahligai barunya maka teramat sayang untuk meninggalkan mahligai berharga RM 200 juta itu. Itulah yang kita nampak tentang Dr. Mahathir.

Jika kata-kata Ku Li itu dapat diterima, maka jelas Anwar Ibrahim yang sudah menjadi Timbalan Perdana Menteri selama enam tahun itu bukanlah penggantinya. Maka munasabahlah kalau Dr. Mahathir menganiayakan Anwar seperti mana yang berlaku sekarang ini. Kata-kata dan pengakuan Dr. Mahathir bahawa Anwar akan menggantinya adalah bohong dan dusta semata-mata. Ia tidak lebih daripada "bermulut manis jubur masam" bagi menperdayakan segenap ahli Umno dan Anwar sendiri ketika itu.

Kata-kata itu tidak lebih daripada jerat yang senantiasa terbuka untuk menjerut leher Anwar dan para penyokongnya. Dan ini telah pun berlaku pada 2 September 1998. Peluang yang Mahathir berikan kepada Anwar tidak lebih daripada sebagai satu helah untuk memastikan Anwar menjaga kekuasaanya daripada diserang oleh PAS dan kebangkitan Islam pada waktu itu.

Biarlah dalam perbicaraan ini kita tidak mengungkitkan mengenai Anwar. Apa yang menimpa Anwar adalah satu takdir yang ditetapkan sendiri oleh Anwar. Pada saya petaka yang menimpa Anwar adalah salah satu cara bagaimana Tuhan hendak selamatkan Anwar daripada beriringan ke Neraka bersama Mahathir. Sesungguhnya banyak yang dapat dilihat (ketahui) oleh Khidir tetapi tidak nampak oleh Musa a.s!

Tetapi apa yang hendak dikatakan ialah mengenai pandangan dan pendirian Ku Li terhadap Dr. Mahatahir.

Ku Li mungkin mempunyai pandangan dan kayu pengukur sendiri terhadap sikap dan perangai Dr. Mahathir. Beliau tentu tidak akan berkata demikian kalau tidak mempunyai pengalaman. Ku Li mempunyai pengalaman yang 'indah' dengan Dr. Mahathir yang telah meletakkan dirinya begitu mengenali serba serbi tentang Mahathir. Sememangnya Ku Li mempunyai banyak pengalaman dengan Mahathir. Saya tetap berkeyakinan bahawa skandal BMF yang berlaku di Hong Kong tahun 1981 kedua pemimpin ini turut sama terlibat, atau sekurang-kurang tahu kedudukan sebenarnya bagaimana dan tahu siapa yang menjadi dalangnya. Sebab itulah kita nampak pihak berkuasa sukar untuk menyelesaikan skandal BMF secara tuntas dan sempurna!

Bukan itu sahaja, setidak-tidaknya Ku Li pernah merasakan bagaimana permainan Mahathir terhadapnya. Mahathir pernah menghadiahkan sebilah keris kekecewaan kepada Ku Li.

Dr. Mahathir pernah mungkir janji kepadanya dan meng'*pig-dog*'kan karier politik Ku Li. Perkara ini sepatutnya tidak berlaku. Tidak ada orang yang berfikir demikian. Tetapi itulah politik yang kaya dengan tipu muslihat. Perkara ini sebenarnya tidak menjadi rahsia lagi. Sewaktu Hussein Onn mengambil keputusan untuk berundur dari kabinet, Hussein Onn telah memanggil Mahathir dan Ku Li. Mereka berjumpa enam biji mata di Seri Kenangan.

Menurut ceritanya dalam pertemuan itu Tun Hussein Onn bertanya kepada mereka berdua, siapakah yang sepatutnya mengganti beliau. Ku Li atas dasar setia kawan telah menunjukkan Dr. Mahathir sebagai penggantinya. Dan ketika itu Dr. Mahathir pula memberi jaminan kepada Hussein Onn yang selepas beliau adalah Ku Li. Peristiwa ini disahkan sendiri oleh Ku Li kepada penulis di rumahnya dalam tahun 1993 dan ramai orang politik yang tahu akan cerita ini. Dalam ucapan kempen pilihanraya 1990 Ku Li menceritakan hal ini.

Tetapi apa yang berlaku sebaliknya. Dr. Mahathir tidak menepati kata-katanya. Orang yang diangkat menjadi timbalannya ialah Dato' Musa Hitam. Tidak perlu disebutkan kenapa dan mengapa Dr. Mahathir memilih Musa, tetapi realitinya Dr. Mahathir mungkir janji dengan Ku Li di dalam hal ini. Beliau tidak amanah dan jujur dengan kata-katanya sendiri.

Barang kali apabila dilihat kepada situasi dan kondisi politik hari ini mungkin orang mengatakan tanggapan itu salah kerana sampai sekarang jawatan Timbalan Perdana Menteri atau bakal penggantinya masih kosong. Tetapi siapa boleh menolak disegi senioriti bahawa Ku Li patut menjadi Timbalan Perdana Menteri sejak tahun 1982 lagi. Maknanya Ku Li seharusnya menjadi TPM sebelum Ghafar, Anwar dan Abdullah Badawi.

Sesungguhnya Ku Li cukup kecewa dengan tindakan Dr. Mahathir itu. Baginya tindakan Mahathir memberi sokongan kepada Musa dalam dua kali perlawanan satu pengkhianatan Mahathir ke atas janjinya bersama Hussein Onn. Dan sebab kecewa itu jugalah maka Ku Li terus mara menentang Mahathir sehingga melawaninya untuk jawatan Presiden tahun 1987 kemudian diteruskan dengan bertindak berusaha mengharamkan Umno selepas itu. Tidak cukup dengan tindakan itu Ku Li menubuhkan Semangat 46 dan menentang Mahathir dalam pilihanraya umum 1990 dan 1995.

Di sini saya tidak mahu mengungkit janji palsu Dr. Mahathir itu. Mungkin bagi Ku Li yang pelahap untuk jadi PM dan mudah *surrender* dengan perjuangan, merasakan janji itu masih boleh ditunaikan kerana sampai sekarang Mahathir belum berhenti. Dan Dr. Mahathir juga mungkin boleh mempertahankan kebenaran kata-katanya kerana peluang dan kemungkinan Ku Li akan menggantinya masih terbuka luas. Dan bagi Ku Li yang kempunan jawatan PM bersedia untuk memaafkan Mahathir dan melupai segala luka dan parut lama yang masih jelas tergalang di dadanya.

Sebaliknya apa yang hendak diperkatakan di sini, ialah apakah Ku Li mempercayai akan kata-kata Mahathir itu? Apakah Ku Li merasakan kehadirannya hari ini sebagai untuk memenuhi janji Mahathir tempoh hari? Pemberian jawatan Pengurus Badan Perhubungan Umno Kelantan, kepada Ku Li sebagai satu langkah ke arah itu?

Percayahkah Ku Li kepada Dr. Mahathir? Apakah selepas beliau mengetahui Dr. Mahathir pernah berbohong kepadanya, beliau dapat menerimanya kembali? Ataupun apakah kesediaan Ku Li kembali bersama Mahathir hari ini tidak lebih daripada satu strategi untuk menjatuhkan Mahathir dan demi untuk mencapai cita-cita lamanya?

Apakah Ku Li menerima tindakan Mahathir itu sebagai sesuatu benar? Ataupun Ku Li sudah dapat menyelami maksud politik Dr. Mahathir? Dan kalau begitu keduanya sekarang ini berada dalam satu pertarungan baru dan dalam bentuk yang berbeza? Atau apakah keduanya bertindak melakukan gencatan senjata kerana kedua terdesak? Begitukah?

Apapun penerimaan semula Ku Li oleh Umno itu cukup menggembirakannya. Ku Li terselamat sekali lagi daripada karam dalam lautan politik. Ku Li merasa bertuah kalau Dr. Mahathir menerimanya kerana partinya sudah lemah. Bagi Ku Li ia adalah satu kemujuran. Dan sesuatu yang mungkin tidak dapat dibayangkan oleh Ku Li, bahawa Mahathir juga mendapat satu kemunjuran dengan pengembalian semula Ku Li itu.

Banyak sebab bagi Mahathir merasakan kehadiran Ku Li diperlukan. Antaranya kerana kedudukannya hari ini semakin teruk dan nazak. Usia politiknya hanya beberapa bulan sahaja lagi. Kedudukan Dr. Mahathir tak ubah seperti nasib pesakit kanser yang telah mengetahui akan detik-detik kematiannya. Di mana

sang penggali kubur telah pun perlahan-lahan mengorek tanah untuk menyiapkan pusara untuknya.

Manakala bagi Ku Li pula kesediaan Dr. Mahathir menerimanya itu boleh dijadikan alasan untuk beliau memikirkan kembali persaraannya. Atau setidak-tidaknya peluang itu tidak meletakkan beliau terasing jauh dari sempadan politik khasnya di dalam Umno.

Dalam usia yang sudah meniti senja, Dr. Mahathir sangat sedar mengenai kelemahan pengaruhnya. Apa lagi apabila beliau bercadang (konspirasi) untuk membuang Anwar. Maka beliau kena buat persediaan awal. Dan salah satu persediaan ialah dengan membawa masuk Ku Li dan orang-orang Semangat 46 di dalam Umno. Untuk tujuan itu, maka umpan yang enak hendak di hidangkan kepada Ku Li. Umpan itu ialah jawatan Perdana Menteri.

Kalau bukan dengan tujuan itu bukan mudah untuk Mahathir menerima Ku Li. Jika diingatkan kepada kata-katanya dulu, "pintu Umno tertutup rapat untuk Ku Li", tidak mungkin Ku Li akan dipelawa masuk Umno. Tetapi kerana Mahathir sudah terjempit hendak tak hendak beliau terpaksa jilat kembali kahaknya. Dr. Mahathir rela menggadaikan maruah dan prinsipnya demi survival politiknya.

Kebetulan, orang mengantuk disorong bantal. Ku Li yang terdesak dan pelahap menerima umpan itu dengan baiknya. Tanpa memikirkan apa yang beliau ucapan sebelum ini, Ku Li menerimanya dengan senang hati. Dalam hal ini Ku Li dan Mahathir nampaknya dua kali lima sahaja. Memang orang yang sama-sama tolol, sama-sama gila sahaja boleh duduk seiringan. Musa dan Anwar yang tidak rela menjadi tolol, menjadi gila tidak sanggup bersama Dr. Mahathir. Begitulah beza di antara manusia yang ada prinsip dengan manusia yang hipokrasi.

Mereka berdua umpama orang yang lemas di lautan. Mereka

akan saling berpautan di antara satu sama lain dan akhirnya akan tenggelam bersama!

Tetapi kita ingin bertanya ke manakah perginya cemuhannya kedua pihak sebelum ini? Masih segar dalam ingatan rakyat tentang dakwaan mereka sebelum ini. Rakyat masih ingat dakwaan Mahathir terhadap Ku Li. Menurut Mahathir Ku Li terlibat dalam skandal BMF di Hong Kong manakala Ku Li pula mendakwa Mahathir telah mengkhianati perjuangan Melayu dan Umno. Penubuhan Semangat 46 ialah kerana Umno sudah tidak tulin lagi. Ku Li juga pernah mengatakan kalau dia anak raja, Mahathir anak keling.

Dan apakah Ku Li sedar bahawa beliau dijadikan alat oleh Mahathir sekali lagi? Apa yang dapat kita rasakan kemasukan itu adalah untuk membantu Dr. Mahathir. Mahathir memerlukan pertolongan Ku Li untuk menentang Anwar. Mahathir sering akan mencari kekuatan apabila beliau mula hendak karam. Tahun 1987 beliau berpaut kepada Musa Hitam. Selepas Musa Hitam sedar bahawa beliau hanya dijadikan alat, Mahathir berpaut pula kepada Ghafar. Kemudian apabila Ghafar rebah, Mahathir berpaut kepada Anwar.

Hari ini dia kembali memeluk tungkul buruk bernama Ku Li semula selepas semua orang lain sudah meninggalkannya dan tidak boleh diharapkan lagi. Yang penting dia selamat. Sedarkah Ku Li akan hakikat ini?

Dr. Mahathir tahu senario politik yang ada sekarang ini sangat tenat. Maka beliau amat memerlukan Ku Li. Terutamanya untuk mengembalikan semangat Umno di Kelantan. Mahathir tahu hanya Ku Li sajalah yang dapat mengubati penyakit perpecahan di kalangan pemimpin Bahagian Umno di Kelantan. Orang lain tidak mampu untuk melakukannya. Annuar Musa yang dilantik menjadi

Timbalan, tidak berkeupayaan dan beliau bukan seorang bomoh yang baik dan mujarab untuk mengubat Umno Kelantan. Annuar Musa tidak diterima oleh ketua-ketua bahagian di Kelantan.

Dalam soal ini Dr. Mahathir ternyata lebih bijak daripada Ku Li. Juga lebih gila daripada Ku Li. Dr. Mahathir sudah membaca awal-awal sebelum beliau menggerakkan misi konspirasi hendak memecatkan Anwar. Sekiranya Ku Li dibiarkan berada di luar Umno dan Semangat 46 masih hidup tentu ia merumitkan Mahathir. Sudah tentu Semangat 46 akan digunakan untuk menjadi *platform* menggerakkan reformasi Anwar. Apa kata kalau Ku Li bersepakat dengan Anwar? Tidakkah keadaannya makin samrawik. Mahathir membaca sifir politik ini.

Justeru, Dr. Mahathir mencari jalan agar Semangat 46 dibubar kan dan ketuanya diseret songsang ke dalam Umno terlebih dahulu. Untuk memastikan Ku Li masuk ke dalam bубу Dr. Mahathir maka umpan yang enak dan lazat hendaklah disediakan. Umpan itu tentulah jawatan PM yang diangan-angangkan oleh Ku Li selama ini.

Dalam hal ini Dr. Mahathir benar-benar mengamalkan teori pecah dan perintah. Falsafah seni peperangan Tzu Zu; jika kamu tidak berjaya menghancurkan musuh, maka kamu hendaklah berbaik dengan musuh. Cuma dalam soal ini berbeza sedikit, pada Mahathir jika kamu takutkan musuh melawan kamu, maka terimanya menjadi rakan.

Sebab itu Dr. Mahathir melupai sumpahnya kepada Ku Li, dan bersedia mengenepikan prinsipnya dan menerima Ku Li semula. Apakah Ku Li sedar jarum halus politik Dr. Mahathir ini, *walahualam*. Yang jelasnya politik Ku Li tidak sejah mana, sejah luncuran anak panah si bocah sahaja. Kenapa Ku Li mudah tewas dan tertipu beberapa kali dengan Dr. Mahathir kerana kecetekan politik Ku Li.

Selain daripada untuk menjaya misi konspirasinya, kesediaan Mahathir melepaskan jawatan Pengurus Badan Perhubungan Umno Kelantan kepada Ku Li juga adalah sebagai perkakasnya. Mahathir mahu menggunakan Ku Li untuk mengalahkan PAS di Kelantan. Pada perkiraan Mahathir jika Ku Li menjadi ketua Umno Kelantan, Kelantan akan berjaya dirampas oleh Umno.

Dan untuk mengsyokkan lagi Ku Li, Dr. Mahathir akan membuat tawaran dan janji lebih daripada itu. Beliau akan membuat janji yang sama sekali tidak terfikir oleh Ku Li. Sebagai orang yang gila, maka segala janji itu akan ditelan. Tidak mustahil dalam kunjungan beliau ke Kelantan menjelang pilihanraya akan datang beliau akan menegaskan bahawa pengganti beliau ialah Ku Li. Dr. Mahathir akan berbuat demikian untuk melihat orang Kelantan melatah. Beliau tidak akan peduli perasaan Abdullah kerana Pak Lah pada Ku Li tak ubah seperti musang tenggalong.

Apapun itu adalah tindakan orang gila yang bukan baru malah lama, tetapi tidak dapat dibaca oleh orang waras sahaja. Kesimpulannya penerimaan semula Ku Li adalah tidak lain untuk dijadikan perkakas oleh Dr. Mahathir bagi menjamin kemenangan Umno dan lebih penting menyelamatkan kekuasaanya.

Sangkaan ini nampak semakin jelas. Ku Li sudah pun mula bertindak memainkan jarum yang dikehendaki oleh Dr. Mahathir. Hari ini Ku Li sudah memutar kembali lidahnya. Batang tubuh Tok Guru yang dipuja sebelum ini telah dicaci maki kembali. Ku Li dan orang-orang Semangat 46 yang sebelum ini 'belajar membentulkan fatihah' dengan Tok Guru sudah mula mencemuh Tok Guru. Ku Li sudah menunjuk derhaka kepada Tok Guru.

Dalam satu majlis ceramah di Peringat bersama Annuar Musa, tanpa segan silu Ku Li menuduh Nik Aziz belawak (berbohong). Katanya Nik Aziz tidak menunaikan janjinya untuk melaksanakan

Hukum Hudud. Kerajaan PAS gagal membuat sesuatu kepada rakyat Kelantan. Ini satu tuduhan melampau oleh Ku Li.

Hukum Hudud siapa sebenarnya yang menolak? Bukan Nik Aziz tetapi Ku Li dan Exco Semangat 46. Kalau beliau juga mahu hudud di laksanakan kenapa beliau tidak pujuh Sultan Kelantan agar menandatangani draf hukum itu? Kenapa Sultan hanya menanda tangani pada draf yang difotokopi saja? Kalau pun hendak berdusta biarlah yang masuk akal.

Dan yang paling teruk sekali ialah apabila Ku Li sudah mula memperalatkan istana untuk kepentingan parti politik yang dianutnya. Belum kering air liur beliau bercakap mengatakan beliau tidak akan menggunakan istana walaupun beliau berdarah raja, tetapi beliau sudah mula menggunakan istana. Siapa sebenarnya pembohong?

Orang Kelantan cukup sedar tentang dolak dalih dan politik ikan belecas Ku Li. Orang Kelantan masih ingat bagaimana keras dan tegasnya Sultan Kelantan terhadap Dr. Mahathir. Sejak dari tahun 1982 hingga tahun 1993 Dr. Mahathir tidak pernah berjumpa dengan Sultan Kelantan. Bila ada kunjungan kerja Dr. Mahathir ke Kelantan, Sultan akan bergegas ke luar negeri, menandakan bencinya baginda kepada Dr. Mahathir. Ada-ada sahaja agenda Tuanku yang disusunkan, kalau tidak jauh, ke Terengganu pun cukup. Pernah satu masa Polis Traffic yang mengawal Tuanku terbunuuh di Pahang.

Tetapi apa sudah jadi dengan Tuanku sejak Ku Li masuk Umno? Mahathir bukan sahaja dapat berjumpa dengan Tuanku, tetapi lebih daripada itu dapat makan bersama Tuanku. Nampaknya Sultan Kelantan telah kena sihir kepada bapa saudaranya supaya memaafkan Mahathir.

Sebagai orang Islam kita merasakan perkembangan hubungan

Dr. Mahathir dan Sultan Kelantan adalah baik. Itulah yang disuruh oleh Islam. Tetapi apa yang hendak dipertikaikan ialah kenapakah Ku Li sanggup mempergunakan Tuanku untuk kepentingan politiknya. Dimanakah janjinya untuk tidak menggunakan istana? Kenapa kemuliaan istana mudah digadai untuk kepentingan politik yang masih kabur.

Mungkin Ku Li boleh nafi, lawatan dan kunjungan Dr. Mahathir terhadap Tuanku itu perkara biasa. Tetapi dalam dunia semua orang cerdik, siapa boleh menolak kunjungan itu bermotif politik? Kenapa semasa Ku Li di dalam Semangat 46 dulu, beliau tidak berusaha untuk mempertemukan Dr. Mahathir dengan Sultan? Kenapa beliau susah payah cuba mengeratkan Tuanku dan Mahathir sejak akhir-akhir ini.

Adalah silap kalau Ku Li cuba memainkan perkara ini dan menganggap orang tidak mengetahui hujung jatuhnya. Kita menimbulkan ini bukan apa tetapi kerana kita hendak menjaga kemuliaan Sultan. Kita tidak mahu Sultan diheret ke hulur ke hilir macam kerbau dicucuk hidungnya. Kalau benar hendak main politik, mainlah cara *gentelman*. Cara Ku Li berpolitik tak ubah seperti budak yang hendak bertumbuk tetapi memanggil kedua orang tua duduk di sebelahnya.

Jelaslah ketokohan dan kehebatan Ku Li adalah palsu. Ku Li tidak ada kekuatan sendiri melainkan berselindung di sebalik tiang-tiang dalam istana. Selama ini Ku Li hanya menumpang tuah istana saja untuk berjaya dalam politik. Jika tidak kerana istana mungkin politik Ku Li lebih buruk daripada nasib Ibrahim Ali. Benarlah kata Nik Aziz, Ibrahim Ali lebih cerdik daripada Ku Li.

Kalau kita pengecut, jangan jadi jantan.

Ke mana hilang maruah politik Ku Li? Hanya orang gila sahaja yang bersedia melupakan janji dan sumpah dan bersahabat baik

dengan orang gila. Kalau selagi orang itu waras dan bermaruah dia malu untuk memungkiri janji-janjinya.

Ku Li juga gila?

Dalam pada itu apakah Sultan Kelantan sedar atau pun tidak tentang gila iseng Ku Li ini? Sekiranya baginda sedar, tentu tidak mudah untuk baginda menunjuk telunjuk Ku Li. Sebagai Sultan, baginda lebih berkuasa daripada Ku Li. Baginda raja yang memerintah Kelantan dan Ku Li hanya bapa saudara isterinya sahaja.

Jika dilihat kepada sejarah tidak mudah untuk Sultan menerima Dr. Mahathir. Sepatutnya Sultan Kelantan ingat apa yang telah dilakukan oleh Mahathir ke atasnya dan Raja-raja Melayu. Apa yang Mahathir tidak lakukan kepada Raja-raja Melayu termasuk Sultan Kelantan, semua dilakukan, kecuali menjentik batu peler mereka saja.

Sultan Kelantan diaib dan dimalukan. Mahathir pernah menyifatkan Sultan Kelantan budak ingusan. Sultan Kelantan juga pernah ditonjolkan sebagai pencuri kerana melarikan kereta Lamborghini dari setor Kastam di Lapangan Terbang Subang. Akbar Utusan Malaysia menyiarkan gambar baginda sedang memandu kereta berkenaan.

Walaupun termakan dengan kata-kata Ku Li, baginda sepatutnya tidak melupai sejarah. Baginda kena ingat dan renung kembali apa yang dilakukan ke atas dirinya. Sewaktu krisis pinda perlembagaan tahun 1983, Sultan Kelantan kena ingat siapa yang berdiri di belakang baginda. Siapa yang ramai-ramai pergi menyambut baginda di airport dan melaung "jangan sain, Tuanku, jangan sain Tuanku!"

Siapa mereka itu semua? Orang Umno atau orang PAS. Dan Sultan Kelantan patut fikir kenapa rakyat Kelantan menjerit demikian. Siapa menjadi puncanya, Mahathir atau Nik Aziz?

Jika diingat kepada sejarah dan peristiwa itu tidak mungkin Sultan Kelantan akan dapat menerima menghadap Mahathir. Apa lagi untuk berjalan seiringan dan santap semeja.

Tetapi apalah hendak dikatakan, kerana ada ‘jong dondang’ yang bercita-cita besar, maka fikiran Sultan Kelantan boleh dipe-songkan. Sejarah luka boleh dihilang-ghaibkan begitu sahaja. Mungkin Sultan Kelantan tidak boleh dipersalahkan sangat di dalam perkara ini. Selaku raja beliau mahukan keamanan dan kesejahteraan rakyat. Padanya apa saja asal mendatangkan kebaikan kepada negeri dan rakyat akan diikuti! Sebaliknya manusia yang patut dipersalahkan ialah “jong dondang” berkenaan kerana telah merelakan dirinya dijadikan alat oleh manusia yang mengakui dirinya adalah “Mahafiraun” itu.



*Hampir 10 tahun Dr. Mahathir tidak dapat berjumpa Sultan Kelantan dan Raja Perempuan sewaktu melawat negeri itu. Tetapi sebaik sahaja Ku Li diterima semula menyertai Umno, Dr Mahathir bukan sahaja dapat berjalan dengan Sultan Kelantan tetapi dapat makan bersama. Siapa yang memperalatkan siapa dan siapa yang menjadi alat?*



Bukan sahaja rakyat yang inginkan Mahathir undur, tetapi bekas Yang Dipertuan Agong juga telah memberi lambaian perpisahan kepada Mahathir. "Selamat tinggal Che Det....."

## Tok Guru Dan Anak Raja

# SIAPA PUJAAN RAKYAT

7

PILIHAN raya umum akan datang menyaksikan perlawanan terhebat di antara PAS dengan Umno (BN) di Kelantan.

Perlawanan yang ke 10 ini adalah perlawanan sejati. Perlawanan yang dikira akan menentukan apakah PAS atau Umno benar-benar mempunyai kekuatan di alaf baru akan datang di negeri Cik Siti Wan Kembang itu. Pertandingan itu juga menjadi penentu sejauh mana pengaruh dan masa depan kedua-dua parti berkenaan di abad 21 akan datang.

Pertembungan di antara kedua buah parti itu kelak sungguh menarik. Ini kerana kedua parti berkenaan telah kembali mendapat kekuatan sebenarnya. Mereka kembali berdiri di atas kaki sendiri. Baik PAS ataupun Umno, mereka benar-benar berdiri di atas kaki masing-masing. Kali ini mereka berlawan secara *gentleman*, tidak ada mana-mana kuasa pendokong ataupun unsur-unsur (kuasa ghaib) yang membantu mana-mana pihak. Dalam kata lain mereka bertanding dengan kekuatan dan kudrat sendiri.

Kalau sebelum ini kemenangan kedua parti itu boleh dipertikaikan, kerana ada unsur lain yang mendokong kemenangan mereka. Ada faktor lain yang menyebabkan mereka menang.

Misalnya kemenangan Umno tahun 1978 ialah kerana penggabungan parti itu dengan Berjasa. Begitu juga kemenangan cemerlang PAS tahun 1990 adalah kerana penggabungan mereka dengan Semangat 46. Tanpa penggabungan seperti itu belum tentu lagi kedua-dua parti itu menang. Kerana bergabunglah mereka menang.

Selain itu perpecahan dalaman juga menjadi faktor kepada kekalahan di antara satu sama lain. Tahun 1978, PAS mengalami krisis dalaman yang teruk menyebabkan ianya kalah. Krisis itu berlaku kira-kira setahun sebelum menjelang pilihanraya. Manakala tahun 1990 giliran Umno pula berpecah dua. Akibat itu kerajaan Umno di Kelantan berjaya dirampas semula oleh PAS.

Kali ini gabungan atau unsur-unsur yang menyokong kemenangan di antara satu sama lain sudah tidak ada lagi. Tidak ada puak serpihan yang bakal mensenyawakan diri dengan PAS. Unsur yang membantu kemenangan PAS tahun 1990 dan 1995 telah tiada. Begitu juga unsur yang membantu kemenangan Umno tahun 1978, serpihan PAS sudah tidak ada. Kedua-dua parti berada dalam kedudukan yang teguh dan selesa. Sebab itulah pertarungan tahun ini hebat dan menarik. Pertarungan sejati.

Bukan itu sahaja, pertarungan dalam pilihanraya ke 10 ini juga sengit kerana kedua parti itu mempunyai kepala atau ketua yang sama-sama hebat. Ketua masing-masing sama-sama mempunyai pengaruh tersendiri. Dan ada pendekatan tersendiri. Dalam kata lain kedua buah parti mempunyai jeneral yang sama-sama hebat. Setidak-tidaknya ketua yang mengepalai pilihanraya tahun ini pernah mencatat kemenangan dalam satu-satu perlawanan (pilihanraya).

PAS diketuai oleh seorang tokoh ulamak, Tok Guru Nik Aziz Nik Mat dimana kehebatan dan kewarakannya sudah tidak perlu diperjelaskan lagi. PAS dipimpin oleh seorang tokoh yang berazam

untuk menegakkan syariat Allah di atas muka bumi ini. Seorang ulamak yang menahankan nafsunya demi agama Allah. Hari ini PAS Kelantan dibayangi oleh pengaruh Nik Aziz. Boleh dikatakan di antara pengaruh PAS dengan pengaruh Nik Aziz hampir sama banyak.

Manakala Umno pula mendapat khidmat semula bekas jeneralnya tahun 1978 yang berpaling tada tahun 1990. Umno seperti baru mendapat kepala baru. Kepala itu ialah Tengku Razaleigh Hamzah (Ku Li). Orang sudah arif mengenai Ku Li, beliau adalah anak raja Kelantan yang mempunyai pengaruh yang meluas. Ku Li mempunyai *track record* dan sejarah kegemilangan tersendiri di Kelantan.

Mereka berdua sama hebat dan mempunyai pengaruh, tetapi mereka tetap mempunyai perbezaan yang amat realitif. Seorang berjuang untuk menegakkan agama Allah seorang lagi berjuang untuk mengejar kedudukan - menjadi Perdana Menteri.

Jadi aspek itulah menjadikan pertarungan di Kelantan dalam pilihanraya akan datang adalah pertaruhan yang sejati. Pertarungan yang sebenar menguji kekuatan kedua buah parti berkenaan. Perlawanan ini juga dikira perlawanan terakhir di antara mereka berdua. Tidak mungkin keduanya akan bertembung sekali lagi di abad ke 21 kelak. Mereka berdua sudah melewati ke usia lebih 60 tahun, Nik Aziz berusia 68 tahun manakala Ku Li 62 tahun.

Sebelum kita membuka perbicaraan mengenai hal ini elok kalau kita mengungkit kembali kronologi kemenangan BN dalam tahun 1978. Pada tahun itu Umno yang di bawah pimpinan Ku Li telah menumbangkan kerajaan PAS Kelantan yang di bawah pimpinan Datuk Haji Mohd Asri. PAS tertumus begitu teruk sekali sehingga hanya mendapat dua kerusi dari 24 buah kerusi. Kerajaan yang didokong oleh PAS selama 19 tahun hancur lebur. Kekalahan itu menjadikan PAS seperti lumpuh seketika di kubu kuatnya sendiri.

Biarpun cara BN memperolehi kemenangan itu terus dipersoal sehingga kini kerana berlaku politik kotor, tetapi di sini bukan hajat kita untuk memperkatakan kekotoran itu. Sebenarnya kekotoran tidak dapat dielak dalam sistem demokrasi yang dibentuk oleh unsur sekular dan menerima prinsip Machiavilli - matlamat menghalalkan cara. Selagi parti politik menerima sistem demokrasi yang dibenarkan oleh Yahudi itu maka selama itulah kejernihan dan kebenaran tidak akan menjelma.

Tidak mungkin sesuatu kebersihan dan kejernihan akan lahir dari sistem yang tidak betul - atau dengan dasar sekular matlamat menghalalkan cara. Usahlah kita mengharap akan lahir kueh yang sempurna daripada acuan yang somping atau kemet. Kueh yang dibuat dari acuan yang kemet dan somping tetap akan lahir kemet dan somping.

Di sini apa yang hendak diperkatakan, apakah tekit kotor yang membawa kemenangan kepada BN itu?

Empat bulan sebelum pilihanraya diadakan, politik Kelantan telah dikacau. Para pemerhati politik Kelantan menyifatkan rakyat Kelantan telah dituba. Ada tangan-tangan ghaib yang kesekian lama mengidam dan dendam kepada kerajaan PAS Kelantan mengatur strategi untuk mengacau suasana di Kelantan. Tuduhan mengenai pemimpin makan balak, penyelewengan telah dijadikan modal untuk menimbulkan huruhara di Kelantan. Di samping itu pihak Umno telah menonjolkan seorang dewa penyelamatan di kalangan PAS sendiri iaitu Datuk Haji Muhammad Nasir yang ketika itu adalah Menteri Besar Kelantan.

Muhammad Nasir ditonjolkan sebagai pemimpin jujur dan ikhlas dan berjuang untuk rakyat yang sebenarnya telah diperalatkan oleh Umno. Serentak itu rakyat Kelantan dikerah membela Datuk Haji Muhammad Nasir. Beberapa siri tunjuk perasaan telah diatur dan dilakukan oleh puak-puak yang tertentu.

Upacara membakar tayar buruk, melontar rumah wakil rakyat PAS dengan batu, mencuri ayam Belanda wakil rakyat PAS dilakukan secara terang-terangan. Akhirnya kerajaan Kelantan digantung dan Kelantan diletakkan di bawah pemerintahan MAGERAN dengan Pengarahnya Tan Sri Hashim Aman.

Selama empat bulan kerajaan Kelantan digantung kemudian di adakan pilihanraya mengejut dimana hasilnya kerajaan PAS yang bertakhta selama 18 tahun akhirnya tumbang. *Master mind* untuk merampas Kelantan ialah di kalangan pemimpin Umno di Kuala Lumpur. Sementara tokoh yang dinobatkan sebagai "kepala halian" ialah anak raja bernama Ku Li yang ketika itu baru mengirai sayap dalam arina politik.

Sebenarnya di dalam hal ini Ku Li bukan seorang yang hebat dan terpengaruh. Kejatuhan kerajaan PAS tahun 1978 bukan di atas kehebatan dan ketokohan Ku Li, sebaliknya hasil daripada satu konspirasi di kalangan pemimpin Umno dengan orang-orang tertentu di dalam PAS sendiri. Ku Li hanya hadir ketika gulai hendak masak. Ku Li hanya dijadikan tokoh untuk mengemudikan suasana di Kelantan yang mana setelah politiknya sudah diharu birukan oleh pemimpin Umno di Kuala Lumpur. Oleh sebab itulah anggapan mengatakan Kelantan akan jatuh ke tangan BN dengan pulangnya Ku Li adalah satu ramalan yang kurang tepat dan meleset.

Manakala kejayaan PAS merampas kembali kerajaanya pada 1990, disebabkan suasana yang sama, iaitu wujudnya perpecahan di dalam Umno. Cuma bezanya perpecahan Umno itu bukan diprogramkan oleh PAS tetapi ia dilakukan oleh Umno sendiri. Umno bertelingkah sesama sendiri dan saling merebut kuasa dan kekayaan. Perpecahan teruk itu sehingga menyebabkan kerajaan BN jatuh seolah-olah sebagai satu kifarah Tuhan ke atas kejahatan pemimpin Umno lalu terhadap PAS.

Dapat disimpulkan kejatuhan kerajaan PAS dan Umno sebelum inilah kerana berlakunya perpecahan di dalam parti masing-masing. Apabila sesebuah parti yang menjadi kerajaan menghadapi masalah pemimpinnya yang bergaduh dan dengki mendengki di antara sesama sendiri, maka tunggulah masanya untuk melihat kerajaan mereka akan jatuh.

Tetapi hari ini keadaan kedua parti politik tersebut tidak mengalami apa-apa masalah. PAS tidak mengalami apa-apa perpecahan dan krisis. Tidak ada puak-puak di dalam PAS dewasa ini. Walaupun ada seekor dua ahli-ahli PAS yang rela diperalat untuk mengacau PAS seperti wujudnya Pas Baru, tetapi itu tidak memberi masalah. Puak yang tubuh Pas Baru tidak lebih dari seketul tahi kering yang sedang menghampak di tepi jalan. Begitu juga dengan Umno, kehadiran semula Ku Li yang tak ubah kehadiran semula burung bangau di atas belakang kerbau, sedikitpun tidak digeruni oleh PAS. Cuma pengembalian Ku Li ini setidak-tidaknya Umno sudah ada *anchor* semula. Ia memberi semangat dan power baru kepada Umno.

Jadi di dalam situasi kedua parti itu dikira mantap inilah menarik untuk kita melihat turun naik parti berkenaan. Bagaimanakah peluang di dalam pilihanraya akan datang. Ini sangat menarik dan menyukar para pemerhati politik untuk membuat ramalan siapakah yang bakal membentuk kerajaan di Kelantan.

Pemerhati berteka teki dan tidak berani membuat ramalan. Bagi pemerhati yang liberal hanya bersedia menyatakan PAS boleh menang tetapi dengan *simple majority*. Umno juga mempunyai peluang cerah sekiranya ia dapat mengemukakan manifesto yang terbaik daripada PAS dan mengemukakan tokoh-tokoh yang boleh mencabar wibawa Tok Guru dan calon PAS.

Ini sesuatu yang menarik, sebab jika mana-mana parti menang,

kita akan dapat mengetahui kekuatan sebenar parti berkenan. Dan implikasi (lanjutan) kepada kemenangan itu menyebabkan ia boleh menyimpulkan parti mana yang akan terus menguasai Kelantan untuk tahun 2000 nanti. Seterusnya memiliki kekayaan gas yang akan bakal dihasilkan menjelang tahun 2002 kelak.

Kenapa kita berkata begitu, sebab penentuan kemenangan bukan disebabkan kelemahan musuh lagi. Sebalik kemenangan kali ini ialah bergantung sejahtera mana parti dapat menawarkan khidmat dan janji kepada rakyat. Keputusan pilihanraya nanti akan menentukan parti siapakah yang mempunyai idealisme. Dan perjuangan siapakah yang relevan untuk bangsa Melayu dan Islam di abad akan datang.

Pun begitu keputusan rakyat kali ini bergantung kepada isu-isu yang ditonjolkan, idealisme parti dan keperibadian pemimpin. Ini adalah yang akan diguna pakai oleh pengundi untuk membuat pemilihan. Bagi para pengundi tentu mereka tidak akan mudah terpesona dengan kehebatan wawasan perjuangan sesebuah parti tanpa mengambil kira keperibadian dan komitmen mereka kepada nasib bangsa dan daulah agama. Yang diharap oleh rakyat bukan retorik tetapi realiti.

Apapun pengukuran yang popular dan tepat ialah pengaruh dan karismatik kedua pemimpin berkenaan. Sudah tentu pengaruh dan karismatik mereka akan dijadikan panduan utama selain daripada agenda parti masing-masing bagi rakyat menentukan masa depan Kelantan.

Secara umumnya kedua manusia ini mempunyai pengaruh tersendiri. Waima Ku Li atau Nik Aziz tidak dapat disangkal lagi mereka menjadi idola dan sanjungan rakyat Kelantan. Tengku Razaleigh sebagai anak raja yang berjiwa rakyat. Manakala Nik Aziz sebagai Tok Guru.

Anak raja dan Tok Guru dua perkara yang menjadi perhatian orang Melayu khususnya rakyat Kelantan. Satu masa dulu anak raja adalah orang yang disanjung ramai. Rakyat akan menghormati apa sahaja yang anak raja lakukan. Rakyat rela meninggalkan kerja kerana untuk mengutamakan raja.

Bagi orang Kelantan anak raja adalah tak ubah seperti raja sendiri. Penghormatan yang mereka terima samalah yang diberikan kepada raja.

Demikian juga dengan Tok Guru. Rakyat akan hormat dan sanjung Tok Guru. Tok Guru adalah insan yang mulia di sisi orang Islam. Rakyat Kelantan yang terkenal sebagai kuat mengamalkan ajaran agama sangat menyanjung tinggi orang berilmu. Bagi mereka kalau Tok Guru ataupun anak raja menjek kaki ke rumah mereka, merupakan tuah besar. Suatu rahmat yang akan memberkati kehidupan mereka anak beranak.

Saya masih ingat satu peristiwa bagaimana seorang Yang Berhormat parti Semangat 46 yang pada mulanya sudah mengambil keputusan untuk menyertai PAS. Tetapi apabila Ku Li mencemarkan diri datang ke rumahnya di dalam sawah padi, hasrat itu serta merta tercabut dan tak jadi. Betapa kuasa anak raja besar dalam kepala orang Kelantan. Mereka boleh melupai hasrat kerana dikunjungi oleh anak raja. Saya yakin kalau Tok Guru yang awal ke rumah wakil rakyat berkenaan susah untuk wakil rakyat itu membuat pilihan. Di sinilah kelemahan Tok Guru Nik Aziz selaku pemimpin tidak peka dalam usaha menawan musuh dan memperbanyakkan kawan.

Apabila kita membandingkan kelebihan dan kekurangan di antara anak raja bernama Ku Li dengan Tok Guru bernama Nik Aziz sesuatu yang menarik. Perkembangan yang berlaku hari ini menunjukkan pengaruh anak raja sudah mula berubah. Orang hilang penghormatan kepada anak-anak raja di akhir zaman ini.

Perubahan ini bukan disebabkan perangai anak raja tidak baik, tetapi sedikit sebanyak disebabkan ekoran tindakan kerajaan pimpinan Dr Mahathir.

Serangan Dr. Mahathir ke atas institusi raja-raja 10 tahun lalu meninggalkan impak yang tidak baik kepada istana dan kerabat di raja. Pendedahan tentang sikap buruk raja-raja dan keluarganya, menyebabkan rakyat hilang penghormatan kepada institusi raja-raja berperlembagaan. Keadaan ini juga turut meninggalkan kesan kepada Ku Li. Rakyat akan menilai semula Ku Li dengan pendedahan itu dan membuat perbandingan dengan telatahnya dan juga sikap berubah-ubahnya di dalam politik.

Title anak raja sudah tidak semulia dan seagung dulu lagi. Ia juga sudah berubah perlahan-lahan. Sebaliknya *title* Tok Guru dan ulamak masih kekal dan terus mendapat sanjungan dan pemujaan. Apa lagi sejak Dr. Mahathir membuang kuasa raja (*immunity*), wujud tanggapan di kalangan orang Melayu bahawa raja tidak berguna dan jahat. Tanggapan demikian tidak berlaku ke atas Tok Guru. Perubahan ini sedikit sebanyak menjelaskan ‘kekeramatian’ Ku Li.

Sebenarnya tindakan Dr. Mahathir itu disedari oleh Ku Li. Ku Li tahu ia menjelaskan pengaruh dan kredibilitinya. Sebab itu pada awal dulu Ku Li menentang sekeras-kerasnya Dr. Mahathir. Penubuhan Semangat 46 adalah manifestasi penentangan Ku Li terhadap Dr. Mahathir selepas beliau gagal menumbangkan PM itu dalam perhimpunan agung Umno tahun 1987.

Pun begitu tidak dinafikan ada juga tok guru yang berperangai tidak baik. Menyalahgunakan wang zakat, melakukan perbuatan sumbang dengan anak murid dan sebagainya. Menyempitkan pemahaman Islam dan malas untuk mendalamai ilmu-ilmu agama dan ilmu dunia lain. Tetapi jumlahnya Tok Guru yang demikian tidak sebanyak anak-anak raja. Anak-anak raja atau kerabat orang-

orang kaya lebih terdedahkan kepada perbuatan sumbang dan sebagainya.

Selain pengaruh *title* itu keperibadian diantara kedua mereka juga akan menjadi perbandingan. Setiap kali rakyat Kelantan terpandang gambar Tok Guru Nik Aziz dan Ku Li mereka akan membuat penilaian. Walaupun Nik Aziz lemah dan cetek dalam ilmu pentadbiran dan ekonomi, namun beliau disenangi dengan sikap berterusan terang dan tawaduknya. Rakyat Kelantan tahu bahawa Ku Li bijak dalam bidang ekonomi, tetapi kerana kejahilan Ku Li dalam bidang agama menyebabkan kelebihan itu tidak memerangkapkan orang Kelantan untuk tambah taksub kepadanya. Apa lagi sikap orang Kelantan yang tidak suka menunjuk dan lebih bersifat qanaah, mereka tidak begitu mahu mengejar kekayaan dan kemewahan. Ajaran Islam yang menebal di jiwa mereka menjadikan mereka lebih suka bersifat sedarhana daripada kaya raya sehingga membazir.

Jelas kalau dibanding disegi *title* tadi, Nik Aziz masih utuh. Status ulamanya masih belum tercemar. Meskipun pihak musuhnya cuba puter belit kenyataanya, namun alhamdulilah orang ramai dapat memahaminya.

Tambah lagi sikap orang Melayu mereka lebih percaya kepada orang bergelar ustaz dan Haji daripada orang biasa bergelar Tengku ataupun Dato'. Walaupun kata-kata yang di keluarkan oleh Tok Guru tidak bernes yang membangkitkan soal yang remeh, tetapi ia diberi perhatian sewajarnya daripada kata-kata yang berkualiti tapi keluar daripada sang tokoh yang mudah hilang prinsip dan maruah perjuangannya.

Keyakinan orang ramai ini dapat dilihat pada majlis-majlis ceramah yang dianjurkan oleh parti Nik Aziz dan parti Ku Li. Setiap kali ada upacara sembahyang hajat, beratus-ratus botol air mineral diletakkan di hadapan untuk mendapat berkat. Begitulah taksubnya.

Keadaan ini tidak berlaku di majlis melibatkan Ku Li. Kehadiran orang di majlis ceramah Nik Aziz juga berpuloh kali ganda dengan kehadiran di ceramah Ku Li.

Berdasarkan kepada keadaan itu adalah dirasakan sukar untuk Ku Li mengatasi pengaruh dan populariti Nik Aziz. Kalau lauh kehadiran di majlis ceramah itu merupakan satu ukuran tepat, ternyata harapan Ku Li untuk merampas Kelantan tidak akan berjaya.

Cita-cita untuk menakluki Kelantan dan menikmati kekayaan gas hanya akan jadi igauan buruk, lainlah kalau dalam pilihanraya akan datang kata-kata Mahathir bahawa pilihanraya tahun ini akan terkotor benar-benar dipraktikan dan dapat dilaksanakan, barulah harapan Umno merampas kekayaan di Kelantan itu akan tercapai!



*Salah satu hobby Daim Zainuddin ialah berbisik. Tiga kali Daim berbisik kepada Mahathir. Bisikan pertama beliau suruh Mahathir perangkap Anwar agar masuk Umno. Bisikan kedua, Daim memberi tahu Mahathir tentang niat Anwar hendak tumbangkan Mahathir. Dan bisikan ketiga, Daim suruh Mahathir halau Anwar secara aib dari Umno.*

# Keburukan Dan Kebusukan **PEMIMPIN UMNO TERBONGKAR**

8

**S**ATU demi satu kebusukan dan keburukan kerajaan dan pemimpin nombor satunya terbongkar. Selama ini kebusukan dan keburukan itu tersebunyi kukuh di dalam hati dan peti besi para pemimpin Barisan Nasional. Tetapi hari ini atas kehendak dan takdir serta fitrah, setiap yang mungkar itu akan terdedah, akhirnya ia pecah dan dilambakkan ke serata dunia.

Pekung yang membusung kesekian lama sudah sampai ke pengetahuan sekalian rakyat jelata. Daripada orang tua sampailah kepada kanak-kanak yang baru pandai berjalan mereka terhadu tembelang busuk dan buruk pemimpin yang selama ini mereka puja dan sanjung.

Apakah dengan kemaraan fajar tahun 2000 merupakan satu detik perubahan baru untuk membersih dan mensucikan segala kebusukan dan keburukan di dalam kerajaan?

Samada disedari atau tidak semua ini adalah satu anugerah Tuhan. Satu rahmat kepada rakyat Malaysia. Satu pemakbulan Allah kepada doa mereka yang tertindas dan dizalimi. Satu pemberian Tuhan ke atas rakyat Malaysia. Tuhan telah mentakdirkan ianya berlaku demikian untuk membolehkan rakyat Malaysia tahu

apa yang selama ini pemimpin mereka lakukan. Membolehkan rakyat Malaysia tahu bahawa mereka yang diberikan amanah telah tidak melaksanakan amanah itu dengan baik dan jujur. Mereka yang telah diberikan tanggungjawab telah mengkhianati tanggungjawab.

Sebenarnya sesuatu yang berlaku itu ada rahmat dan hikmatnya. Misalnya di sebalik sesuatu kedukaan itu ada terselit kegembiraan. Di sebalik kepedihan itu ada tersembunyi sejuring nikmat. Hanya bagi mereka yang akal pendek sahaja tidak dapat melihat nikmat dan rahmat di sebalik segala musibah itu. Tuhan telah menjanjikan setiap sesuatu itu ada hikmatnya dan yang baik tetap akan dibalas baik.

Begitu jugalah dengan apa yang berlaku hari ini. Rupa-rupa di sebalik tragedi hitam yang menimpa Datuk Seri Anwar Ibrahim mendedahkan sesuatu yang selama ini kita tidak pernah terfikir. Tragedi itu adalah sebagai simbolik untuk Tuhan mendedahkan kepada kita segala macam kepincangan dan kezaliman. Musibah yang menimpa Anwar itu hanya satu sebab untuk membolehkan rakyat mengetahui sesuatu yang tersirat selama ini.

Mengapa tidak? Dengan teraniayanya Anwar maka segala kebusukan dan keburukan pemimpin BN terdedah. Segala rahsia kejahatan mereka terbongkar, terutamanya apa yang berlaku ke atas Perdana Menteri, Dr. Mahathir Mohamad. Segala kepalsuan telah terecer ke serata tempat. Dan segala hipokrasinya telah meledak. Sekarang orang semua sudah tahu sejauh mana ikhlas dan jujurnya Dr. Mahathir.

Mungkin jika Anwar tidak dipecat dari Umno, dipecat dari kerajaan dan dipenjarakan selama 6 tahun, matanya dilebamkan oleh Rahim Noor, segala keburukan dan kebusukan itu masih belum terhidu. Mungkin kebusukan dan keburukan itu masih terbungkus elok. Kerana tidak ada siapa yang berani untuk membuka dan

mendedahkannya. Anwar sendiri walaupun sudah tidak tahan dengan kebusukan itu, namun sebelum ini masih bersikap hati-hati untuk mendedahkannya dan mengambil masa lebih lima tahun.

Sesungguhnya pembongkaran berani yang dibuat oleh reformis bangsa dan pahlawan umat itu sungguh mengejutkan. Sungguh-sungguh mengagumkan. Walaupun itu dibuat atas desakan dendam, namun ia memberi manfaat berguna kepada bangsa. Ia membawa seribu makna dan erti.

Walaupun sebelum ini, ada di antara isu-isu - keburukan dan kebusukan yang didedahkan itu sudah diperkatakan oleh parti pembangkang, namun rakyat kurang percaya. Rakyat memandang itu sebagai satu helah dan tekit pembangkang untuk memburukkan kerajaan. Suara, rayuan dan rintihan pembangkang dilihat sebagai satu jerat dan perangkap. Begitulah persepsi rakyat kita terhadap parti alternatif.

Tetapi kali ini apabila ianya didedahkan sendiri oleh Anwar, orang yang berada di dalam poket Mahathir, orang yang tiap-tiap pagi menghadapi Mahathir untuk melapaz sumpah dan taat setia, baru orang ramai yakin dan percaya. Baru rakyat tersintak. Baru rakyat membuka minda dan mata dan nampak segala kebusukan itu. Baru rakyat dapat menghidup betapa wanginya kebusukan yang Mahathir hasilkan itu. Itulah hikmat yang telah Allah anugerahkan kepada rakyat Malaysia. Walaupun ianya agak terlambat kerana sudah banyak khazanah negara dirompak, tetapi sekurang-kurangnya rakyat masih ada sedikit waktu lagi untuk memperbetulkan segala kepincangan ini.

Demikianlah adat manusia. Bukan senang untuk mereka menyakini dan mempercayai sesuatu. Sukar untuk mereka percaya orang yang selalu bercakap soal moral, kebersihan dan kononnya tegas, tiba-tiba melakukan penyelewengan. Tiba-tiba menyembunyikan keburukan dan kebusukan! Tiba-tiba membenarkan ke-

durjanaan untuk diri sendiri dan sanggup pula melindungi penjenayah asalkan penjenayah itu dapat memberi sesuatu kepadanya. Susah. Di tambah pula yang mendedahkan perkara itu adalah musuh politiknya, makin sukar untuk dipercayai. Tetapi apabila orang yang dididik sendiri mendedahkannya, rakyat tidak dapat menafikannya lagi.

Barang kali jika Anwar tidak berani mengorbankan kedudukan dan kuasanya, menggadaikan kebahagiaan keluarganya serta membiarkan matanya lebam, segala kebusukan dan keburukan itu masih tersimpan kemas. Selama itulah para penyangat dan lanun negara terus bermaharajalela dan orang terus memuja mereka sebagai pemimpin ikhlas dan jujur. Pemimpin baik dan adil.

Sebenarnya pengorbanan Anwar itu terlalu mahal untuk dibayar. Kalau bukan Anwar mungkin tidak ada orang untuk melambakkkan keburukan dan kebusukan Mahathir. Musa Hitam dan Tengku Razaleigh pernah bergaduh dengan Dr. Mahathir tetapi mereka tidak sanggup menerima risiko seperti Anwar. Benarlah nama Anwar bermaksud ‘cahaya’ itu membawa erti dan tuah kepada rakyat Malaysia. Anwar yang bererti cahaya, membawa sinar kepada rakyat Malaysia. Anwar telah memberi sorot baru kepada rakyat Malaysia untuk melangkah ke kurum baru.

Cuma apa yang mengilangkan kita tidak ramai mereka menyedari dan sanggup berkurban seperti beliau. Tidak ada orang yang sanggup bersusah payah untuk sama-sama menyamarakkan api atau cahaya yang telah dipercikkan oleh Anwar itu. Mereka hanya berkukuk di pagi hari kemudian berhenti di tengah hari. Harapkan panas sampai ke petang rupanya hujah di tengah hari.

Kalau ada pun hanya di peringkat awal saja. Mereka hanya berkobar pada mula-mula saja selepas itu mengendur dan terus menghilangkan diri. Mereka tidak sanggup untuk berhadapan dengan ancaman dan ugutan daripada pihak berkuasa. Jelaslah

mereka belum bersedia untuk menjadi pejuang. Mereka turun ke laut hanya dengan kail panjang sejengkal, mereka terjun ke gelanggang dengan darah hanya setampuk pinang dan bersenjatakan keris kayu yang tumpul dan dompok.

Pada malam Anwar dipecat ramai sahabat dan pejuang yang menjadii kronis Anwar hadir ke rumah nombor 47. Tetapi akhirnya mereka lepas seorang, seorang menghilangkan diri. Lebih malang lagi mereka yang berada di tengah-tengah rumah Anwar malam 2 September 1998 itu, yang bertindak menjadi jurubicara, seperti Datuk Ahmad Zahid Hamidi, Datuk Suhaimi Ibrahim, Datuk Ibrahim Saad, YB Ruhanie Ahmad, YB Mukhtarruddin Yusuff dan lain-lain, adalah di antara orang terawal lari meninggal Anwar.

Kini yang tinggal dan tetap setia meneruskan perjuangan reformasi bersama Anwar hanya Roslan Kassim, Dato' Kamaruddin Jaaffar, Shaifuddin Nasution, Azmin Ali, Mustapa Kamil Ayub, Rahim Ghous, Hamdan Taha dan lain-lain. Syabas dan tahniah diucapkan kepada mereka. Sebenarnya keadaan itu tidak menghairankan kerana Anwar sendiri pada malam beliau dipecat itu telah menyebut; "mereka yang hadir ini adalah sahabat sejati, bukan sahabat projek."

Sebenarnya Dr. Mahathir tersilap strategi apabila memperlakukan Anwar begitu. Dr. Mahathir tidak sangka bahawa Anwar masih terus boleh bertindak walaupun beliau dipenjarakan. Pada perhitungan Mahathir apabila Anwar didakwa dan di penjarakan, maka lengsailah segala episod tentang dirinya. Beliau kira beliau boleh tidur aman dan segala-galanya terbungkus sepi.

Tetapi ternyata tanggapan itu silap. Meskipun tangan dan kaki Anwar diikat, mulut dan telinganya disumbat, matanya dilebamkan, namun Anwar masih boleh melakukan sesuatu. Beliau masih boleh terus menyerang Mahathir dengan mendedahkan segala kebusukan dan keburukannya. Di sinilah kita nampak

bahawa Anwar tidak mudah mati akal dan terus mendapat sokongan. Walaupun berada dalam penjara, namun beliau masih terus membuat pendedahan demi pendedahan. Ini juga menunjukkan ramai yang bersimpati dengan beliau.

Pendedahan Anwar terhadap keburukan dan kebusukan kerajaan dan pemimpin Umno sebenarnya bermula sebaik saja beliau disingkir dari kerajaan dan Umno. Namun pendedahan yang dibuat ketika itu secara umum. Ia lebih bersifat politik. Apa yang Anwar dedahkan ialah tentang agenda konspirasi untuk menyingkirkannya. Anwar mendakwa penyingkirannya ialah merupakan satu konspirasi amat jijik diperingkat tertinggi. Bagaimana pun ketika itu orang ramai masih kabur apakah motif maka beliau perlu disingkirkan.

Tetapi apabila beliau mendedah dan melambakkan satu demi satu keburukan dan kebusukan pemimpin Umno, barulah orang dapat menyelami apakah motif maka beliau perlu dinyahkan dari Umno dan kerajaan. Rupa-rupa tindakan itu ialah untuk melindungi keburukan dan kebusukan para pemimpin Umno dan BN termasuk ketuanya sendiri Haji Mahathir Mohamad. Penyingkiran Anwar adalah bagi menghalal dan membolehkan mereka terus melakukan penyelewengan dan penipuan kepada rakyat.

Pendedahan yang dibuat oleh Anwar benar-benar menyayatkan hati dan mengejutkan. Ia benar-benar merindingkan bulu rompa. Pendedahan itu secara tidak langsung membuka pekong bagaimana tokoh-tokoh penting di peringkat menteri dan menjadi orang kepercayaan Dr. Mahathir telah terlibat dan terpalut dengan pelbagai skandal, rasuah dan kegiatan rendah moral. Dalam pada itu ia turut mendedahkan bahawa telah berlaku kepincangan di dalam sistem perundangan negara gara-gara wujud soal pilih kasih dan naungan ke atas sistem perundangan.

Pendedahan yang dibuat secara bersiri dan penuh strategi itu

dimulakan oleh Anwar dengan mendedah tembelang yang dilakukan oleh Datuk Paduka Rafidah Aziz, Menteri Perdagangan dan Perindustrian Antarabangsa. Menurut Anwar Rafidah secara terang-terang telah terlibat dalam penyalah gunaan kuasa kerana mengambil bahagian dalam mesyuarat untuk kelulusan menjual saham-saham kepunyaan menantunya.

Rafidah selaku Pengerusi Pembahagian Saham Bumiputera MITI telah meluluskan 1.5 juta saham Leader Universal Holdings Bhd kepada menantunya, Fazrin Anwar dan kemudian beliau juga meluluskan permohonan Fazrin bagi menjual 450,000 unit saham tersebut. Selain itu Rafidah juga telah meluluskan pembahagian 4,173.910 unit saham FACB kepada Fazrin.

Salah laku Rafidah ini dinyatakan menerusi satu laporan polis oleh Anwar terhadap Mahathir dan Ghani Patail di balai polis Dang Wangi Report Nombor 20255/99 yang mempersoalkan kenapa tindakan dan pendakwaan tidak diambil ke atas Rafidah.

Pendedahan kedua oleh Anwar ialah tentang penyelewengan yang berlaku ke atas Perwaja Stell menyebabkan kilang besi itu mengalami kerugian sebanyak RM13 billion. Beliau juga turut mempertikaikan kenapa pendakwaan ke atas Tan Sri Eric Chia masih belum dilakukan lagi. Kelambatan tindakan itu menyebabkan Anwar mendakwa ada perlindungan daripada Dr. Mahathir Mohamad ke atas sahabatnya itu (Eric Chia).

Pendedahan ketiga ialah mengenai Tun Daim Zainuddin berhubung dengan penerimaan wang rasuah bernilai lebih kurang RM 320 juta daripada tiga orang tokoh korporat iaitu Tan Sri Halim Saad sebanyak RM RM100 juta, Tan Sri Wan Azmin sebanyak RM150 juta dan Tan Sri Tajuddin Ramli sebanyak 70 juta.

Selain itu dakwa Anwar, Daim juga turut menggelapkan saham kepunyaan Umno sebanyak 400 juta saham. Saham itu yang

kepunyaan syarikat Hati Budi yang dikuasai oleh Umno atas arahan Daim telah diluputkan dan dipinda kepada syarikat United Engineers dan Tan Sri Halim.

Anwar pernah mempertikaikan perkara ini sewaktu beliau menjadi Timbalan Presiden Umno dahulu, tetapi tidak ada apa-apa jawaban mengenainya. Lebih malang lagi ahli-ahli Umno menjadi tunggul kayu saja dan tidak mempertikaikan apa-apa. Dan apabila Daim terjempit, seperti mana kenyataan Anwar, barulah Daim menjelaskan didalam perhimpunan agung Umno yang baru lalu.

Selain itu Anwar turut mendedahkan bagaimana bank International of Malaysia yang dulunya dikenali dengan nama Hock Hua Bank atas nama Daim yang mempunyai cawangan di luar negeri yang dipercayai menjaga kepentingan Daim dan Mahathir dan diluluskan sebaik saja Daim berhenti menjadi Menteri Kewangan tidak ada penyiasatan ke atasnya.

Selain dari pendedahan itu, Anwar turut sama mendedah dan mempertikaikan moral Dr. Mahathir, sikap *double standardnya* yang membiarkan penjenayah tanpa sebarang tindakan. Sekurang-kurangnya ada empat kes yang cuba dilindungi oleh Dr. Mahathir ataupun penyiasatan tidak diteruskan. Kes-kes itu ialah berkaitan dengan Megat Junid Megat Ayub yang dikatakan ada hubung kait dengan kes pembunuhan Muktakizah. Kedua kes melibatkan Eric Chia. Ketiga yang rasuah yang melibatkan Daim. Dan keempat kes yang melibatkan bekas Ketua Menteri Melaka, Tan Sri Rahim Tamby Chik.

Paling mengejutkan juga pendedahan tentang rumah kepunyaan Mahathir sebanyak sembilan buah yang dihadiahkan oleh taukeh Cina. Pendedahan ini dibuat dalam sepucuk surat terbuka bertarikh 3 Ogos 1999.

Rumah-rumah itu ialah; satu di Langkawi yang dihadiahkan oleh Ting Pheik Khing, di Subang oleh Rin Kei Men, di Country Height dan Mines oleh Lee Kim Yeu, Bukit Tinggi berharga 21 juta oleh Tan Sri Vincent Tan, di London atas nama Daim, Vancouver atas nama Mirzan dan di Argentina dan Florida atas nama Dr. Mahathir.

Anwar memperkaikan kenapa pihak berwajib tidak mengambil tindakan ke atas Dr. Mahathir. Kenapa beliau tidak didakwa menerima rasuah dengan pemberian rumah-rumah itu. Jika tidak kerana ada imbalan, mustahil taukeh-taukeh cina itu bermurah hati untuk menghadiahkan rumah kepada Mahathir. Apakah kerana jasa maka beliau diberikan rumah begitu. Apakah pemimpin lain tidak berjasa? Tunku Abdul Rahman, Tun Razak, Tun Hussein Onn, berapa buahkah rumah yang diberikan kepada mereka oleh taukeh-taukeh Cina?

Rumah-rumah kepunyaan Mahathir itu tentulah lebih cantik dan besar daripada rumah nelayan di Kuala Kedah. Tentulah lebih hebat dan menawan dari rumah penoreh getah di Baling. Dan tentulah ia lebih agung dan gah daripada rumah pengayuh beca di Alor Star.

Pendedahan yang dibuat oleh Anwar itu hanya sebahagian saja dan terbatas kepada hero-hero dan watak utama dalam Umno. Kita percaya masih banyak penyelewengan dan rasuah yang berlaku. Kalau diambil kira kepada kata-kata bekas Setiausaha Politik Anwar, Mohd Ezam Noor bahawa Anwar mempunyai lima atau enam kotak dokumen mengenai penyelewengan, jelas, bahawa kebusukan dan keburukan sudah bermaharaja lela. Sepatah kata Datuk Seri Ling Liang Sik, Presiden MCA jika bahagian kepala ikan sudah busuk, seluruh ikan itu akan membusuk. Mungkin kalau didedah semuanya seluruh Semanjung ini akan busuk dan hampak.

Apapun kita ucapkan tahniah di atas keberanian Anwar, setidak-

tidaknya beliau cuba hendak menyelamatkan nasib bangsa dan negara. Musibah yang menimpa beliau memberi pelung kepadanya untuk menebus dosanya selama 16 tahun dalam Umno. Pendedahan itu akan memberi kesedaran betapa, kerajaan yang ada hari ini begitu teruk moralnya, begitu buruk akhlaknya. Adalah wajar berlandaskan kepada fakta dan hujah-hujah (pendedahan) kerajaan gang ada hari ini perlu dibersihkan kalaupun tidak pun terus ditukar dengan kerajaan alternatif.

Kita bimbang sekiranya gelaja dan kegilaan pemimpin hari ini yang tamak itu berterusan tidak mustahil negara ini akan mengalami nasib yang sama seperti Maxico yang pernah bankrup kerana tindak tanduk pemimpinnya. Bagi mengelakkan itu adalah menjadi tanggungjawab rakyat untuk menyingkirkan pemimpin yang membawa wabak buruk dan busuk itu demi masa depan negara.



*Wajah komersial Anwar Ibrahim. Gambar ini selain menunjukkan kekejaman bekas Ketua Polis Negara, Rahim Noor, ia secara tidak langsung menjelaskan betapa zalimnya Dr Mahathir Mohamad.*



*Sanusi Junid dan Abdullah Badawi yang bercita-cita untuk menjadi PM bergembira sakan apabila Anwar disingkir dan dipenjarakan. Sanusi sampai angkat tangan. Sanusi tuduh Anwar munafik. Tetapi saya tahu siapa yang lebih munafik di antara Sanusi dengan Anwar.*

# **UMNO SEMAKIN GILA TAHUN 2000**

**9**

**S**IAPA Perdana Menteri selepas Dr. Mahathir? Inilah pertanyaan usang yang wujud sejak tahun 1990 lagi. Pertanyaan ini tidak akan lengsai dan tamat selagi Dr. Mahathir tidak tutup mata - *kha lu inalilah hiwaina hirajium...* Selepas Mahathir tutup mata, mayatnya dikebumikan, liang lahad ditimbus dan pusaranya dipacakkan dua batang nisan, barulah pertanyaan ini akan tamat. Kalau pun Mahathir sakit, koma bertahun-tahun di hospital, pertanyaan ini tidak boleh diajukan lagi... Telah beberapa kali Dr. Mahathir sakit, tetapi tiba-tiba dia kembali sihat sepuluh kali sihat daripada sebelumnya.

Pokoknya selagi Dr. Mahathir masih hidup, selama itulah pertanyaan ini akan tetap hidup dan relevan. Pertanyaan itu seperti hantu atau momok yang mengangggi seluruh rakyat Malaysia. Kadang kala orang sudah naik loya untuk melayan pertanyaan itu. Sesiapa pun dewasa ini tidak dapat meneka dengan tepat, dan menjawab siapakah Perdana Menteri selepas Dr. Mahathir. Mahathir sendiri pun tidak dapat merungkai ketentuan Allah SWT tentang subjek itu.

Dulu selepas 'kepergian' Tan Sri Musa Hitam dan Tun Ghafar

Baba orang menduga Anwar Ibrahim yang akan dinobatkan menjadi PM. Maka Anwar pun dikultuskan sedemikian rupa oleh para kronisnya. Tetapi sejarah telah mencatatkan Anwar tidak akan menjadi Perdana Menteri selepas Dr. Mahathir kalau menurut hirerki Umno. Anwar kini bukan lagi Timbalan Presiden Umno malah bukan lagi ahli Umno.

Anwar hanya mungkin boleh menjadi Perdana Menteri selepas Dr. Mahathir mengikut cara-cara atau kaedah lain. Tidak pulalah diketahui apakah kaedah itu? Mungkin misalnya kalau ada pemberontakan atau revolusi rakyat secara menyeluruh untuk membebaskan Anwar. Setakat ini hanya takdir Allah sahaja yang memungkinkan beliau boleh menjadi PM. Kalau menurut logik akal manusia, sudah tidak mungkin lagi. Amat mustahil sekali.

Kuasa Allah tidak ada yang mustahil. Allah berkuasa ke atas semua makhluk ciptaanya. Dulu pun banyak orang beranggapan amat mustahil Anwar tidak akan menjadi Perdana Menteri, kerana ketika itu beliau sudah berada di tangga paling atas. Tetapi apa sudah terjadi akhirnya? Yang tidak disangka-sangka terjadi, yang disangka-sangka tidak berlaku. Cempedak sudah menjadi nangka.

Saya masih ingat kepada satu peristiwa di dalam kumpulan al-Arqam yang telah diharamkan. Sebahagian besar orang-orang Arqam, tidak percaya kepada kata-kata Ashaari Muhammad bahawa Anwar tidak akan menjadi Perdana Menteri. Sewaktu gah dahulu Ashaari pernah membuat *prediction*, bahawa Anwar tidak akan menjadi Perdana Menteri Malaysia. Tidak pula diketahui apakah asas dan hujahnya. Cuma beliau mengatakan mengikut firasat dan bisikan hatinya. Ternyata kata-kata Ashaari itu benar, (setakat hari ini), Anwar masih belum menjadi Perdana Menteri.

Tentu orang-orang Arqam yang masih setia kepada "abuya" merasakan telahan Ashaari itu benar. Mereka terus mengaitkan bahawa Ashaari mempunyai ilmu khasyaf yang tinggi. Dapat

melihat sesuatu yang bakal terjadi. Kerana terlalu taksub kepada keyakinan inilah menyebabkan anggota Arqam mendarjatkan Ashaari sebagai wali. Mereka telah meletakkan Ashaari sebagai mempunyai keramat dan maunah yang akhirnya menyebabkan Ashaari menjadi seperti bawang, rusak kerana jambaknya sendiri.

Tetapi dalam pada itu, ada juga kata-kata bekas Syaikul Arqam itu tidak benarnya atau pun *predictonnya* tidak menjadi. Misalnya kalau menurut firasatnya yang akan jadi Perdana Menteri selepas Mahathir ialah Ghafar Baba. Kemudian Ghafar akan lepaskan kepada Sanusi. Selepas pada itu Sanusi pula akan melepaskan kepadanya. Perkara ini amat ganjil, tetapi itulah teori *khawariqul ahdah* - sesuatu yang berlaku di luar jangkaan yang menjadi kepercayaan dan modal besar kepada jemaah darul Arqam.

Apakah teori itu masih relevan? Jika dilihat kepada akal yang sihat, nampaknya teori itu tersisih dan tersasar jauh. Ghafar yang kena halau di Indonesia kerana cuba hendak mengajar rakyat Indonesia agar membenci Anwar dan menyayangi Mahathir sudah makin terpinggir dan jauh dari pusat kekuasaan Umno. Tidak mungkin lagi untuk Ghafar *come back*, menjadi hero dalam Umno,. Dia juga sudah tua, sama dengan Mahathir. Mereka berdua hanya menunggu giliran sahaja siapa dulu yang bakal dijemput malaikat.

Begitu juga dengan Sanusi Junid, sudah jauh berada di utara. Tahun 1996 hampir-hampir Sanusi lemas di Pulau Langkawi. Sekiranya Dr. Mahathir tidak menggunakan kuasa *ultramannya* bagi menyelamatkan nasib politik Sanusi, MB Kedah itu sudah kekembungan perut dan lemas dalam lautan Langkawi kerana tewas ditangan Datuk Abu Bakar Taib.

Jadi adalah mustahil orang yang sudah lemas dan ketidakcukupan oksigen di dalam politik Umno, (Sanusi) akan muncul menjadi Perdana Menteri. Kalau Ghafar sudah tidak jadi PM, Sanusi tidak jadi PM, macam mana Ustaz Ashaari hendak jadi

Perdana Menteri? Bagaimana pun seperti saya katakan, kuasa Allah, takdir Allah tidak siapa menduganya. Selagi tidak ada sesiapa yang menghadap Yang Dipertuan Agong untuk mengangkat sumpah memegang jawatan Perdana Menteri, maka selama itulah peluang itu masih terbuka kepada sesiapa saja yang berminat termasuk Ashaari, Fadzil Nor, Ku Li maupun Anwar Ibrahim.

Nah... begitu juga dengan Anwar. Hanya kuasa Allah sahaja yang akan menentukan apakah dia akan menjadi PM atau pun tidak. Manusia hanya boleh mentadbir, Allah juga yang mentakdirkan. Manusia hanya boleh merancang, Allah jua yang menentukannya. Selepas kita berusaha, maka berserahlah kita kepada qada dan qadar Allah SWT.

Berbalik kepada topik perbicaraan asal, siapa dia akan bakal menjadi Perdana Menteri selepas Dr. Mahathir? Ramai orang menduga Dr. Mahathir akan berhenti tahun hadapan atau setidak-tidaknya selepas dua tahun beliau melangkah masuk ke alaf baru tahun 2000. Walaupun nafsu serakahnya ingin berkuasa sampai mati, tetapi Dr. Mahathir tidak berkeupayaan untuk meneruskan. Dr. Mahathir sedari tentang "sunahtuLah", bahawa setiap yang baharu (mahadas) itu akan musnah dan hancur. Beliau sedar bahawa beliau tidak akan menongkat langit, dan beliau pun pernah mengatakan dia tidak akan berkerja sampai mati.

Dr. Mahathir juga tahu akan bala dan risikonya, makin lama beliau menjadi PM, negara ini akan menjadi semakin huru harta. Makin lama beliau memerintah makin banyak keburukan dan kebusukan. Hari ini pun berbagai keburukan dan kebusukan telah timbul dan dihidu oleh rakyat. Mahathir juga sedari bahawa popularitinya sudah menurun. Beliau sudah menjadi seperti bintang filem yang dimamah usia, peminatnya sudah berkurangan tawaran berlakun pun tidak berapa banyak lagi.

Hendak tak hendak, paksa ataupun tidak dia akan turun juga. Ada juga maklumat yang mengatakan Mahathir akan berhenti sebaik sahaja selesai pilihanraya ke 10 ini. Beliau khabarnya telah diberikan isyarat dan amaran terakhir agar berundur. Khabarnya beliau bersetuju tetapi dengan satu syarat biarlah BN menang dalam pilihanraya. Dr. Mahathir mahu berundur dalam keadaan partinya menang. Dalam erti kata lain beliau mahu mati dengan mata tertutup.

Sejauh manakah benar atau tidak, *waLahualam*. Dan sejauth manakah pula benar dan ikhlasnya Mahathir, *waLahualam*. Sebab kita sudah faham dengan telatah dan janji Dr. Mahathir. Hari ini Dr. Mahathir boleh berkata begini, dan esoknya ia boleh menafikan kata-katanya sendiri.

Apa yang dapat dirasakan sekurang-kurangnya, ada dua perkara yang diperlukan oleh Dr. Mahathir sebelum dia berhenti. Pertama kemenangan BN mencapai majoriti dua pertiga. Ini untuk membolehkan beliau berhenti dengan bergaya. Kedua ialah jaminan tentang masa depannya, anak-anaknya dan hartanya. Sekiranya beliau mendapat jaminan terhadap dua perkara ini, kita rasakan dia akan berhenti.

Perkara kedua itu - tentang jaminan masa depannya, anak-anaknya dan hartanya itu adalah amat penting dari segala-galanya. Hari ini apa yang ditakuti oleh Dr. Mahathir selepas berhenti ialah "bayangan ketakutan" menyerukupi dirinya. Dia tidak mahu selepas kehilangan kuasa, beliau berada dalam kehinaan. Itulah yang Dr. Mahathir takut. Bayangan itulah menyebabkan beliau sukar untuk melepaskan tali kekuasaan. Apa yang berlaku ke atas Anwar hari ini benar-benar mengangguli emosi dan jiwa Mahathir.

Lantaran itu dia sangat memerlukan kemenangan. Dia tidak mahu dia dikenang sebagai Perdana Menteri yang terhebat tetapi berhenti dalam kekalahan. Dr. Mahathir tidak mahu berlaku anti

klimek di dalam hidupnya. Tetapi bagi manusia yang bernalfsu besar dan berfikiran jauh dia tidak kira itu. Bagi Dr. Mahathir apakah orang suka atau tidak, bukan menjadi perhitungannya. Dr. Mahathir tidak menerima pendapat dan pandangan orang. Sifat-sifat diktator melingkari hidup Dr. Mahathir. Diktator hanya mahu kepada kemenangan dan bukan kekalahan, tanpa mengira apakah kemenangan itu diperolehi secara beradab atau pun tidak? Seseorang diktator sangat takut kepada saat-saat akhir pemerintahannya.

Sekiranya dua perkara itu Mahathir dapat jawaban, dia akan berhenti sebelum dia mati. Tetapi seandainya, jawaban itu tidak ada dan beliau tidak yakin, Dr. Mahathir tidak akan berhenti. Dia rela menutup matanya di atas kerusi dan tidak mahu melihat apakah yang bakal terjadi selepas itu. Dr. Mahathir lebih rela begitu, daripada melepaskan kuasa, kemudian mengikut kebiasaanya dan selepas itu menjadi hina dina.

Siapakah yang akan dapat memberi jaminan kepada Dr. Mahathir itu. Siapakah di kalangan tokoh-tokoh didalam Umno yang dikira dapat memberi jaminan? Siapa yang dapat memberi jaminan itu, orang itulah yang akan ditunding oleh Dr. Mahathir menjadi penggantinya.

Hari ini ada tiga orang sahaja yang dikira berpotensi dan sedang menunjukkan ghairah untuk memberi jaminan itu. Mereka inilah juga yang bakal mewarisi takhta kerusi Perdana Menteri. Mereka itu ialah, timbalan sekarang, Datuk Seri Abdullah Ahmad Badawi, bekas Presiden Semangat 46, Tengku Razaleigh Hamzah, dan Naib Presiden Umno, Najib Tun Razak.

Inilah tiga nama yang ada di dalam Umno. Lain-lain nama tidak layak, kerana kurang ketokohan ataupun kerana kedudukan didalam parti lebih rendah daripada mereka ini.

Abdullah buat masa ini ialah Timbalan Perdana Menteri. Beliau dilantik memegang jawatan itu sebagai mengganti Anwar. Abdullah tidak dapat memberi jaminan seperti mana yang dikehendaki oleh Dr. Mahathir itu kerana beliau sendiri amat arif jawatan yang disandang tidak memberi jaminannya kepadanya akan dilantik sebagai PM. Bukan setiap TPM itu automatik akan menjadi PM. Bukti telah ada sebelum ini. Sudah tiga orang bekas TPM, tidak menjadi PM malah mereka terasingan dalam keadaan hina dan dihinakan oleh Dr. Mahathir. Abdullah amat faham perkara ini sebab itulah beliau senantiasa berada dalam debaran. Sunnah Mahathir mungkin akan menimpa dirinya pula?

Dalam hirarki parti, Abdullah adalah Naib Presiden. Beliau mendapat undi kedua terbanyak selepas Najib Razak. Abdullah juga sedar jika diukur prestasi, sokongan dan pengaruh dalam parti, Najib adalah tokoh yang berada di tempat ketiga selepas Anwar Ibrahim ketika itu. Sepatutnya Najiblah yang dilantik menjadi TPM.

Apabila jawatan itu kosong Najib dan orang-orangnya dikatakan sudah mula berangan-angan untuk menjadi TPM. Tetapi kerana kelemahan dari segi moral dan kekurangan pengalaman, Najib terpaksa akur dengan perlantikan Abdullah dan bersetuju kalau beliau diletakkan di *ranking* ketiga selepas Abdullah dan Ku Li.

Selain Najib ialah orang yang pelahap untuk menjadi PM sejak tahun 1987, Tengku Razaleigh Hamzah. Inilah tiga calon yang dikira layak dan mempunyai peluang terbaik masa ini untuk mengganti Dr. Mahathir, dalam Umno. Seperti dikatakan tadi, walaupun orang lain juga berangan untuk menjadi PM, seperti Sanusi Junid, (kerana termakan teori Ashaari), tetapi jauh panggang dari api.

Tiga calon inilah yang akan kita perkatakan dan mencari peluang dan ruang siapakah yang paling layak. Mereka ini sedang

mencaturkan politik masing-masing untuk naik. Sedang mengasah segala senjata dan sedia bertemu apa saja bomoh untuk menang.

Yang menariknya Dr. Mahathir tidak menunjuk siapakah bakal penggantinya. Dalam hal ini, inilah baiknya Dr. Mahathir Mohamad, beliau tidak akan campur tangan dan cuba mempengaruhi ahli-ahli Umno agar mengikut kehendaknya dalam soal mencari siapakah pengganti beliau. (Puji Mahathir sikit!)

Tetapi dalam pada itu beliau tetap mahu mnencari siapakah yang dapat memberi jaminan dia akan selamat. Dr. Mahathir tidak mahu memenuhi kehendak ahli tetapi kehendaknya mestilah dapat dipenuhi. Itu lebih penting bagi Dr. Mahathir.

Kenapa dikata demikian? Sebab kalau beliau hendakkan Abdullah, Dr. Mahathir tidak akan undang Tengku Razaleigh Hamzah menyertai Umno semula. Apabila beliau undang Ku Li, ini bermakna beliau menghalang peluang Abdullah. Perlantikan Ku Li sebagai Penggerusi Badan Perhubungan Umno Kelantan, seolah memberi tapak kepada Ku Li untuk berpijak dan melangkah lebih jauh. Ku Li akan menjadikan Kelantan sebagai pengkalan untuk menggerakkan armadanya semula bagi mencari harta karung (jawatan PM) yang digilainya selama ini. Tentunya langkah Ku Li akan menganggu impian Abdullah untuk menjadi PM. Dan Abdullah juga tahu akan hakikat ini.

Abdullah pun tahu hakikat siapa lebih layak menjadi PM di antara beliau dengan Ku Li. Dalam apa sudut sekalipun Abdullah mesti berada di belakang Ku Li. Sementelahan pula sewaktu berlaku krisis Umno tahun 1987, Abdullah hanyalah seorang panglima yang bersedia untuk menembak sesiapa saja yang khianat kepada Ku Li. Kalau ada pun kelebihan kepada Abdullah hanya disegi moral dan fahaman agama saja. Tetapi keisitmewaan yang satu itu pun kini sudah mula dipertikaikan oleh orang ramai. Fahaman dan cakap-cakap tentang agama oleh Abdullah lebih kurang

Hamid Othman dan Yusuf Noor sahaja.

Begitu juga Dr. Mahathir tidak terang-terangan menunjukkan Ku Li untuk menggantinya. Walaupun Ku Li merasakan bahawa Dr. Mahathir jujur dan ikhlas kepadanya, tetapi hakikatnya tidak semudah itu. Sekiranya Mahathir mahukan Ku Li, sejak awal-awal lagi Mahathir mengambil Ku Li menyertai kabinetnya. Sesuai dengan keadaan sekarang, Mahathir boleh lantik Ku Li menjadi Menteri Kewangan. Kalau tidak pertama pun yang kedua, tempat Datuk Mustapa Mohamed sekarang. Siapa berani mengatakan pengalaman dalam soal-soal kewangan, Ku Li adalah lebih baik daripada Mustapa? Tetapi kenapa Mahathir masih mempercayai kepada dasar kewangan ala Daim?

Atas dasar itulah Dr. Mahathir tidak menunjuk sesiapa untuk menggantinya. Sebaliknya apa yang kita lihat Dr. Mahathir melepaskan kedua calon utama itu mencari kekuatan masing-masing. Mahathir seolah tidak mahu campur tangan dalam menentukan siapakah yang berhak menggantinya selepas ini. Adapun kedudukan Abdullah itu sementara sahaja laksana tidak ada rotan akar pun berguna, macamlah kedudukan Ghafar selepas Musa Hitam meninggalkan kabinet.

Berdasarkan ini mungkin Dr. Mahathir akan memberi peluang kepada ahli untuk menentukan siapakah di antara kedua itu paling layak. Atau pun memberikan peluang kepada mereka berdua menunjukkan kekuatan masing-masing. Peluang terbaik ialah dalam pilihanraya akan datang.

Pilihanraya ini secara tidak langsung menjadi medan pertarungan untuk Abdullah dan Ku Li menguji kekuatan bagi membolehkan mereka dilantik menjadi PM. Mahathir akan jadikan pilihanraya ini sebagai gelanggang kedua pahlawan itu bertarung. Untuk itu Mahathir serahkan Penang kepada Abdullah. Manakala Kelantan pula diserahkan kepada Ku Li. Mahathir muh tengok

siapakah di antara keduanya dapat mempertahankan negeri masing-masing.

Sekiranya Abdullah berjaya mengekalkan semua kerusi Umno di Penang itu bermakna Pak Lah menang dan layak untuk menjadi PM. Begitu juga kalau Ku Li berjaya menumpaskan PAS di Kelantan, bermakna Ku Li juga layak menjadi PM. Keadaan itu merumitkan untuk Mahathir memilih di antara keduanya. Tetapi yang menariknya, natijah daripada kedua-dua kemenangan itu tetap memberi keuntungan kepada Dr. Mahathir. Dan kemenangan itu tentulah mengembirakannya kerana ia membolehkan untuk beliau terus berkuasa dengan selamat dan sihat.

Pun begitu juga sekiranya kedua-duanya tidak dapat menunjukkan ‘hanelan’ (keberanian dan kegagahan) masing-masing ia tidak merugikan Dr. Mahathir, kerana semuanya terpaksa mengaku kalah. Dan ini situasi ini sekali lagi menguntungkan Dr. Mahathir kerana ia boleh terus menjadi PM. Di sinilah bijak dan pintarnya Dr. Mahathir dalam percaturan politik, dari segi mana, sudut mana, ia tetap memberi kelebihan kepadanya.

Justeru hari ini diam-diam Abdullah dengan Ku Li sudah berlaga. Masing-masing sudah mengatur strategi dan persiapan untuk bertanding tahun depan. Kalau diperhatikan hari ini, Ku Li sudah pun terperasan dia sudah menjadi Timbalan Perdana Menteri apabila dijemput merasmi situ merasmi sini. Lambat bersuara saja beliau sudah bersedia untuk merasmikan apa saja, hatta kalau ada jamban awam hendak dirasmikan pun beliau sanggup. Hendak tonjol dan popularkan diri katakan.

Telatah Ku Li itu sedikit sebanyak merisaukan Abdullah. Tetapi *the clean man* ini tidak menunjukkan keresahan. Beliau tetap mempunyai kelebihan. Atas kapasiti sebagai TPM dan juga Menteri Dalam Negeri, beliau bergerak dan mengatur strategi mengikut caranya. Cara Pak Lah, iaitu bergerak dalam diam.

Bagaimana pun sesiapa yang gagal dalam percubaan itu nanti, maka orang itu kena mengaku kalah. Sekirannya Ku Li gagal untuk merampas Kelantann, dan Abdullah berjaya mempertahankan Penang, nampaknya Abdullah yang akan menjadi PM. Sebaliknya kalau Ku Li berjaya dan Abdullah, tewas mungkin Ku Lilah yang bakal menjadi TPM baru. Kalau kedua-duanya tewas, maka keduanya tidak dapat menjadi PM, dan dengan Mahathir sendiri turut tertumus.

Bagaimana pula kalau kedua-duanya berjaya dengan misi masing-masing? Ku Li berjaya merampas Kelantan dan Pak Lah berjaya mengekalkan prestasi Umno di Penang? Keadaanya menjadi gawat. Kalau ini berlaku keadaan dalam Umno akan menjadi makin gawat. Pertandingan merebut Timbalan Presiden tidak akan dapat dielakkan. Dan Dr. Mahathir sendiri pula jika kedudukan Umno masih mantap, masih dapat mengekalkan majoriti 2/3 beliau akan terus menjadi PM hingga ke atas keranda.

Sekiranya keadaan itu berlaku yang jelas pertandingan tidak dapat dielakkan. Ku Li akan tetap merasakan beliau berhak untuk menjadi TPM, dan begitu juga Pak Lah. Ku Li akan menjadi kemegahan BN di Kelantan sebagai aset untuk dia membuat tuntutan. Pun begitu juga dengan Pak Lah. Apa lagi dia sekarang sudah menjadi TPM merasakan lebih layak.

Kalau tidak ada formula untuk mengatasi perkara ini, maka pertandingan dalam tahun berkenaan menjadi sungguh sengit. Sekali lagi kempen mengempen akan berlaku dengan hebatnya. Peristiwa tahun 1987 dan 1993 akan berulang kembali. Pak Lah sudah tentu akan menggunakan kedudukannya sebagai TPM bagi memastikan pengaruhnya. Manakala Ku Li akan berhempas pulas habis-habisan.

**Ketika inilah Umno akan menjadi lebih gila.**

Sukar untuk diramalkan sekiranya berlaku pertandingan siapa yang akan menang. Yang pastinya, Najib sekali lagi akan menjadi kuasa penentu.

Dalam percaturan merebut TPM, Najib dilihat akan menjadi pemerhati. Beliau yang terkenal dengan *play save* dalam politik akan menjadi kuasa penentu. Sekiranya berlaku pertarungan di antara Ku Li dengan Pak Lah, Najib akan berpihak kepada siapa yang bakal memberi jaminan kepadanya.

Sekiranya Abdullah dapat memberi jaminan, beliau akan berpihak kepada Abdullah. Sebaliknya kalau Ku Li dapat memberi jaminan, maka Najib akan mengikut Ku Li. Apakah Ku Li masih percayakan Najib? Sukar untuk diramalkan. Dalam politik tidak ada musuh yang kekal dan kawan yang kekal. Mungkin juga Najib boleh menyokong Ku Li sebagai hendak berbudi di atas kesalahannya sebelum ini. Mungkin juga tidak.

Manakala jaminan yang dikehendakkan oleh Najib daripada kedua orang itu ialah bahawa dia akan dilantik menjadi TPM. Itu saja.

Pendeknya pertarungan tahun 2000 diramalkan hebat dan persis pertandingan merebut jawatan timbalan pada tahun 1981 dan 1984 di antara Ku Li dengan Musa Hitam. Cuma satu dalam pertandingan kali ini kelebihan di segi pengalaman berpihak kepada Ki Li kerana beliau sudah dua kali bertanding jawatan itu dan sekali jawatan Presiden. Ku Li akan menggunakan segala kepakaran dan pengalaman untuk memastikan pertandingan di abad ke 21 ini berpihak kepadanya.

Jika segala itu berlaku seperti mana yang dijadualkan Umno akan menjadi lebih gila. Umno akan jadi macam wau kertas yang dipukul hujan ribut, akan koyak rabak dan hancur. Hanya satu sahaja untuk menyelamatkan Umno daripada gila, sekiranya di

dalam pilihanraya akan datang Umno kalah dan gagal membentuk kerajaan. Selagi Umno berjaya membentuk kerajaan maka selama itulah perebutan didalam Umno tidak akan berakhir.



*Ustaz Ashaari yang menjadi mangsa konspirasi Pusat Islam kerana cemburu dengan kejayaan Arqam. Apabila Anwar di penjara dan tidak dapat menjadi PM, sedikit sebanyak terubat juga hati Ashaari dan bekas pemimpin Arqam yang geram dengan Anwar.*

# Khulasah Kertas Kerja Dr. Siddiq Fadzil

## **MENELAAH SEJARAH, MENAFSIR KISAH**

**10**

**S**EBUAH kertas kerja yang disediakan dan (tentunya) disampaikan sendiri oleh Dr. Siddiq Fadzil seorang pen- syarah di Universiti Kebangsaan Malaysia (UKM) telah menimbulkan kontroversi. Tentunya kalau sesuatu yang kontro- versi ketika ini ia mestilah menyentuh soal Perdana Menteri, Dr. Mahathir Mohamad. Apa jua kontroversi yang berlaku waktu ini mesti ada kaitan dengan beliau. Sebab Dr. Mahathir itu sendiri tokoh kontroversial.

Sebelum ini novel satira SN Prof Emeritus Datuk Shahnon Ahmad berjudul *shit* juga telah menjadi kontroversi, kerana novel itu dianggap menceritakan perihal Dr. Mahathir dan kerajaannya. Riuh rendah orang politik Malaysia membicarakan soal *Shit*. Sesekali terasa ingin tergelak juga saya apabila mengenangkan isu *Shit* itu. Betapa tidak sesekali sasterawan melontarkan sekutul “tahik” menyebabkan orang politik menjadi pening dan bergelabah membicarakannya.

Kalau menurut laporan akhbar, kertas kerja Dr. Siddiq itu telah menuduh Dr. Mahathir sebagai Fira'un. Kerajaanya disifatkan sebagai kerajaan Namrud. Masya-Allah, teruknya! Dan Dr.

Mahathir sendiri terpanggil untuk memberi respond kepada laporan akhbar itu dengan mengakui, bahawa "saya adalah Maha Fira'un."

Begitulah tafsiran yang dibuat oleh akhbar. Pasti ada motif dan tujuan tertentu kenapa akhbar berkenaan mempunyai interpretasi sedemikian. Mungkin si pelapor itu hendak memenuhi kehendak bossnya, dan bossnya mungkin kerana hendak memenuhi kehendak Mahathir, maka mereka mentafsirkan secara simpalistik begitu walaupun kertas kerja itu mungkin tidak berniat sedemikian jahat.

Menurut laporan akhbar juga kertas kerja itu dibentangkan kepada pelajar. Justeru ia pula ada menyebut Dr. Siddiq cuba menghasut pelajar?

Kerana kertas kerja itu menimbulkan kontroversi, maka membualah naluri saya untuk membaca dan mengkajinya. Mencari apakah hujah-hujah dan alasan-alasan, (kalau benar seperti yang dilaporkan itu). Sekiranya benar Dr. Siddiq Fadzil membuat tuduhan demikian tentu ada alasannya. Orang akademik seperti beliau tidak mudah untuk mengatakan demikian. Selalunya orang akademik bercakap penuh fakta dan hujjah yang mantap!

Alhamdulilah dalam mencari-cari itu, Tuhan telah mengutuskan seorang kawan datang ke rumah pada 18 Ogos lepas. Dalam perbualan tidak semena-mena tersebut pasal Fira'un dan beliau menceritakan yang beliau ada kertas kerja yang ditulis oleh Dr. Siddiq Fadzil itu.

Menurut teman itu kertas kerja itu tidak sedikit pun ada menyebut pasal Mahathir sebagai Fira'un. Dr. Siddiq tidak sesekali menyebut bahawa Dr. Mahathir Fira'un seperti mana yang didakwakan olehnya itu. Cuma katanya kertas kerja itu ada menyebutkan perihal Fira'un, Namrud, Qaron dan Zaman Edan. Mungkin itulah menyebabkan ianya menghiris jiwa Mahathir.

Siapa yang makan lada dialah yang biasanya merasakan pedas.

Kerana merasakan ia menarik saya memohon kepada teman itu untuk menyerahkan salinannya kepada saya. Baik juga kalau saya masukkan ke dalam buku ini, kerana ia mungkin ada kesesuaian dan menambahkan lagi fakta. Keesokkan paginya sebelum saya menguakkan daun pintu untuk menyedut udara pagi, kertas kerja itu sudah terselit di bawah pintu. Terima kasih teman.

Saya terus menatap kertas kerja berkenaan yang berjudul: "*Menelaah Sejarah, Menafsir Kisah*" yang mengandungi sembilan muka surat bersaiz A4.

Walaupun saya jarang sekali membaca tulisan Dr. Siddiq, tetapi kalau sudah memulakan membacanya saya tidak tahu hendak berhenti. Idea dan kupasan Dr. Siddiq mengenai sesuatu isu, sangat menarik. Apa lagi gaya bahasa beliau sungguh mempesonakan. Dr. Siddiq kaya dengan perbendaharaan, terutamanya bahasa Jawa. Inilah menyebabkan orang tidak boleh berhenti apabila membaca tulisannya.

Tidak sampai 20 minit saya selesai membaca kertas kerja itu. Apa yang dapat saya rumuskan kertas kerja itu *simple* saja, tetapi ia padat dan sungguh sinis. Wajarlah kalau ada pihak-pihak tertentu terasa dan senak dada membacanya.

Tetapi, benar seperti disebut oleh sahabat saya tadi, Dr. Siddiq tidak menyebutkan Mahathir seperti Firaun pada mana-mana baris atau mana-mana ayat. Atau pun mengatakan kerajaan hari ini seperti Namrud atau Qaron, namun beliau ada membayangkan tentang sifat-sifat kufur, munafik dan hipokrasi ketiga tokoh yang dilaknat Allah berkenaan. Jadi sebenarnya tidak timbul yang Dr. Siddiq Fadzil memburukkan kerajaan atau pun sesiapa dan menghasut pelajar agar membenci kerajaan.

Jelas niat akhbar membuat laporan itu untuk melagakan di ant-

ara Dr. Siddiq dengan Dr. Mahathir. Atau lebih tepat lagi untuk menyusahkan kerja-kerja pensyarah itu di kampusnya. Itu pun kerja media massa hari ini.

Mesej yang hendak disampaikan melalui kertas kerja itu ialah betapa pentingnya sesuatu sejarah itu ditafsir untuk dijadikan iktibar untuk kita melayari kehidupan didunia hari ini. Sejarah adalah satu kebenaran yang telah ditentukan oleh Allah. Lantaran itu ketepatan dan teladan daripadanya adalah sangat baik. Dan sejarah yang cuba ditafsir dan diiktisarkan semula oleh Dr. Siddiq itu ialah mengenai Namrud, Fira'un dan Qaron. Inilah menyebabkan ia menjadi kontroversi.

Sekiranya sejarah Tunku Abdul Rahman, Tun Razak dan Hussein Onn yang dikupas dan ditafsirkan oleh Dr. Siddiq saya percaya ia tidak menjadi kontroversi.

Secara akademik dan resional saya tidak melihat di mana salahnya tentang kertas kerja itu. Malahan ia sesuatu yang baik. Memang bagi Dr. Siddiq Fadzil pula menjadi tanggungjawab beliau untuk mengemukakan sesuatu idea atau isu untuk dibahas dan dibincangkan oleh anak muridnya. Beliau memenuhi tanggungjawab beliau sebagai *murabbi* berbuat begitu. Wajar kalau beliau sebagai seorang *murabbi* menyampaikan ajaran atau didikan yang benar kepada anak-anak muridnya. Kerana tugas seorang *murabbi* adalah memastikan manusia atau muridnya mencapai *marhatiLah*. Sebab itu ilmu yang terpancar dari kalbi seorang *murabbi* ia mempunyai keberkatan.

Memanglah sesuatu sejarah itu menjadi cermin untuk masa depan. Sejarah juga selalunya dijadikan sempadan dan inspirasi untuk hidup. Sejarah yang kotor akan dihindarkan, manakala sejarah yang baik akan dijadikan sumber ataupun teladan untuk diikuti. Orang yang berjaya adalah pengikut sejarah yang peka dan bijaksana.

Saya ingin soal, kalau bukan kepada sejarah, apa lagi sumber untuk dijadikan panduan? Sejarah adalah sumber yang paling baik dan bersih. Seperti kata Dr. Siddiq; "*Sejarah tidak terjadi secara sewenang-wenang, tetapi berlaku menurut aturan tetap ketuhanan, aturan Ilahi yang terjelma dalam hukum sebab-akibat. Itulah dinamakan sunatu 'Lah, undang-undang Tuhan yang tidak berubah.*" Manakala sepotong kata hikmah Almarhum Buya Hamka, "*Sejarah tidaklah mengulangi dirinya. Tetapi perangai manusia di segala zaman, baik dalam nama feudalisme, atau demokrasi, atau diktator adalah sama saja...*"

Berdasarkan kenyataan itu sesuatu sejarah itu berlaku bukan sia-sia melainkan untuk dikaji dan diteladani. Segala apa yang berlaku itu boleh dijadikan iktibar untuk kehidupan hari ini. Demikian juga dengan pengkisahan sejarah dari Qur'an tentang Fira'un, Qarun dan Namrud yang dilakukan oleh Dr. Siddiq itu ia amat penting dan relevan sekali.

Dengan pengkisahan sejarah itu juga ia memudahkan manusia berfikir. Apa lagi sebagai orang Islam, yang menyakini Qur'an, sejarah itu mudah untuk dijadikan sumber panduan.

Misalnya apa yang berlaku kepada Namrud, Fir'aun dan Qarun yang dituliskan oleh Dr. Siddiq Fadzil cukup menarik dan jelas sekali. Ia amat berguna untuk ditafsir dan dikaji apakah sejarah, kebejatan dan sifat-sifat diktator yang diwarisi oleh Namrud, Fir'aun dan Qarun itu wujud di dunia hari ini.

Elok kalau saya petikan ulasan dan tafirsan beliau satu persatu tentang tokoh-tokoh diktator yang telah dilaknat oleh Allah tersebut:

"Al-Qur'an memberi pemerian tentang Namrud sebagai raja yang sezaman dengan Nabi Ibrahim (a.s). Kerana terlalu lama berkuasa ia menjadi lupa diri. Nafsu besarnya

menyebabkan ia tidak puas sekadar menjadi raja. Ia muh men-jadi tuhan, lalu meminta rakyat mengakui dan menyembahnya sebagai tuhan mereka. Rasa serba mampu telah mendorongnya berlagak sebagai tuhan. Tanpa malu-malu Namrud mendakwa mampu melakukan sesuatu (menghidup dan mematikan) yang pada hakikatnya hanya Tuhan yang sebenar mampu melakukannya.

"Dalam dialognya dengan Namrud, Nabi Ibrahim (a.s.) mengatakan bahawa Tuhannya adalah Tuhan yang Maha Berkuasa menghidup dan mematikan. Namrud yang ingin menjadi tuhan merasa perlu memiliki ciri ketuhanan yang sama. Nafsu ingin menandingi Tuhan Ibrahim (a.s.) itulah yang mendorongnya mendakwa, "aku juga mampu menghidupkan dan mematikan" (*ana uhyi wa umit*). Untuk membuktikannya ia menghadirkan dua orang pesalah yang telah dijatuhi hukuman mati; yang seorang dibebaskan, manakala yang seorang lagi diperintahkan menjalani hukuman (mati). Itulah yang ia tahu tentang erti menghidup dan mematikan. Dengan sangkaan ia sudah menang ia berkhayal menjadi "tuhan". Pada hakikatnya yang terserlah dari cara berhujah dan pembuktian sedemikian itu bukan kuasa "ketuhanan"nya, tetapi kuasa "kediktatoran"nya, berbuat semahunnya, bertindak ke atas seseorang sesuka hati untuk kepentingan diri."

Demikian halnya dengan Namrud, manakala tentang Fira'un pula beliau melukis:

"Watak lain yang memperlihatkan pola fikir dan mentaliti yang sama ialah Fira'un. Raja Mesir yang bermaharajalela dengan kuasa dan kekayaan itu merasa tergugat dengan kemunculan Musa (a.s) sebagai pemimpin yang kian popular di kalangan kaumnya. Untuk membendung arus soko-

ngan rakyat dari terus mengalir ke pihak Musa (a.s), Fira'un bertindak dengan mengeksplorasi kebodohan rakyat, mengabui mata mereka dengan mempamerkan kehebatannya sebagai pemilik kerajaan dan bumi Mesir dengan segala sungai-sungainya. Sementara itu Nabi Musa (a.s.) dihina sebagai orang yang tidak punya apa-apa, malah berbicara pun tidak petah. (al-Qur'an Zukhruf: 51-56).

"Rakyat yang berfikiran singkat dan telah rosak jiwa dan mindanya memang mudah terpedaya dengan propaganda gaya Fira'un itu. Apa lagi Fira'un memang selamanya menggunakan kuasa dan kekayaannya untuk melaksanakan dan membayai program-program menyesatkan rakyat. Memperbodoh dan mengelirukan rakyat massa memang menjadi amalan lumrah kalangan penguasa diktator zalim di mana-mana.

Ini mereka lakukan dengan cara menguasai media dan menutup semua saluran maklumat sehingga mereka tidak mengetahui fakta-fakta yang sebenar dan tidak berminat untuk mencarinya, cukup dengan menelan apa sahaja yang disogokkan. Dengan demikian mudahlah mereka dibuli dan diperalat, dikerah dan diarah mengikut telunjuk para penguasa.

"Tidak cukup dengan mengongkong pemikiran rakyat massa, Fira'un berusaha untuk menguasai dan memperalat golongan "cendekiawan" yang terdiri dari kalangan ahli-ahli sihir. Ini dilakukan dengan menawarkan ganjaran yang lumayan kepada mereka yang sedia memberi khidmat memperkuuh kekuasaan Fira'un. Dengan motif merebut ganjaran lumayan itulah mereka menyanggupi tugas melawan mu'jizat Nabi Musa (a.s.). Tetapi setelah kalah dalam perlawanan itu mereka membuka mata, menginsafi

bahawa mereka berhadapan dengan kebenaran dan kuasa Tuhan yang sebenarnya, lalu mengambil keputusan untuk menerima Tuhan yang sebenarnya, lalu mengambil keputusan untuk menerima hakikat tersebut. Mereka beriman dengan Nabi Musa (a.s.) dan bersedia menghadapi risikonya iaitu kemurkaan dan penganiayaan Fira'un.

Seperti yang memang telah diduga, Fira'un menjadi berang apabila mereka mengambil keputusan memihak kepada Musa (a.s.) tanpa terlebih dahulu mendapatkan izinnya. Tetapi siksaan kejamannya tidak juga dapat mengubah pendirian ahli-ahli sihir itu (al-A'raf : 113-126). Rupanya masih ada kelompok yang tidak dapat diperbodoh kerana memang mereka tidak bodoh. Meskipun tadinya mereka berhasrat mencari untung, tetapi apabila berhadapan dengan isu hak dan batil, benar dan salah, mereka tidak sanggup mengkhianati suara nuraninya sendiri. Mereka masih setia kepada etik keilmuan bahawa kebenaran tidak harus ditundukkan kepada kemahuan politik (penguasa)."

Sementara perihal Qarun dilukiskan oleh Dr. Siddiq Fadzil begini;

"Qarun pula adalah penindas dan pemeras kaumnya sendiri. Qarun memang kaya luar biasa. Kunci-kunci khazanahnya sahaja tidak terpikul oleh sejumlah orang perkasa. Beliau mendakwa kekayaannya adalah hasil kemahirannya sendiri, tetapi sebenarnya ia diperolehi secara zalim dengan memeras dan merampas hak bangsanya sendiri. Andainya pemerian al-Qur'an ini dilihat dari perspektif sosio-ekonomi-politik kontemporer, ia merupakan pendedahan tentang sejenis fenomena "penjajahan" ekonomi oleh golongan kapitalis peribumi. Ia bukan penjajahan kuasa luar, tetapi "penjajahan" kuasa dalaman yang tidak kurang bahayanya.

"Sebagai salah seorang anggota kabinet Fira'un, tentu sahaja beliau telah menggunakan posisi politiknya itu untuk mengaut keuntungan peribadi. Selain itu ia juga mempunyai cita-cita politik mengambil alih kedudukan Musa (a.s.) sebagai kaum Bani Isra'il. Kerana itu ia menggunakan kekayaannya untuk membiayai rancangan memusnahkan kepimpinan Musa (a.s.), termasuk mengupah seorang wanita agar membuat pengakuan palsu pernah melakukan hubungan sex dengan Musa (a.s.) Bagaimana pun percubaan itu telah gagal. Dalam keterangannya sewaktu diadakan proses pembuktian wanita tersebut mengaku telah diupah oleh Qarun.

Al-Qur'an memberi pemerian tentang penampilan Qarun yang suka mempamerkan kebesaran dan kekayaannya. Kebiasaan ini dilakukan bukan tanpa motif tertentu. Ia adalah satu strategi menarik perhatian ramai agar ia dikagumi sebagai wira dan idola. Dengan mempamerkan kekayaannya ia juga bermaksud menghantar mesej bahawa ia mampu melakukan segala-gala: mengupah, membeli dan membiayai apa sahaja dan berapa sahaja. Seolah-olah ia mahu memberi amaran kepada siapa sahaja, jangan cuba-cuba mencabar aku!"

Begitulah "tashrif"- kisah benar tiga tokoh besar (laknatulah) yang diciteriakan oleh Allah SWT di dalam al-Qur'an Karim. Betapa mereka sanggup melakukan apa saja untuk kepuasan nafsu serakah mereka. Dari kisah itu dapat disaksikan pula apa yang ada di sekitar kita. Berpandukan kepada cermin besar sejarah, kekufuran, keangkuhan manusia itu dapat kita mengenali siapa Namrud, siapa Fira'un dan siapa Qarun di zaman kita ini.

Untuk melihat ini kita boleh melihat kepada diri kita sendiri. Merenung ke dalam diri kita sedalam-dalamnya. Apakah kita

mengandungi sifat-sifat dan ciri-ciri ketiga tokoh hebat yang dilaknat Allah itu. Jika kita membuat pemerhatian dan mahasabah, pasti kita akan menemui Namrud, Fira'un dan Qarun sama ada yang kecil atau pun besar yang berlegaran di sekeliling kita.

Kebetulan dewasa ini rakyat Malaysia sedang dikejutkan dengan satu detik perubahan. Dikejutkan dengan satu peristiwa yang berpunca dari pemimpin mereka sendiri. Maka sudah tentulah situasi yang wujud hari ini akan dikaitkan secara tidak langsung dengan apa jua sejarah masa silam. Mereka mahu mengukur dan menilai apakah yang berlaku hari ini telah berlaku di zaman silam.

Setelah membaca dan mengkaji serta menaksir kertas kerja Dr. Siddiq itu saya dapat memang ada pemimpin negara ini yang mempunyai persamaan dengan sifat-sifat atau perangai tokoh besar yang dilaknatkan oleh Allah itu. Ada pemimpin negara ini yang berperangai macam Fira'un. Mereka ingin menjadi pemerintah dan raja sampai mati. Mereka tidak pernah merasai cukup dan puas dengan kuasa yang ada. Yang sedihnya untuk mencapai cita-cita mereka sanggup mengambil jalan yang mungkar dan dimungkari Allah.

Selain itu ada juga yang mirip macam Qarun, tidak pernah merasa puas dan cukup dengan apa yang ada. Betapa tidak, mereka mempunyai aset beribu billion, menguasai harta tanah, bank-bank perdagangan dan sebagainya. Dan lebih zalim lagi, sanggup meniru dan mengambil strategi politik Qarun untuk menjayakan misi penjajahan ekonomi mereka.

Mereka ini merupakan penjajah ke atas bangsa sendiri. Mereka ini tidak segan silu mengambil kesempatan di atas kedudukannya untuk menyangak apa sahaja khazanah rakyat. Dari bumi sampailah ke angkasa dia mahu memerintah dan menguasainya. Paling menyediakan lagi mereka meniru tektik Fira'un untuk memusahkan musuhnya dengan membuat pakatan atau konspirasi demi

memastikan strategi mereka suksess.

Justeru setelah mengkaji saya merasa bersetuju pula dengan tanggapan yang dibuat oleh media tadi, bahawa kertas kerja itu menyindir tokoh-tokoh tertentu, kerana apa yang dikiaskan di dalam kertas kerja itu benar-benar berlaku di negara ini. Namun saya tidak bercadang untuk menyebutkan tokoh itu sebagai Dr. Mahathir maupun Daim Zanuddin. Tetapi sebagai rakyat yang cerdik kita dapat menelah siapakah mereka itu. Dengan kayu pengukur, formula, taksiran sejarah yang disediakan oleh yang berilmu Dr. Siddiq Fadzil itu dapatlah kita meneka sesuatu yang sudah berada di tempat terang. Cuma di dalam hal ini saya rasa kurang wajar kalau Dr. Siddiq dipersalahkan. Sebagai seorang *murabbi*, ilmuwan yang mempunyai komitmen kepada agama, nusa, dan bangsa memang tanggungjawabnya menjadi pemandu dengan menyediakan pedoman untuk kita membangunkan agama, bangsa dan negara kita.

Bukankah tugas *murabbi* dan para ulamak itu membimbing, memberi petunjuk serta mengingatkan ummat manusia dengan peringatan yang ditunjuki oleh Rasulullah agar mereka tidak sesat dan terpesong dari landasan sebenarnya?



*Ini Eza Elhanis anak perempuan saya (MSO). Walaupun usianya baru 4 1/2 tahun tetapi dia sudah tahu menuntut keadilan, kebebasan dan perubahan. Dia adalah penyokong Anwar nombor satu. Dia bukan taksub, tetapi kerana ia tahu reformasi yang dicetuskan oleh Anwar adalah demi masa depannya.*



*Persembahan khas rakyat Zimbabwe - tarian tungging punggung kepada Perdana Menteri Malaysia Dr Mahathir Mohamad ketika beliau berkunjung ke negara tersebut. Tarian ini merupakan simbolik rakyat Afrika lebih awal menungging punggung kepada Mahathir daripada rakyat Malaysia.*



**Dari belakang - Dr Mahathir sedang berjalan pulang!**

(Surat Terbuka Kepada Dr.M)

# DARI GUAL NIBONG KE PUTRAJAYA

11

11 Ogos 1999.

Kampung Gual Nibong,  
17000 Rantau Panjang,  
Kelantan.

YAB Datuk Seri Dr. Haji Mahathir Mohamad,  
Perdana Menteri Malaysia,  
Putrajaya,  
Selangor Darul Ehsan.

*Assalamualaikum dan selamat pagi.*

**D**engan izin Allah dapat saya menyurati Datuk Seri bagi menyatakan beberapa perkara yang telah lama berbuku disukma ini. Terlebih dahulu saya memohon ampun dan maaf kerana mencuri masa emas Datuk Seri untuk menatap surat ini. Terima kasih sekiranya Datuk Seri terbaca surat ini atau pun mana-mana orang yang mewakili Datuk Seri.

2. Rasanya tidak perlu saya memperkenalkan nama dan identiti saya kepada Datuk Seri. Apalah yang ada kepada nama. Yang penting ialah mesej surat ini sampai kepada Datuk Seri. Saya adalah

seorang rakyat biasa yang menjadi warga negara ini sejak 39 tahun lalu. Ibubapa saya adalah tulin Melayu. Bapa bernama Omar Othman meninggal pada 24 April 1996 dan ibu Mek Thom Salleh. Saya menulis surat ini kebetulan saya pandai menulis dan tahu pula saluran untuk diunjurkan kepada Datuk Seri. Saya tidak menggunakan saluran biasa kerana saya tidak yakin ia sampai kepada pengetahuan Datuk Seri.

3. Ada beberapa perkara yang hendak saya sampai dan persoalkan di sini. Terus terang saya katakan apa yang saya kemukakan ini adalah untuk kebaikan Datuk Seri, negara dan rakyat negara ini. Sama sekali bukan untuk kepentingan saya. Bagi saya, bakat, fikiran dan rezeki yang Allah berikan sudah cukup untuk hidup anak beranak. Saya bukan jenis manusia tamak, suka mengumpul harta, menyusahkan orang. Tidak! Dan percayalah saya bukan mahukan apa-apa projek daripada Datuk Seri. Saya tidak ada cita-cita untuk menjadi Daim Zainuddin, Halim Saad, Tajuddin Ramli atau lain-lain. Mungkin saya adalah di antara beberapa orang Melayu yang berjiwa kecil.

4. Pertama suka saya menarik perhatian Datuk Seri, saya ingin bertanya secara ikhlas apakah matlamat hidup Datuk Seri sebenarnya? Matlamat didalam hidup adalah penting. Hidup tanpa matlamat seperti kapal tanpa haluan di lautan luas. Manusia tanpa matlamat, tak ubah seperti binatang. Dan sebagai orang Islam, matlamat itu hendaklah tepat seperti mana yang dikehendaki oleh Allah. Jika matlamat kita tepat barulah kita digelar sebagai makhluk yang mulia. Sebaliknya jika matlamat kita tidak tepat seperti mana yang dikehendaki Allah maka tidak layak untuk kita mengakui makhluk mulia, biarpun betapa bijak dan bestarinya kita. Firman Allah; "*Sesungguhnya aku jadikan manusia sebaik-baik kejadian.*"

5. Binatang tidak ada matlamat didalam hidup. Mereka juga

tidak ada tanggungjawab terhadap kejadian mereka itu. Mereka cuma punya tanggungjawab "sosialnya" sahaja. Tidak lebih dari itu. Justeru apa yang binatang tahu ialah makan, berak, tidur dan bersetubuh. Mereka perlakukan itu pun kerana fitrah hidup demikian. Sesuatu yang hidup tidak dapat lari daripada empat elemen berkenaan. Tidak dikatakan hidup jika seseorang itu tidak makan, tidak tidur, tidak berak dan tidak bersetubuh, kecuali orang itu "sinting" atau tidak waras.

6. Tetapi sebagai manusia, hamba Allah kita mempunyai tugas dan peranan yang lebih besar dan luas dari itu. Salah satu yang tidak ada kepada haiwan dan dituntut kepada kita ialah; tugas untuk membuktikan yang kita adalah makhluk yang mulia. Tugas untuk merealisasikan sebagai khalifah Allah diatas muka bumi ini. Yang diberi tanggungjawab, amanah dan rahsia Allah. Itulah tugas yang paling besar. Kenapa manusia dikatakan mulia ialah kerana ia menyimpan rahsia Allah, itulah bezanya di antara manusia dengan haiwan. Umpama pentingnya Daim kepada Datuk Seri ialah kerana beliau menyimpan rahsia Datuk Seri. Mohamad Rahmat dan Sabaruddin Chik tidak besar dan bernilai kerana mereka tidak menyimpan rahsia Datuk Seri. Malahan rahsia yang ditanggung (pikul) dan digenggam oleh kita lebih besar daripada rahsia Datuk Seri yang ditanggung dan disembunyikan oleh Daim.

7. Rahsia - itulah yang Allah berikan kepada kita. Dan tanggungjawab kita ialah hendak mengembalikan semula rahsia itu kepadanya. Tanggungjawab kita ialah hendak memecahkan rahsia itu kepada diri kita. Selepas kita mati nanti, rahsia itu akan dikembalikan kepada-Nya. "*Dari Aku kau datang kepada Aku jugalah kau kembali.*"

8. Jadi sebagai manusia yang bergama Islam - yang mengaku Islam dan marah jika ada orang menuduh kita bukan Islam - saya ingin bertanya apakah Datuk Seri mempunyai matlamat untuk

mengembalikan rahsia itu kepada Allah. Atau menjadi seorang khalifah yang amanah, fatanah dan siddik? Apakah begitu?

9. Saya bertanya ini kerana Datuk Seri semacam tidak pernah berazam dan berusaha untuk mencapai matlamat seperti mana yang digariskan itu. Datuk Seri seolah lupa bahawa sebagai manusia Datuk Seri mempunyai tugas dan tanggungjawab untuk memelihara amanah Allah. Maaf, dalam kaca mata saya matlamat hidup Datuk Seri hari ini tak ubah seperti matlamat haiwan dan binatang saja. Apa yang Datuk Seri fikirkan, makan, tidur, berak dan bersggama. Tidak lebih dari itu.

10. Mungkin Datuk Seri keliru bila saya berkata demikian. Baik saya ulas sedikit tentang perkara ini. Matlamat makan bagi haiwan ialah kekayaan bagi manusia. Matlamat tidur bagi haiwan, ialah kerehatan dan bersiar-siar bagi manusia. Matlamat berak bagi binatang adalah pembaziran dan menunjuk-nunjuk kehebatan diri bagi manusia. Dan matlamat sanggama bagi binatang adalah senggama juga bagi manusia.

11. Dalam pengamatan saya Datuk Seri sudah memperolehi semua keempat matlamat itu. Datuk Seri sudah kaya raya. Harta Datuk Seri sudah lebih daripada cukup. Anak-anak Datuk Seri juga demikian kaya rayanya. Salah seorang anak Datuk Seri mempunyai 200 buah syarikat. Datuk Seri sendiri mempunyai sembilan buah rumah bertaraf banglow dan istana. Anak-anak Datuk Seri masing-masing mempunyai bidang perniagaan bertaraf korporat. Justeru Datuk Seri sudah turut sama dapat merangkul matlamat seterusnya iaitu melancung dan bersiar-siar. Ke mana lagi yang Datuk Seri tidak pergi sejak menjadi PM, semua pelusuk Datuk Seri sudah pergi. Hanya satu tempat saja yang Datuk Seri belum pergi menurut Dato' Fadzil Noor iaitu di Tanjung Rambutan. Itu pun bukan kerana tidak mampu, tetapi belum pergi lagi.

Begitu juga dengan berak dan tidur. Datuk Seri dapat berak dengan tenang dan selamat sejahtera. Saya percaya Datuk Seri tidak mengalami apa-apa sembelit dan masalah perkumuhan seperti sembelit atau buasir. Jika ada apa-apa penyakit yang menghalang, Datuk Seri mampu mengatasinya. Berjumpa dengan pakar dubur, sembelit, buasir dan sebagainya. Cuma kalau pun Datuk Seri menghadapi masalah ialah soal tidur - Datuk Seri mungkin tidak berapanya nyenyak tidur kerana mengenangkan nasib dan pilihanraya akan datang.

12. Lantaran itu Datuk Seri saya rasa satu sahaja lagi matlamat yang tidak tercapai iaitu untuk memenuhi tuntutan sebagai khalifah Allah. Jadi di sini saya ingin bertanya apakah Datuk Seri mempunyai matlamat yang satu lagi itu? Saya timbulkan ini kerana tidak nampak kepada saya Datuk Seri sedang berusaha ke arah itu. Tidak ada tanda-tanda yang Datuk Seri giat berikhtiar mencapai matlamat itu. Dari perangai, perbuatan dan pemahaman ia tidak menggambarkan Datuk Seri berusaha untuk memulangkan amanah dan rahsiaNya kepadaNya. Saya yakin kalau ianya menjadi matlamat hidup Datuk Seri ia telah tercapai, serentak dengan matlamat yang lain.

13. Mungkin Datuk Seri menyoal saya apakah hari ini Datuk Seri sebagai pemimpin tidak melaksanakan perintah Allah? Iya... saya bersetuju Datuk Seri adalah seorang khalifah Allah. Tetapi Datuk Seri kena insaf apa yang Datuk Seri lakukan tidak memenuhi tuntutan Allah SWT. Apakah Datuk Seri sudah lupa apa yang Allah suruh dan perintahkan ke atas kita selaku khalifah? Pertama tegakkan Islam di dalam diri kita. Kemudian tegakkan Islam di dalam rumah kita. Kemudian ke dalam keluarga kita. Kemudian ke dalam masyarakat kampung kita. Kemudian ke dalam negara kita. Mungkin Datuk Seri sudah berjaya menegakkan Islam pada tahap pertama dan kedua. Tetapi bagi mana yang ketiga dan ke empat?

Selain itu pemimpin juga harus adil dan saksama terhadap semua rakyatnya. Adilkah Datuk Seri? Saksamakah Datuk Seri ke atas Anwar Ibrahim? Datuk Seri begitu tegas terhadap Anwar dengan mengarahkan tindakan ke atasnya, tetapi Datuk Seri berfikir panjang untuk mengarahkan tindakan ke atas Rafidah Aziz, Daim Zainuddin, Megat Junid, Eric Chia dan lain-lain! Adilkah Datuk Seri?

14. Maaf cakap Datuk Seri, sekiranya Datuk Seri tidak mempunyai matlamat itu, maka mulai sekarang Datuk Seri berpalinglah ke belakang. Perbetulkan rel perjuangan dan qiblat iktikad Datuk Seri. Jadikan matlamat yang maha penting sebagai agenda utama Datuk Seri. Walaupun Datuk Seri sudah berada di ambang senja, tetapi pintu taubat masih terbuka. Sesungguhnya Datuk Seri masih terlambat.

15. Insaflah Datuk Seri hidup kita tidak akan membawa apa-apa erti sekiranya matlamat yang maha penting itu tidak sampai. Kekayaan, kehebatan dan keagungan yang ada kepada kita tidak bererti langsung. Segala pangkat dunia itu hanya akan disebut setakat hari ini sahaja, selepas mati nanti orang tidak akan menyebutnya lagi. Kebaikan akan dikenang sepanjang hayat, dan mengharumkan nama kita dan keluarga. Manakala kejahatan juga akan dikenang sepanjang hayat, dan ia memburukkan keluarga kita.

16. Apakah sesudah Datuk Seri mati nanti, Datuk Seri mahu keluarga Datuk Seri akan dicemuh, dihina dan disebut oleh sejarah sebagai waris kepada petualang negara? Mahukah begitu. Tentu Datuk Seri tidak mahu. Sesiapa pun kalau boleh mahu mati dengan baik dan meninggalkan kenangan yang baik-baik. Kucing pun mahu mati dengan baik dan akan dikenang sebagai kucing yang berjasa. Apa lagi kita sebagai manusia, makinlah ingin begitu.

17. Datuk Seri kena sedar apa yang Datuk Seri lakukan hari ini sudah banyak yang tidak kena dan menyimpan jauh dari ajaran

agama dan tata budaya orang Melayu. Dasar liberalisme dalam pembangunan pendidikan, agama dan lain-lain yang Datuk Seri lakukan tidak lagi menenuhi citarasa rakyat bangsa Melayu negara ini. Disebabkan Datuk Seri terlalu asyik dengan pemikiran Datuk Seri menyebabkan segala hak-hak Melayu, identiti Melayu sudah terhakis sama sekali.

18. Saya tidak mahu sebut pasal itu di sini, sebab soal-soal bangsa, ras dan *culture* tidak penting di sisi Allah Azawajala. Tetapi saya lebih banyak ingin menyebut soal apa akan berlaku selepas mati kelak. Sebelum itu saya ingin tanya Datuk Seri, percayakah kepada hari akhirat? Kalau Datuk Seri percaya, maka kena perbetulkan segala kesalahan, dosa-dosa, penyelewengan yang Datuk Seri lakukan atau bersubahat dengannya. Tetapi kalau Datuk Seri tidak percaya, titik.

19. Saya letakkan Datuk Seri percaya. Percaya kepada perbicaraan di hari akhirat. Percaya kepada ada pembalasan daripada Allah. Percaya kepada seksa Neraka. Percaya kepada manusia di bangkit kembali. Jika kita percaya dan beriman kepada itu semua, maka kita harus bersedia. Kita kena siap sedia untuk menghadapi semua itu.

20. Dalam pengamatan saya hamba yang kerdil lagi naif, banyak soalan-soalan yang bakal Datuk Seri jawab selepas Nafirin di bunyikan oleh Israil kelak. Soalan-soalan itu tentulah statusnya sama besar dengan status Datuk Seri selaku pemimpin. Saya bimbang soal-soal ini tidak terjawab oleh Datuk Seri. Datuk Seri kena tahu di waktu itu nanti Datuk Seri tidak boleh berdolak dalih lagi. Mulut petah Datuk Seri sudah ditutup rapat, disimen. Tetapi yang menjawabnya ialah anggota-anggota lain. Selaku rakyat saya malu kepada Rasulullah SAW kalau pemimpin saya tidak dapat menjawab soalan itu.

21. Kaki, tangan, telinga, dan anggota-anggota lain akan menjadi saksi kepada Rabul Jalil. Saksi itu tidak akan lupa, tidak

akan ingat, tidak akan dapat *endorse* jawabannya seperti saksi di mahkamah hari ini. Para saksi itu adalah bersumpah dengan sebenarnya. Saksi itu tidak akan diajar dan *distorture* terlebih dahulu. Mereka akan jawab apa yang mereka tahu; pandang, tenguk, rasa dan fikir.

22. Datuk Seri tidak akan mendapat pertolongan saksi-saksi itu lagi. Datuk Seri tidak boleh panggil saksi untuk membela Datuk Seri. Datuk Seri tidak dapat ugut dan sogok hakim kerana hakim ketika itu Yang Maha Adil lagi Maha Mengetahui dan tidak tunduk kepada mana-mana kuasa kerana Dia Maha Berkuasa. Datuk Seri tidak boleh mengarah sesiapa pun untuk mengajar Datuk Seri. Datuk Seri juga tidak lagi boleh memberi ganjaran kepada saksi, kerana semua harta Datuk Seri sudah menjadi debu. Taraf Datuk Seri ketika itu sama kaya dan sama miskin dengan datuknenek-datuknenek saya sahaja.

23. Antara soalan-soalan yang bakal ditanya kelak ialah:

Pada tahun 1982 kenapa Datuk Seri menerima Anwar Ibrahim masuk Umno? Dan pada tahun 1993 kenapa Datuk Seri melantiknya menjadi Timbalan Perdana Menteri? Kenapa pada tahun 1998 Datuk Seri memecatnya dari jawatan TPM dan singkirkan dari Umno malam esoknya. Apakah bukti menyebabkan pada bulan Oktober Datuk Seri memberi tahu orang ramai yang Datuk Seri pecat dan singkir Anwar kerana moral. Tetapi kenapa pada Jun 1999 dalam perhimpunan agung Umno Datuk Seri mengatakan pula, pemecatan Anwar kerana beliau hendak jatuhkan Datuk Seri. Yang mana satu betul?

Datuk Seri juga akan disoal dengan soalan-soalan berikut:

Kenapa pendakwaan ke atas Tan Sri Rahim Tamby Chik yang dituduh memperkosakan murid sekolah ditarik balik? Kenapa Tun Daim Zainuddin tidak disiasat sedangkan beliau didakwa telah menerima wang rasuah dan melarikan wang sejumlah RM 1 billion

ke luar negara? Kenapa Rafidah Aziz tidak disiasat dan dibawa ke muka pengadilan di atas tindakannya mengambil bahagian dalam meluluskan saham untuk menantunya? Kenapa dakwaan ke atas Tan Sri Eric Chia ekoran kerugian Perwaja Steel ratusan ribu billion tidak dijalankan, dan mengapakah siasatan oleh BPR ke atasnya lambat dan tersengguk-sengguk?

Datuk Seri juga akan diajukan solan-soalan berikut:

Untuk apa mahligai Perdana Menteri di Putrajaya yang berharga RM200 juta? Untuk apa diambil wang Petronas sebanyak RM 1.7 billion? Dan kenapakah sampai beli jet eksekutif (Global Express) berharga lebih RM 200 juta? Dalam konteks apa dan untuk siapa litar kereta Formula One di Sepang itu dibuat?

Soalan-soalan ini juga akan diajukan kepada Datuk Seri?

Kenapa Datuk Seri menghina Harun Din, menuduh dia pembohong dan penipu? Kenapa Datuk Seri hina Nik Aziz tuduh dia putar belit isu dan mengkafirkan orang Umno? Kenapa Datuk Seri menghina dan mempersendakan Rasulullah? Kenapa Datuk Seri hina mahasiswa Melayu dan para akademis Melayu?

Selain itu soalan-soalan ini juga akan turut dikemukakan:

Kenapa Datuk Seri tidak memerintah isteri Datuk Seri menutupi aurat? Kenapa Datuk Seri membiarkan anak-anak Datuk Seri terjebak dalam maksiat dan berciuman di khalayak ramai?

Selain itu banyak lagi soalan tambahan. Dan pada fikiran saya yang bodoh ini, Datuk Seri juga akan ditanya kenapa melantik Ibrahim Ali dan orang-orang sejenis dengannya menjadi pemimpin?

24. Datuk Seri semua soalan itu akan diajukan kepada Datuk Seri dan Datuk Seri kena menjawabnya sendiri. Tidak ada satu pun yang Datuk Seri dapat sembunyikan atau cuba melelapkan soalan itu atau membuat apa-apa kenyataan untuk mengubahkan

pendirian pendakwa. Segala kenyataan tidak dapat direkodkan dari kertas pertuduhan. Tidak ada sesiapa yang boleh membantu Datuk Seri. Ketika itu Datuk Aziz Shamsuddin sudah hilang entah ke mana. Tun Daim juga ghaib ke mana. Begitu juga dengan para pegawai peribadi, Setiausaha Politik, Setiausaha Sulit dan lain-lain. Yang tinggal hanya Datuk Seri seorang diri saja. Datin Seri Siti Hasmah juga tidak akan berada di sisi Datuk Seri lagi.

25. Justeru bertaubatlah Datuk Seri. Saya dan rakyat semua sayangkan kepada Datuk Seri. Kami tidak mahu Datuk Seri jatuh hina dihari kemudian kelak. Kami malu apabila suatu hari nanti orang akan hina Datuk Seri sehina-hinanya. Di mana kami hendak letakkan muka kami apabila berhadapan dengan keadaan demikian. Kami hendak tak mengaku Datuk Seri sebagai pemimpin kami? Tidak mungkin. Dunia semua tahu bahawa Datuk Seri adalah pemimpin Malaysia.

26. Sebagai menutup surat ini, saya sekali lagi merayu kepada Datuk Seri agar sedar, insaf dan bersiaplah untuk menghadapi realiti sebagai seorang tua. Janganlah terlalu mengikut nafsu. Nafsu seperti juga roh ia tidak akan pernah merasa tua, merasa sakit, dan apa yang dia mahu ialah muda sepanjang masa. Saya rasa Datuk Seri menjadi muda bukan kerana mengamalkan petua berhenti ketika sedap makan seperti mana yang Datuk Seri pernah ceritakan, tetapi kerana Datuk Seri terlalu sangat mengikut runtuhan syaitan.

Akhir sekali, saya pohon kemaafan kepada Datuk Seri sekiranya terkilan dengan surat ini. Saya tetap mengiringkan doa agar Datuk Seri sejahtera didunia dan akhirat dan akan menjadi salah seorang ahli syurga. *Insya-Allah.*

Salam hormat,

**MOHD SAYUTI OMAR (MSO)**



**"Tengku Panglima Bukit Marak"** - Annuar Musa sedang memasyurkan perlantikan Tengku Ibrahim Ibni Tengku Indra Petra sebagai Sultan Kelantan yang baru di Ketereh tidak lama dulu. Gara-gara peristiwa itulah menyebabkan Annuar Musa sampai kini tidak dibenarkan menjajak kaki ke istana Kelantan.



*Allahyarham Pak Chu Haji Hassan (Tok Wali) pernah menentang Tengku Razaligh dalam pilihanraya tahun 1978. Ada orang berpendapat kerana tentangan Pak Chu itulah menyebabkan Tengku Razaligh kehilangan keramat.*

## Lampiran 1

### **LAPORAN POLIS ANWAR IBRAHIM TERHADAP MAHATHIR, MOHTAR DAN GHANI PATAIL**

*Laporan Polis: Dang Wangi Report No. 20255/99*

**S**AYA merujuk kepada dokumen Bahagian Pendakwaan, Jabatan Negara bertarikh 14 Mac 1995 yang ditandatangani oleh Abdul Gani Patail. Dokumen tersebut telah diserahkan kepada saya oleh Peguam Negara, Tan Sri Mohtar Abdullah disekitar akhir 1995. Dokumen tersebut menjelaskan bahawa terdapat asas prima facie mengenakan pertuduhan lima kes rasuah terhadap Dato Paduka Rafidah Aziz, Menteri Perdagangan dan Perindustrian menurut Seksyen 2(2) Ordinan 22, Peraturan Perlu, 1970.

Peguam Negara berpuas hati dengan siasatan yang dijalankan oleh BPR dan beliau bersedia dengan pertuduhan terhadap Dato Paduka Rafidah Aziz. Pertuduhan tersebut sepertimana yang tertera dalam dokumen dapat dirumuskan seperti berikut.

**Pertama:** Selaku Pengerusi Jawatankuasa Pembahagian Saham Bumiputra MITI; beliau telah meluluskan 1.5 juta saham dalam Leader Universal Holdings Bhd kepada menantunya, Fazrin Azwar bin Mohd.Nor;

**Kedua:** Beliau meluluskan permohonan Fazrin Azwar bagi

menjual 450,000 unit saham tersebut;

**Ketiga:** Beliau meluluskan permohonan Fazrin Azwar bagi menjual 315,000 unit saham tersebut;

**Keempat:** Beliau meluluskan permohonan Fazrin Azwar bagi menjual bagi menjual 335,000 unit saham tersebut;

**Kelima:** Beliau meluluskan pembahagian 4,173,910 unit saham FACB kepada Fazrin Azwar.

Pertuduhan tersebut telah tidak diteruskan akibat campurtangan Perdana Menteri Dato Seri Dr. Mahathir Muhammad; menyebabkan pendakwaan terhadap Dato Paduka Rafidah Aziz belum dapat disempurnakan. Namun, kegagalan berbuat demikian, seperti mana diperuntukkan oleh undang-undang bermakna Dato Seri Dr. Mahathir, Tan Sri Mohtar Abdullah dan Abdul Gani Patail telah mencemar matlamat keadilan dan melanggar peruntukkan undang-undang.

Dengan ini saya kepulkan dokumen tersebut yang bertarikh 14 Mac 1995 sebagai bukti/keterangan dan eksibit satu laporan polis dan kenyataan penjelasansaya bertarikh 9 Julai 1999 sebagai sebahagian dari laporan polis disini.

**Anwar Ibrahim**

**9/7/99**

## KENYATAAN PENJELASAN LAPORAN POLIS ANWAR IBRAHIM

SAYA baru selesai membuat laporan polis terhadap Perdana Menteri: Datuk Seri Dr. Mahathir ; Peguam Negara Tan Sri Mohtar Abdullah dan Abdul Gani Patail kerana mencemar matlamat keadilan dan melanggar peruntukan undang-undang. Laporan tersebut telah tertangguh dengan harapan bahawa siasatan dapat dijalankan setelah saya kemukakan; bukti dan keterangan dimahkamah dalam kes terdahulu mengenai pendakwaan terpilih.

Malangnya, Jabatan Peguam Negara telah terjerat dan dijadikan perkakas oleh Ketua Politik mereka. Imej dan kewibawaan mereka terjejas dan keyakinan rakyat terhadap pendakwa dan sistem kehakiman tercemar. Nyata sekali Tan Sri Mohtar terjebak dengan konspirasi sehingga tidak mempunyai pilihan selain menjaga kepentingan peribadi. Beliau telah menyalahgunakan kuasa dengan meneruskan pendakwaan fitnah dan berniat jahat terhadap saya dan lain-lain pemimpin parti pembangkang serta pengkritik kerajaan. Sementara itu, beliau masih belum menjelaskan tuduhan bahawa beliau telah menghabiskan percutian peribadinya di Italy bersama towkay kaya.

Bagi mengukuhkan tuduhan, saya telah sertakan dokumen

Jabatan Peguam Negara bertarikh 14 Mac 1995 yang telah diserahkan kepada saya oleh Peguam Negara. Beliau telah memohon bantuan saya untuk merayu kepada Perdana Menteri menarik balik keputusannya mengarah Peguam Negara dari mendakwa Dato Paduka Rafidah Aziz atas tuduhan rasuah. Saya telah memaklumkan Perdana Menteri mengenai isu tersebut tetapi telah disanggah oleh beliau. Dengan ini perilaku rasuah seorang Menteri Kanan telah dilindungi. Ianya menggambarkan secara jelas betapa pemimpin parti dan kerajaan diperangkap oleh beliau dan dengan cara sedemikian menjamin ketaatan mutlak dan sokongan melulu.

Kecaman rakyat terhadap rasuah, kronisme dan nepotisme mempunyai asas kukuh. Bahkan tahap 'kebersihan' pemimpin-pemimpin amat dicurigai. Kita dapat jangka dari helah dan telatah pemimpin-pemimpin kerajaan dan media yang mereka kuasai mengalih dari isu tersebut dengan isu ancaman asing, satu isu yang amat popular dikalangan diktator. Dan muslihat mengecam dan menghina tokoh-tokoh pembangkang diteruskan dengan mereka-cripta atau rekayasa keterangan dan dengan mengerahkan seluruh jentera kerajaan sebagai alat

Peguam Negara tidak dapat menjawab tuduhan dan kecaman tersebut kerana cuai dan berat sebelah. Apa yang mampu dilakukan ialah mengugut dan berdolak-dalih. Agak aneh bagi beliau untuk bersekongkol dengan Tun Daim Zainuddin yang sememangnya diketahui telah menimba kekayaan melimpah tatkala dalam kerajaan untuk mengenakan pertuduhan fitnah dan palsu terhadap saya mengenai rasuah, salah laku seks dan pengkhianatan terhadap negara.

Ingin saya ulangi kenyataan saya bahawa Akta Rahasia Rasmi dan Sumpah Memegang Jawatan bermaksud untuk memelihara keamanan dan keselamatan serta kesejahteraan rakyat. Ianya tidak harus digunakan untuk merestui atau melindungi kegiatan rasuah,

penyalahgunaan kuasa, penindasan atau salahlaku jenayah lainnya.

Pihak polis dikehendaki oleh undang-undang untuk menjalankan siasatan secara bebas dan professional termasuk tuduhan mengenai keganasan polis. Pihak Cawangan Khas perlu menghentikan operasi menggugut dan mengganggu pembangkang dan pengkritik kerajaan. Dan pendedahan taktik dan kaedah menjalankan siasatan oleh Jabatan Pencegahan Jenayah menakutkan sekali. Ketua Polis Negara, Tan Sri Norian Mai, perlu mengambil langkah-langkah segera bagi memulihkan imej polis yang terjejas. Keyakinan rakyat terhadap pasukan polis perlu diutamakan dan bukannya untuk bertolak-ansur terhadap sebilangan kecil pengampu dan oportunistis yang akan tambah merosakkan nama baik pasukan polis.

Merujuk kepada laporan ini, pihak polis harus diperingatkan mengenai laporan-laporan terhadap polis dan pemimpin kerajaan yang diketepikan. Pemimpin parti pembangkang; telah membuat laporan terhadap Perdana Menteri dan anak-anaknya kerana harta menimbun secara menjolok sekali. Dua bulan yang lalu, satu laporan dikemukakan oleh Mohd Ezam Nor mengenai rasuah dan perilaku Peguam Negara.

**Anwar Ibrahim**

**9 Julai 1999**

### Lampiran 3

## LAPORAN POLIS ANWAR IBRAHIM TERHADAP PENYELEWENGAN PERWAJA

*Balai Polis Jalan Tun H.s. Lee  
Report 19625/99, 21/07/99*

**S**aya merujuk kepada Laporan Awal Juruaudit Price Water house mengenai status Kumpulan Perwaja yang dikemukakan sekitar Jun 1996. Firma juruaudit telah dilantik oleh Kementerian Kewangan pada awal tahun 1996 sejurus selepas mendapati Perwaja berada dalam keadaan nazak dan memerlukan suntikan modal besar dari kerajaan. Ini terpaksa dilakukan kerana percubaan bagi mendapatkan maklumat terperinci dari pihak pengurusan Perwaja ketika itu, khususnya Pengarah Urusan Tan Sri Eric Chia tidak berhasil. Beliau berulang kali menyatakan bahawa tindakkannya adalah dengan restu dan arahan Dato Seri Dr Mahathir Mohammad Perdana Menteri. Dan, ini dibuktikan berdasarkan surat kelulusan projek dan kontrak yang ditandatangani oleh Dato' Seri Dr. Mahathir sendiri. Dengan mandat sedemikian. Lembaga Pengarah telah diketepikan, urusan tender tidak dijalankan dan terdapat bayaran yang meragukan.

Berikut dirumuskan beberapa fakta dan penemuan utama juruaudit berkenaan:

**Pertama:** Kedudukan Kumpulan Perwaja tidak solven Berdasarkan akaun pengurusan pada 31 Disember 1995, Perwaja

menanggung beban:

- tanggungan semasa bersih - RM926 juta;
- tanggungan jangka panjang - RM6,013 juta;
- defisit dana pemegang saham - RM1,884 juta.

Perwaja juga telah kehabisan kemudahan modal kerja.

Tangungan semasa dan jangka panjang pada 31.12.1995 berjumlah RM6,939 juta.

**Kedua:** Pendedahan kewangan Kementerian Kewangan dalam Perwaja pada 31 Mac 1996 ialah RM5,517 juta; iaitu:

- Sumbangan tunai - RM2,388 juta;

- Jaminan pinjaman untuk Perwaja Terengganu dan Perwaja Rolling Mill (Gurun) - RM3,129 juta: Maka dalam keadaan tersebut, keperluan suntikan tunai bagi 1996 - 2000 ialah: RM5,304 juta.

**Ketiga:** Jumlah kerugian pada 31.12.1995 ialah RM2,985 juta.

**Keempat:** Faktor yang menyumbang kepada masalah tersebut:

- Kos pengeluaran yang melebihi harga pasaran
- Beban hutang yang tinggi
- Kerugian akibat tukaran nilai wang asing.

4. Tidak terdapat bukti adanya belanjawan kewangan bagi mengawasi prestasi dan pengurusan modal kerja.

5. Tidak terdapat bukti mengawasi kos pengeluaran

6. Tidak terdapat tender kontrak dan perolehan.

**Kelima:** Ahli Lembaga Pengarah tidak berperanan menilai dan meluluskan perbelanjaan dan urusan tender melainkan bagi tujuan

mengesahkan beberapa keputusan kemudiannya. Beberapa kontrak tidak dikemukakan kepada Lembaga Pengarah untuk kelulusan: atau pengesahan. Cadangan belanjawan dan rancangan perniagaan tidak juga dibentangkan

Pengurusan Kemaman dan Gurun bertanggungjawab mengenai operasi dan teknikal. Ibupejabat menumpukan urusan korporat dan kewangan. Tidak terdapat bukti penyediaan belanjawan atau pengawasan prestasi termasuk yang melibatkan kos dan pengeluaran. Dalam beberapa kontrak besar dan perjanjian utama, termasuk perolehan bijih besi Pengarah Urusan menyerah kepada konsultan pihak ketiga dan tidak pihak pengurusan.

**Keenam:** Beberapa praktik perniagaan yang perlu diberikan perhatian:

1. Kelulusan projek kepada Man Shoon Enterprise Sdn.Bhd. dan syarikat-syarikat yang mempunyai kaitan dengan Dato Kok Mew Shoon dan Encik Ng Kim Lim berjurnlah RM957juta. Dari 66 kontrak utama yang diberikan kepada syarikat tempatan diantara 1 April 1990 hingga 31 Disember 1995 sebanyak 62 kontrak berjumlah RM450 juta diberikan kepada KumpulanSyarikat Man Shoon. Kontrak diluluskan tanpa merujuk kepada Jawatankuasa Tender atau Lembaga Pengarah
2. Dokumen lain bagi mengesahkan perbelanjaan RM103 juta tidak diperolehi.
3. 45 dari 65 projek besar dikemukakan kemudian untuk pengesahan oleh Lembaga Pengarah dalam dua mesyuarat pada bulan Disember 1992.
4. 6 Kontrak diluluskan tanpa mendapat pengesahan Lembaga Pengarah

5. Jawatankuasa Tender hanya ditubuh pada 4 Julai 1993 atas cadangan wakil Kementerian Kewangan. Tetapi Jawatankuasa Tender hanya bermesyuarat sekali untuk meluluskan satu kontrak.

**Ketujuh:** Terdapat dua pucuk surat Dato Seri Dr.Mahathir Mohammad kepada Tan Sri Eric Chia.

(i) Pada 23 Mac 1990 menyetujui rancangan pembinaan kilang (DR) dan prasarana berjumlah RM575 juta .

(ii) Pada 16 Mac 1991 meluluskan kilang (Rolling Mill) berdasarkan cadangan syarikat Danielli. Jumlah kos tidak disebut dalam surat berkenaan

**Kedelapan:**

I. Kos perolehan dianggap tinggi. Umpamanya, bayaran kepada Syarikat Tomen dan komisyen kepada Nigel Clarkson Ltd. Di antara USD4.40 dan USD9.65 satu tan metrik (mt) bijih besi. Tetapi, setelah dirundingkan semula oleh firma juruaudit, maka harga bayaran kepada Tomen diturunkan dan USD3 satu mt kepada USD1.50 satu mt berkuatkuasa pada 1.1.1996.

2. Perwaja terpaksa membayar kos tambahan USD4.6 juta bagi tahun 1993 hingga 1995. Ini disebabkan perjanjian dengan Prima Mutiara mengenai penggunaan Pelabuhan Kemaman bagi kapal-kapal besar meskipun pelabuhan tersebut tidak mempunyai keupayaan. Peruntukan perjanjian tersebut hanya dipinda berkuatkuasa pada 1.1.1996

3. Perolehan barang-barang keperluan dari Jepun atas nama Perwaja Japan sebanyak RM169 juta. Tidak pula terdapat sebarang perjanjian melantik syarikat tersebut dan Syarikat Zhimex Commodity Trading sebagai agen. Bahkan Perwaja Japan bukannya sebahagian dari kumpulan Perwaja. Pemegang saham majoriti Zhimex ialah James Loo; yang mendapat USD850,000

**Kesembilan:** Beberapa bayaran utama yang meragukan:

1. Bayaran RM76.4 juta kepada NKK Corp., berdasarkan perjanjian bantuan teknikal yang ditandatangani oleh N.Otani dan dibayar melalui Syarikat Frilshom Enterprise Hong Kong. Tetapi, pada bulan Oktober 1995, N. Otani menafikan keterlibatannya atau pernah menandatangani perjanjian tersebut
2. Berdasarkan siasatan di Hong Kong, Syarikat Frilshom tidak terdapat dalam senarai pendaftar syarikat Hong Kong; dan akaun syarikat ditutup pada 28 Julai 1994
3. Perolehan dari Itochu Corp. sebanyak USD234juta pada bulan Mei 1995. Tetapi, dalam bulan Dis.1995, Itochu menafikan wujudnya perjanjian tersebut.
4. Terdapat perjanjian dengan Itochu-Nissho-Tomen bagi mendapatkan pinjaman USD196juta bagi maksud pembelian peralatan, penyelengaraan dan perkhidmatan kilang. Namun, sebahagian dari pinjaman tidak digunakan bagi maksud tersebut.
5. RM93 juta digunakan untuk skim perumahan di Kemaman dan Gurun. Kos purata setiap rumah teres satu tingkat ialah RM121,000 di Kemaman dan RM113,000 di Gurun yang dianggap terlalu tinggi
6. Bayaran khidmat guaman kepada syarikat VK Lingam and Co. ialah sebanyak RM12.3 juta; dan Syarikat Lewis and Co. ialah RM5.7 juta. Terdapat satu bayaran kepada Durai Rajasingam Rajaduray, rakan Lewis and Co. sebanyak RM5.4 juta &nbsp; Encik Durai juga ialah Setiausaha Syarikat bagi kumpulan Perwaja pada ketika itu.

Laporan Juruaudit akan membantu siasatan; selain dari yang dilakukan oleh Badan Pencegah Rasuah sejak beberapa tahun yang lalu. Berdasarkan maklumat yang diperolehi, tidak boleh dipertikai

akan wujudnya penyelewengan, penyalahgunaankuasa, pengengkaran peraturan kewangan dan rasuah dalam Kumpulan Perwaja. Disamping Tan Sri Eric Chia, Dato Seri Dr. Mahathir Mohammed terlibat secara langsung menyetujui projek dan meluluskan kontrak tanpa tender dan tanpa mematuhi kaedah dan peraturan kewangan. Penglibatan beliau secara peribadi tidak boleh dijadikan alasan.

Untuk melindungi rasuah dan penyelewengan; serta menafikan hak rakyat mendapatkan maklumat sebenar. Kerugian akibat perlaksanaan projek mega ini besar sekali; dan rakyat berhak menentukan kebenaran berdasarkan penyiasatsn rapi dan berwibawa.

Disertakan Laporan Audit Price Waterhouse, Mei 1996. Sebahagian dari maklumat telah saya umumkan di Parlimen pada akhir tahun 1996.

(t.t.)

**(ANWAR IBRAHIM)**

**24 JULAI 1999**

<http://members.tripod.com/mahafiraun>

## Lampiran 4

### LAPORAN POLIS ANWAR IBRAHIM TERHADAP DAIM ZAINUDDIN

*Laporan Polis Tun Hs Lee 20455/99*

**P**ada 14 April 1999 , tatkala memberikan kenyataan di mahkamah , saya telah merujuk kepada beberapa perlakuan rasuah besar oleh pemimpin-pemimpin negara.Saya juga telah merujuk kepada surat-surat dari tiga tokoh korporat ditujukan kepada Tun Daim Zainuddin , ketika itu Menteri Kewangan, yang membuktikan dengan jelas bahawa beliau menerima wang tunai dan saham berjumlah ratusan juta ringgit.Perdana Menteri Dato Seri Dr. Mahathir Mohammad bukan sekadar menghalang tindakan, bahkan terus melindungi rasuah besar yang dilakukan oleh Tun Daim sejak beliau menjadi Menteri Kewangan buat pertama kalinya dahulu.Malahan, sehingga kini, saya di fahamkan tidak ada siasatan oleh pihak polis atau Badan Pencegah Rasuah dilakukan.

Dengan ini, saya sertakan dokumen sah bagi membuktikan rasuah, iaitu tiga pucuk surat yang masing-masing di tulis oleh Tan Sri Halim Saad, Tan Sri Tajuddin Ramli dan Tan Sri Wan Azmi Hamzah.

Tan Sri Halim, dalam surat bertarikh 30 April 1990, menyatakan beliau memegang sebagai pemegang amanah sebanyak 52,208,500

saham Faber Merlin Bhd (saham 1.00) dan 130,000,000 saham Renong Berhad (50 sen) bagi pihak Tun Daim. Beliau mengesahkan bahawa nilai saham itu di pegang menurut arahan Tun Daim atau penama beliau.

Tan Sri Tajuddin pula, dalam surat kepada Tun Daim bertarikh 24 Mei 1990 mengesahkan bahawa beliau memegang secara amanah bagi pihak Tun Daim wang sejumlah RM 70 juta.

Tan Sri Wan Azmi pula, dalam surat kepada Tun Daim bertarikh 30 April 1990 mengaku memegang bagi pihak Tun Daim wang sejumlah RM 150 juta.

Ini tentunya sebahagian kecil dari perolehan Tun Daim yang juga bertindak bagi pihak Dato Seri Dr. Mahathir. Saya menerima maklumat bahawa sebahagian besar wang tersebut adalah hasil pengagihan saham Resorts World, syarikat perjudian yang disenaraikan atas kelulusan Tun Daim sejurus sebelum meninggalkan Kementerian Kewangan pada tahun 1991 dahulu. Dengan kaedah sedemikian beliau telah menggunakan kedudukannya dalam kerajaan bagi mengambil manfaat bagi dirinya. Bagaimana pula dengan puluhan syarikat lainnya? Saya yakin bahawa dengan cara sedemikian, Tun Daim dengan restu Dato Seri Dr. Mahathir telah berjaya mengumpulkan berbilllion ringgit.

Saya juga telah mendapat maklumat bahawa syarikat Hati Budi yang dahulunya dikatakan dikuasai oleh UMNO telah diluputkan kepentingan oleh dua orang penama, iaitu Tan Sri Halim Saad dan Dato' Anuar Othman. Adalah difahamkan 400 juta saham yang dipegang oleh Dato' Anuar Othman yang disebut sebagai amanah untuk UMNO telah diarah oleh Tun Daim supaya dipindah kepada syarikat United Engineers dan Tan Sri Halim. Apabila saya laporan masalah tersebut kepada Dato Seri Dr. Mahathir dalam tahun 1996, beliau menyatakan bahawa Tun Daim yang akan mengurus-

kannya, dan mengarahkan saya supaya jangan mencampuri hal tersebut.

Hanya setelah saya mendedahkan maklumat tersebut, maka Tun Daim segera berdalih menyatakan dalam Perhimpunan Agong UMNO 1999 baru-baru ini bahawa wang dan saham dari tiga ahli korporat itu adalah untuk UMNO. Nyatalah, bila nampak tersebut, barulah di sebut harta yang dikumpulkan itu hak Parti UMNO. Setahu saya, berdasarkan bukti surat, dan dari akaun dan maklumat Majlis Tertinggi atau Perhimpunan Agong UMNO, tidak pernah timbul sama sekali kepentingan Parti.

Keduanya, selaku Menteri Kewangan menerima sumbangan peribadi beratus-ratus juta ringgit adalah rasuah besar dan pecah amanah jenayah. Sekiranya beliau sekarang mendakwa bahawa wang tersebut adalah hak Parti, beliau tetap bersalah kerana tidak pernah memberi laporan kepada Parti tentang wang tersebut. Hanya apabila saya mendedahkan mengenainya, baru beliau menyebutnya dalam Perhimpunan Agong yang lalu.

Pertanyaan dan teguran tentang masalah tersebut semasa saya berada dalam Parti dan Kerajaan, telah menimbulkan kemarahan Perdana Menteri dan ketakutan dikalangan kuncu-kuncunya terutama Tun Daim. Hanya orang-orang rasuah, punyai kepentingan bersama yang akan terus melindungi perlakuan rasuah berjumlah berbillion ringgit. Dari maklumat yang diberikan ini sahaja terbukti rasuah berbillion ringgit dan pecah amanah jenayah.

Saya juga sedar tanggungjawab besar Polis dan BPR untuk menyiasat dan bertindak. Rasuah telah menjadi barah dan berpunca di kepala dan merebak ke bawah. Ia memerlukan ketegasan dan keberanian untuk bertindak sebelum negara dimusnahkan oleh mereka.

Disertakan bersama ini Eksibit A (surat Tan Sri Halim Saad); Eksibit B (surat Tan Sri Tajuddin Ramli); Eksibit C (surat Tan Sri Azmi Wan Hamzah).

t.t

**(Anwar Ibrahim)**

12.28 t/hari

30 Julai 1999

## **Lampiran 5**

### **NOSTALGIA PAHIT DI ERA MAHATHIR**

**S**ELAMA 17 tahun Dr. Mahathir Mohamad menjadi Perdana Menteri beliau telah banyak melakukan perubahan dan pembaharuan ke atas negara Malaysia. Di samping itu juga berbagai dasar dan polisi baru kerajaan diperkenalkan. Tidak dinafikan ada sesetengah perubahan dan pembaharuan itu membanggakan seluruh rakyat Malaysia. Tetapi ada juga disamping itu ia mengecewakan orang ramai.

Di bawah ini disenaraikan beberapa perubahan dan pembaharuan yang telah berlaku di zaman Dr. Mahathir untuk dijadikan kenangan kita bersama. Segala butiran dan angaka-angka di bawah ini dipetik dari Harakah Bil: 1107, 21 Ogos 1999, di muka surat 25. Butiran dan fakta ini juga di sebut dari Home Page PAS.

#### **PROJEK MEMBAZIR.**

- MCS (RM 2 billion)
- Istana Perdana Menteri (RM 200 juta)
- Jet Peribadi PM (RM 200 juta)
- Penggung Negara (RM 205 juta)
- Sukom (RM 330 juta)
- Replika Keris Gergasi (RM 9 juta)
- Bakun (RM 13.4 billion)

- Program Jaya MSN (RM 160 juta)
- Velodrom Cheras (RM 9 juta)
- KLIA (RM 9 juta)
- KLCC (RM 4.56 billion)
- Litar Sepang (RM 285 juta)

#### **AKIBAT SPEKULATOR.**

- Usaha membangun negara selama 40 tahun musnah dalam masa dua minggu - Dr. Mahathir.
- Hutang negara meningkat 10%.
- BSKL rugi RM 450 billion.
- Kekayaan negara merosot 10%.
- Pendapatan perkapita rakyat turun dari RM 4,600 kepada RM 4,200.
- Rizab luar merosot dari RM 70 billion kepada RM 56.6 billion pada Januari 1998.
- Kekayaan negara merosot sehingga 60% pada 1998.
- Hutang negara meningkat dengan mohon bantuan Bank Dunia RM700 juta lagi sebagai tambahan RM117 yang telah diluluskan - Mustafa Mohamad.
- Disember 1977 hutang negara RM 166.2 billion.

#### **INFLASI DAN MUSFLIS.**

- Kenaikan tol.
- Pembinaan tol baru lebih 90 tol seluruh negara.
- Kenaikan harga gula, minyak masak, yuran pengajian universiti.
- Pekerja dipecat.
- Gaji dipotong.
- Hingga 21.4.1998 seramai 435 (termasuk 191 Bumiputera) syarikat muflis oleh Mahkamah Tinggi - Dato' Tan Chai Ho di Parlimen - Julai 1997 - 31 Mac 1998.

- 25,000 syarikat IKS nazak - Zahid Hamidi.
- 30% kontraktor Melayu gulung tikar - Persatuan Kontraktor Melayu Malaysia.
- 34,501 pekerja diberhentikan antara Julai 1997 - April 1998.

### **KERUGIAN.**

- Perwajaya (kilang besi) rugi terkumpul 1989 RM 1.6 billion, hutang sehingga Mac 1998 RM 5.08 billion, 1997 rugi RM 7 billion.
- Maminco (Lombong timah) rugi RM 620 juta melalui transaksi jualan bijih di London Metal Exchange.
- JBA rugi akibat kecurian dan kebocoran RM 530 juta (1991), RM 551 juta (1996), RM 561 juta (1997).
- MAS rugi RM 256.7 juta (MAC 1998).
- TNB rugi RM1,938 (enam bulan sehingga Februari 1998).
- Renong rugi RM327.72 juga (6 bulan 1997), RM275.013 (Mac 1998).
- Park May rugi RM10.235 juta (9 bulan 1998).
- Sime Darby rugi RM1.111 billion (6 bulan 1997).
- Sime Bank rugi RM1.8 billion.
- KUB rugi RM106.290 juta.
- Mara Holding rugi 10 anak syarikat RM8.5 juta (1997).
- Bank Negara rugi RM9.3 billion (1992) RM5.7 billion (1993) & atas kertas.
- BBMB melalui skandal BMF rugi RM2.5 billion (1995), RM1,393 billion (Mac 1997).

### **LAPORAN KETUA AUDIT NEGARA.**

- Dua mikroskop bernilai RM99,400 tidak digunakan kerana tiada pakar.
- Mesin ujian stress RM60,700 di Hospital Kajang tidak disen-tuh.

- 4,680 keping deraf bank berharga RM 32 juta tidak ditunaikan oleh Jabatan Imigresen.
- RM 17 juta hangus kerana luput dan tidak ditunaikan.
- Kehilangan cek RM 228,238 di Kem Kerja Raya.

#### **PENSWASTAAN YANG MERUGIKAN RAKYAT**

- IKW caj pembentungan terlalu tinggi
- PLUS tol terus naik
- IPTA yuran pengajian meningkat
- TNB (1996) - 20 sen 100 unit pertama, 23 seunit tambahan (Mac 1996) 20 sen 100 unit pertama 24 sen seunit tambahan (Mei 1997) kenaikan 1.8 sen seunit, 21.8 sen 100 unit pertama, 25.8 sen seunit tambahan.

#### **TANAH RIZAB MELAYU**

- Dulu juta juta hektar, tapi tahun 1998 tinggal 1.7 juta hektar.
- Di Selangor 8,299.9 hektar bertukar status untuk memberi laluan kepada pembangunan.
- Hanya 2,833 hektar atau 34% saja yang diganti.
- 1990, 80 penduduk Pantai Gelang Langkawi diambil tanah untuk Pelangi Beach Resort.
- 1994, Kerajaan NS mengambil 930 hektar tanah 666 orang di Mambau untuk pembangunan.
- 1993, Kedah ambil 167 lot seluar 1000 ekar di Kerpan untuk ternakan udnag.
- Di Georgetown, Penang Tanah rezab Melayu hanya 0.07 peratus pada 1996 terdiri dari tanah wakaf, masjid dan sekolah.
- Di Bayan Lepas 500 keluarga Melayu hilang kerana menjadi tapak industri.
- Di KL, Ipoh, Melaka, Kuantan, Johor Bharu tidak sampai 10% tanah rezab Melayu.

### **KENAIKAN YURAN PENGAJIAN UNIVERSITI.**

- Francais Matrikulasi UPM kepada Kolej Uniti - Yuran RM2,325 per semester. Penginapan RM23 x 92 bulan, makan RM7.50 x 30 hari (RM225). Perlu RM4,650 satu semester berbanding percuma di UPM sebelum ini yang dapat biasiswa.
- Fakulti Perubatan UKM Yuran semester 1998/99 RM4000 berbanding RM600 sebelum ini.
- KUSZA Yuran naik dari RM 3000 - RM4000 setahun kepada RM6000 - RM7000 setahun (1998).

### **KUASA POLITIK MELAYU.**

- (Ahli Parlimen)
- 1965 Umno memberi status quo kepada orang Cina secara percuma.
- Gerakan yang menguasai Pulau Pinang pada 10 Mesi 1969 dapat 16 daripada 24 kerusi.
- Umno kuasai 4 kerusi, dan Gerakan terus dapat Ketua Menteri pada 1990 walaupun Umno ada 12 daripada 33 kerusi berbanding 7 Gerakan dan DAP 14.
- Sabah dari 1963 diperintah oleh orang Melayu melalui Usno dan Berjaya, pada Mei 1996 PBS muelai memerintah Sabah.
- Untuk mendapatkan Sabah, BN bagi kouta Ketua Menteri 1:2 antara Islam dan bukan Islam. Dua tahun bukan Islam, Dua tahun Cina.
- Kementerian penting dan melibatkan rakyat seperti Kementerian Kesihatan, Tenaga Pos, Telekom Keraja raya diberikan kepada orang bukan Melayu menyebabkan rakyat ditindas melalui penswastaan.

LAMPIRAN

DALAM MAHKAMAH RENDAH STARIAH DI KHANTAN

DALAM NEGERI PARANG DARUJ HARMUR, MALAYSIA

KES. HAL. NO. 95 TAHUN 1997

DIANTARA

SITI ZAHARAH BINTI SULAIMAN

... PEMOHON

DAN

SAMARUDIN BIN MOHD REJAB

... PENENTANG

DIHADAPPAH YANG ABIL QAKIM  
HAJI MOHD YUSOF BIN AB. GHANI  
MAHKAMAH RENDAH STARIAH  
KHANTAN

SUMMARIKH PADA 12HR. APRIL 1997

PENENTANG

SETELAH KES. INI DIDENGAR PADA HARI INI dengan kehadiran PEMOHON, SITI ZAHARAH BINTI SULAIMAN, Pejabat Syarieh ENCIK MOHD NAJID BIN HUSAIN dan TANPA KEHADIRAH PENENTANG ENCIK SAMARUDIN BIN MOHD REJAB dan SETELAH MENUNGGU keterangan-keterangan oleh PEMOHON;

MAKA ADALAH DENGAN INI DIPERINTAH BAHAMA:-

1. PENENTANG disabitkan dengan Talik yang dilesaskan dan gugurkan Talak Siti terhadap PEMOHON dengan Talak Khul'ie.
2. Rak penjagaan dan pemeliharaan anak-anak diberikan kepada PEMOHON dan PENENTANG diberi hak untuk melawat anak-anak pada hari jung minggu dan musim cuti.

MAHAFIRAUN

3. Tiada Perintah mengenai nafkah eddah, nafkah mut'ah dan harta sepencarian.
4. Kos ditanggung oleh PEMOHON.

Bertarikh pada 11 haribulan

Juli

1997



  
\_\_\_\_\_  
HAKIM/PENDAFTAR  
MAHARAMAH RENDAH SYARIAH  
KUANTAN

Perintah ini difaikkan oleh Tetuan Mohd Najid, Salamon & Partners, Pegawai Syariah Penontong yang beralamat di Suite 4 & 5 Tingkat 18, Menara Teruntum, Jalan Mahkota, 25000 Kuantan, Pahang Darul Makmur.

(RUJ. RAMI: MNSP/L/MNH/SY/1231/97(ar.a)  
(DISK ANAS: ORDER F:4-5)

***Surat tuntutan cerai Dato' Dr. Siti Zaharah Sulaiman, Ketua Pergerakan Wanita Umno Malaysia. Tip ini khas untuk wanita sahaja.***

# KRITIKAN IKHLAS KEPADA MAHATHIR! BUKU TERAKHIR UNTUK ABAD 20!

Dr Mahathir Mohamad pernah menegaskan beliau akan berundur apabila sudah mendapat isyarat jelas menunjukkan beliau sudah tidak diperlukan lagi.

Demonstrasi reformasi yang meledak di ibukota secara besar-besaran akhir tahun lepas adalah di antara isyarat paling jelas dan pasti rakyat supaya Dr. Mahathir berundur.

Pakatan parti-parti alternatif dan sokongan rakyat kepada Barisan Alternatif (BA) juga merupakan isyarat jelas yang rakyat sudah menolak Dr. Mahathir.

Keengganan Dato Seri Anwar Ibrahim untuk tidak turut serta bersikongkol dengan segala penyelewengan ketidakadilan dan kemungkaran Dr. Mahathir serta kroninya sehingga beliau disingkir adalah juga isyarat nyata bahawa kepimpinan Dr. Mahathir tidak diingini lagi.



Dan kehadiran buku ini juga membawa isyarat peribadi penulis yang mahukan Dr. Mahathir segera berundur. Namun kita yakin - Dr. Mahathir tetap tidak akan berundur dan terus berdegil untuk mengekalkan kekuasaan. Ramai orang membuat ramalan bahawa Dr. Mahathir akan memerintah sampai mati. Atas kebabilan dan keengganan beliau itulah menyebabkan beliau telah digelar MAHFIRAUN.

**TINTA  
MERAH**


Harga Malaysia Barat : RM15.00

Harga Malaysia Timur : RM20.00

Singapore : SS12.00

Brunei : BS12.00

ISBN 983 - 9032 - 23 - 2



9 789839 032239

